

# WANTOK

NIUSPEPA BILONG YUMI OL PAPUA NIUGINI STRET!

32 pes

Namba 1,412

Wik stat long Fonde Julai 19, 2001

70t

Pes 30

Winim  
prais,  
painim bal  
resis

Pes 8

Lo bilong  
pipia i wok  
wansait long  
Madang

Pes 2

Sir Woods  
bai harim hevi  
bilong ol  
studen i dai

Pes 3

Kot bilong  
egensim VAT  
takis i kamap  
gen

Pes 11

Sik suga i  
kamap  
bikpela  
moa

## 3,901 pipel i gat sik AIDS

NAMBA bilong ol manmeri wantaim sik HIV AIDS i wok long kamap bikpela yet insait long kantri.

Helt Minista Tommy Tomsool i tok i kam inap long pinis bilong Jun dispela ya 3,901 pipel i bin gat HIV. Long dispela namba 1,368 i kamapim AIDS na long dispela namba 249 pipel i dai pinis.

Em i tok dispela namba i no bikpela. "Yumi nogat gutpela rot bilong sekim. Ol manmeri i stap nabaut na ol i mas gat sik tasol husat bai save?"

"Ol manmeri husat i stap long taun na kamap long haus sik i kamapim dispela namba," Mista Tomsool i tok.

"Tasol mi ting namba bilong ol manmeri husat gat binatang bilong HIV/AIDS insait long PNG i mas winim pinis dispela namba.

"Billip i stap olsem i gat mak long 15,000 manmeri i gat binatang bilong sik HIV AIDS. Insait long faivpela o 10-pela krismas, wankain namba bilong manmeri inap dai na moa pipel inap painim dispela sik.

"Yumi luksave long birua na sapos yumi no mekim wanpela samting. Dispela sik i olsem paia i lait na inap kukim ol gutpela manmeri bilong dispela kantri.

"Long Pot Mosbi haus sik wod, AIDS i go pas long kilim planti yangpela manmeri," em i tok.

Em i tok klia olsem nogat wanpela gutpela sistem i stap bilong bungim ol dispela kain toktok na namba bilong manmeri wantaim sik nogat bikos nogat wanpela rot i stap bilong was long ron bilong sik.

Mista Tomsool i singaut long olgeta manmeri i mas wok bung wantaim long traim abrusim dispela birua.

Em i tok maunten, wara, rot nogat, kinkain tokples, hat long tokaut long niuspepa, radio na TV bikos planti manmeri i

stap long bus tru.

Em i bilip olsem dispela hevi inap kilim olgeta manmeri sapos ol pipel i no senisim pasin na raun bilong ot.

Olgeta manmeri i gat tingting bilong ol i stap na ol i mas mekim wanwan disisen bilong stap gut bikos yu wanem samting yu mekim inap bagarapim sindaun bilong familli na komyuniti.

"Mi ting yumi olgeta inap skelim gut wanem samting yumi laik mekim na tingim wanem birua yumi inap kamapim long laik," Mista Tomsool i tok.

Em i tok olsem em bai traim wok bung wantaim olgeta manmeri long komyuniti na traim stapim dispela sik we i wok long kamap bikpela tude.

Em i ting olsem sapos yumi no mekim wanpela samting nau, yumi inap lukim planti gutpela manmeri dai nating bikos dispela sik i nogat marasini bilong em.

Em i tok i gat sampela marasin bilong surikim laip bilong ol sik manmeri i stap tasol dispela ol marasin i kos bikpela mani.

Em i tokim ol manmeri husat bung long Yunaited Nesens (UN) Jenerel Asembli olsem ol i mas kamap wantaim wanpela plen bilong mekim isi bai ol manmeri wantaim dispela sik i ken kisim long liklik prais.

Em i tokim ol tu olsem kantri i gat plen na kaunsel i stap bilong stretim hevi bilong HIV AIDS tasol nogat inap mani bilong karimaut olgeta wok.

UN wantaim ol helpim kantri i promis long kamap wantaim K30 bilion long givim ol kantri long Afrika, Esia na ol arapela long paitim dispela sik we i kilim planti manmeri pinis na moa pipel bai dai yet.

Em i sori olsem planti manmeri bai dai sapos ol i no klia tasol gavman i traim bes tru long helpim bai ol pipel i no kisim bagarap.



**Kalabus lain bungim Pasto** • Pasto Mark Finley husat i holim bikpela krused long Mosbi las wik na dispela wik i raun go lukim ol kalabus lain long Bomana. Dispela em namba wan taim wanpela intanesenel pasto i raun insait long haus kalabus na toktok wantaim ol kalabus lain. Foto: IVAN BAYAGAU.

## OL PNGBC wok- manmeri i straik

### PEKU PILIMBO i raitim

OL wokmanmeri bilong Papua Niugini Benking Kopresen (PNGBC) long kantri i no wok gut long dispela taim na sevis i no go gut long ol manmeri na ol bisnis husat i save go long PNGBC beng.

Toktok namel long PNGBC Menesmen na Nesenel Staf Asosiesen i kamap yet long lukaut bilong Leiba Dipatmen na ol bai tokaut logn wanem ting ng ol i kamap long en tude.

Wantok niuspepa i bin ringim planti ol beng senta olsem Mendi, Hagen, Kundiawa, Madang, Aitape, Lihir, Manus, Tabubil, Kokopo na ol arapela senta moa long painimaut sapos beng i op yet long sevim ol kastoma yet long dispela wik o nogat.

Planti bilong ol senta i no bekim telepon na sampela i gat wanpela o tupela man tasol husat i tok save olsem olgeta wokmanmeri i no kamap long wok.

Het opis bilong PNGBC long Pot Mosbi tasol i op long Boroko na Mosbi brenis na stretim ol kastoma tasol Waigani brens em pas long Tunde yet.

Ol dispela lain i tok ol i lukautim opis tasol na nogat planti wokmanmeri i stap wok long opis bilong ol.

Ol i toksave olsem ol i wet tasol long kisim toksave i kam long het opis na olsem na planti lain wok manmeri i no wok.

Ol manmeri husat i save yusim PNGBC long kisim mani na rausim mani o mekim bisnis bai kisim taim long dispela stap wok hevi bilong ol beng manmeri.

Wanpela bung i bin kamap dispela wik namel long Dipatmen bilong Leiba na Emploimen, menesmen bilong beng na NSA tasol ol i no stretim wanpela toktok yet.

Planti brens bilong PNGBC long kantri i tok ol i wet tasol long kisim tok orait long het opis bipo long ol i go bek wok.

Planti manmeri bilong ol bus na maunten husat i save kam wan wan

taim long beng i kisim taim stret long dispela taim bilong hevi bikos ol i no inap rausim o putim mani bilong ol insait long beng.

Tupela sait wantaim i strong wantaim, yunion na menesmen i sanap strong yet long ol toktok bilong tupela.

Presiden bilong NSA Luke Elijah i tok ol i bai stap wet tasol long stretim wanem tingting menesmen bilong beng i gat long en.

Mista Elijah i tok ating beng bai lukluk nau long hevi bilong ol bihain long ol i putim long sait tupela toktok, em long lip mani na K50 pe bilong ol wok manmeri beng i bin peim long ol.

Menesmen bilong beng i laikim ol wok manmeri long stat wok tude na i wok long traim hat long pasim tok wantaim opisal bilong NSA aste apinun.

Tasol sapos menesmen bilong beng i no kamap wantaim gutpela bekim long askim bilong NSA dispela stap wok inap go moa long sampela wik.

# PLIS RIPOT

### MOSBI:

\* Ol plis i wok long mekim ol wok painimaut bilong ol i go insait long sampela telekom kebel klostu long Murray Barraks na Wards Road. Sampela lain i bin brukim ol kebel bilong telepon na rausim sampela i go na i bagarapim planti telepon sevis long dispela hap.

Menesing darekta bilong Telekom Sunil Andrabi i tok mak bilong bagarap i go bai givim Telekom bikpela hevi tru long stretim.

Em i tok sapos telekom i laik stretim olgeta dispela hevi bai em i kisim olsem K60,000 mani na dispela i no gutpela.

Telekom i givim ripot pinis long ol plis long holimpas ol lain husat i rong.

\* Nesenel Inteligens Oganaisesen (NIO) i bin painimaut olsem wanpela man bilong Sri Lanka husat i giaman na tok em i wanpela pasta i no pasta tasol em i man husat i save hait na kisim ol lain man bilong em long kantri bilong em na kisim ol i go long PNG na Australia.

Planti ol man kain olsem i wok long kam insait long kantri bilong wanem Foren Afeas Dipatmen bilong mipela i wok long larim ol i kam insait na brukim lo.

NIO i wok yet long stapim dispela pasin bilong haitim ol man na karim ol i go insait long PNG.

### WEWAK:

\* Plis i tok olsem ol raskol i wok long karim ol bikpela na strongpela gan nabaut na brukim ol haus kakaruk na wok long poretim ol meri pikini-ni nabaut long ples.

Planti bilong ol dispela raskol i wok long karim ol kain gan we nogat raskol inap long kisim long en. Plis i wok strong long stapim ol raskol long go raun bagarapim ol lain manmeri.

Provinsai Plis Komanda Leo Kabilo i tok plis fos long Wewak yet i no inap long stapim dispela long wanem nogat fanding long helpim ol. Em i tok ol i ken yusim Sepik Wara long go raun sekim ol hap ples tasol i gat planti liklik han wara na i hat tru long bihainim olgeta.

Wanpela katolik misin sesen em ol i bin go na stilim ol samting moa long K20,000.

Ol i kisim bot, sampela engin bilong bot na K350 mani.

Komanda Kabilo i bin salim pas i go long haf opis long Mosbi long ol i ken traim yusim helikopta long raunim na luksautim ples.

### MADANG:

\* Plis i sutim tripela man husat i laik brukim sel na ranawe long Beon sel las wik. I bin gat blek aut long dispela taim na ol i ting ol bai hait na ranawe tasol ol woda i sutim ol na kilim wanpela na narapela ol i holimpas na wanpela i ranawe i go pinis.

Sel komanda Charles A'au i tok man husat i dai em Kelly Kamari, i gat 20 krismas na em bilong Sepik. Ol i bin putim Kelly long sel bilong wanem em i bin joinim ol raskol long mekim wanpela bikpela stil pasin ol i bin plen long mekim. Na tu em i bin paitim wanpela sista nogut tru bilong Malala Sekendari skul.

# Kalabus gospel ben i kisim helpim



• Eda Ranu siaman Jamie Maxton-Graham i soim Ben Juai wanpela bilong ol slot bilong ben.

### IVAN BAYAGAU i raitim

I BIN wanpela taim bilong bikpela amamas long Bomana haus kalabus insait long Nesenel Kapitell distrik long dispela wik.

Siaman bilong Eda Ranu, Jamie Maxton Graham i go long lukim ol kalabusman bihain long lida bilong nupela gospel ben bilong ol kalabus lain, Ben Juai i bin raitim wanpela pas i go long em.

Juai i bin askim Eda Ranu long helpim gospel ben bilong ol "Voices of Praise" long sampela T'slot long werim long taim ol i laik lonsim kaset bilong ol.

Voices of Praise em i namba wan kaset we ol kalabusman rekodim pinis na ol i wok long redi long lonsim long dispela mun Julai.

Mista Graham i tok olsem em i amamas long helpim ol kalabus lain long rehabilitesen program.

Em i tok olsem em bai helpim

yet dispela ben long kisim ol sampela moa instramen ol i bin askim long en.

Mista Graham i givim moa long 250 T'slot we i bin kos olsem K5000.

Komanda bilong Bomana kalabus, Simon Sobaim i tok olsem em i sapatim stret ol dispela kain ektiviti bilong ol kalabusman na tu em i tok olsem em laikim tru long lukim moa helpim i kam long ol pipel long helpim ol kalabus lain.

OPM singaut long PNG lusim Wenda go fri

### WINIS MAP i raitim

TINGTING bilong PNG gavman long salim OPM suprim komanda Mathias Wenda i go bek long Wes Papua, Indonesia bai kamapim sampela problem.

Ol bikman bilong OPM long Wes Papua i no laikim bai PNG gavman i salim Wenda na 30-pela narapela boda krosa wantaim helpim bilong Wenda, Bernard Alom long go bek long Irian Jaya.

Wanpela mausman husat i stap long not komand kem bilong ol OPM i tokim Wantok niuspepa olsem ol rebel bai i no inap amamas long Wenda i go bek long Indonesia. Em i tok ol OPM i gat bilip olsem bai kot sistem bilong Indonesia bai i no inap kotim Wenda gut. Bai ol i mekim ol kot disisen wan sait stret olsem na ol i laikim Wenda i go long Indonesia.

Em i tok planti taim ol pro-independens lida bilong Wes Papua i wok long go long ranaw long ol kot long Indonesia tasol ol kot i save wansait na giaman long kotim ol.

# Sir Woods bal harim ripot bilong ol yuni studen na plis

### YAKAM KELO i raitim

PRAIM Minista Sir Mekere Morauta i tokaut olsem kabinet i makim pinis wanpela Komisn ol Inkwairi long lukluk i go insait long hevi we tripela yunivesiti studen i bin dai long Mosbi long las mun.

Sir Mekere i tokaut olsem kabinet i makim olpela Nesenel Kot Jas Sir Robert Woods long go pas long dispela kot. Kabinet i mekim olsem bikos ol i bilip Jas Woods bai mekim gut wok na tu em i eksperiens Jas hia long Papua Niugini bipo long em i bin risain long wok.

Sir Mekere i tok kabinet ino makim yet tupela Papua Niugini mejistret bilong sindaun wantaim Sir Woods long harim dispela inkwairi kot. Wanpela mejistret em ol i tokkot wantaim em pinis tasol narapela em ol i no kisim gut tingting bilong em yet.

Sir Mekere i tokaut tu olsem kabi-

riet i ho tokaut long tems ol referens ol ol stingling we dispela inkwairi kot bai sanap antap long en na skellim tokkot bilong olgeta lain. Em i tok dispela samting em bai kabinet i tokaut bihain long em i kam bek long Melanesian Spiahet Grup miting long tupela wik bihain.

Sief Mejistret i bin tokaut pinis olsem i no gutpela long ol i holim wanpela korona kot bikos bikpela evidens bilong medikel ripot i soim olsem ol tupela studen na wanpela man i dai bikos long bagarap long sotgan. Olsem na em i wok bilong plis long mekim wok painimaut bilong em yet long husat i tru i sut long ol dispela katres we i kilim dai tripela man.

Ol famili bilong tupela studen husat i dai i bin singaut long wanpela kot ol inkwairi i mas kamap na Intanesenel Yumen Rait Grup i mas go pas long kamapim dispela inkwairi kot na ino gavman o wanpela grup o lain hia long PNG.

# AIDS kaunseling woksop kamap long Aitape

### JACKLEEN MILI i raitim

Olgeta manmeri husat i gat kaikain hevi na ino inap long painim rot bilong helpim, ol i mas kisim kaunseling.

Dispela em i tokkot bilong Dairekta bilong Nesenel Katolik Famili Laip Opis Sista Lourdes Hummes husat i bin kam long Aitape long givim skul bilong AIDS Kaunseling long ol memba bilong Aitape Daiosis AIDS Komiti.

Sista Lourdes i save stap long Goroka na save raun long ol provins long givim skul long ol famili laip program na treading long famili laip.

Sista Lourdes i givim skul long Daiosis AIDS komiti olsem tupela de tasol.

Em i givim skul long ol long Psychosocial growth, moral growth, psychosocial growth, famili AIDS, STD o sik long pasin pamuk, Besik Kaunseling skills na famili velius.

Sista Lourdes i tok olsem kaunseling bilong HIV/AIDS i no bilong givim infomesen tasol. Em i bilong helpim ol manmeri long luksave o dil wantaim ol kaikain tingting bilong ol long ol hevi bilong sik AIDS.

# WANTOK

All departments. Phone: 325 2500 - Fax: 325 2579  
P. O. Box 1982, Boroko, NCD, Papua New Guinea

Publishing Weekly, Thursday, for Word Publishing Company Pty. Ltd.  
Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.  
General Manager and Group Editor in Chief: Anna Solomon.  
Acting Advertising Manager: Jocko Oberleuter.  
Editor of Wantok: Yakam Kelo.  
Papers distributed by air throughout PNG. Available by air mail subscription within Papua New Guinea and overseas.  
Email address: word@global.net.pg

Word Publishing Company Pty. Ltd. is owned by the four major churches of Papua New Guinea: Catholic 66%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.



## Wok stat long sekim hevi bilong paspot, imigresen na sitijensip

WANPELA tim i lukluk insait nau long pinisim olgeta wok painimaut i go insait long ol hevi bilong givim paspot o stretim rot na sindaun bilong ol ovasis lain husat i brukim lo bilong Foren Afeas na kam hait na wok insait long Papua Niugini.

Minista bilong Foren Afeas John Pundari i givim wok i go long dispela grup long lukluk insait na sekim olgeta hait pasin ya na kamautim ripot bilong ol insait long tripela wik bihaini.

Minista Pundari i laik pinisim dispela wok bai Dipatmen bilong Foren Afeas i ken go het wantaim wok bilong em na husat ovasis manmeri i brukim lo na kam hait insait long PNG i ken kamaut na mekim samting stret bihainim lo na husat opisa i helpim long dispela hait pasin tu i ken kamaut ples klia aninit long lo.

Long karimaut dispela wok painimaut, ol eria bilong lukluk insait na sekim em:

- sekim na soim olgeta pasin we i brukim lo bilong Maigresen na soim husat man o meri, opis o dipatmen i stap insait long dispela asua,
- sekim na ripot long olgeta pasin we i brukim ol lo bilong PNG Paspot na husat i stap insait long dispela,
- sekim na ripot long olgeta pasin we i brukim lo bilong PNG Sitijensip na soim husat i stap insait,
- soim aut na mekim klia wanem lo i bruk insait long dispela tripela lo na soim klia husat i brukim ol dispela lo o husat i stap insait long dispela asua,
- skelim na tokaut long mi ken lukim na mekim wanem rait eksen aninit long lo long mekimsave long husat i asua long brukim ol dispela lo, na
- kamapim ripot long dispela wok painimaut long Ogus 2, we i tripela wik long

stat bilong dispela wok painimaut.

Plis fos i bin wok long sekim dispela hevi long opis bilong Foren Afeas na i no pinisim yet bikos ol i tok sampela opisa bilong Foren Afeas i wok long pasim rot o i no givim wanem samting plis i laikim.

Olsem na Minista Pundari i sanapim wanpela opis bilong dispela task fos tim insait long Foren Afeas dipatmen yet long ol i ken sindaun na sekim wanem samting ol i laikim. Na husat opisa i blokim rot bilong wok painimaut bai plis i sasim em long pasin em i mekim long traim stapim o bagarapim dispela wok painimaut long go het.

Dispela tim i gat ol opisa i kam long opis bilong Atoni Jenerel, Pablik Sevis, Foren Afeas, Prais Minista na NEC we Nesenel Intalijens Ogenaisesen (NIO) i makim, Invesment Promosen Atoriti na Dipatmen bilong Leba na Emploimen.

Bai dispela tim i bungim olgeta ripot o pepa we i gat ol rekot na ripot i sut long dispela hevi bilong paspot na Imigresen na Sitijensip.

Bai ol i askim long wanpela samting i no ken stapim wok bilong ol i go insait long dispela hevi na tu ol bai askim pablik long PNG na ovasis long givim wanem kain ripot ol i gat long dispela hevi na ol bai stapim ol dipatmen long noken traim long rausim ol wokman long wok husat inap givim sampela ripot i go insait long dispela wok painimaut.

Dispela wok painimaut em Minista John Pundari i laik pinisim insait long tripela wik we ol i ken kamapim ripot na lukluk long wanem eksen bihainim lo long mekimsave long husat i brukim lo bilong Foren Afeas insait long seksen bilong Paspot, Imigresen na Sitijensip.



### Kumu bilong salim

• Dispela famili bilong Tambul long Westen Hailans i soim ol kabis ol i planim na i redi tru bilong salim. Tasol rot i go long Hagen maket i bagarap. Lukim stori long pes 7. Foto SAPE METTA.

# PNGBC i no givim olgeta sevis

### YAKAM KELO i raitim

PAPUA Niugini Benking Kopresen (PNGBC) i no givim inap sevis long ol manmeri long dispela wik bikos ol wokmanmeri i stap long straik.

Bikpela brens long Waigani i no op long Tunde na Trinde aste na Fonde tude. Tasol Boroko na Taun brens tasol i wok na i taim long sevim ol kastoma husat i go long hap.

Wanpela wokman bilong PNGBC beng i tokaut olsem ol op long dispela wik tasol ol i no givim inap sevis long ol kastoma bikos planti wokmanmeri i no kamap long wok. Liklik tasol i wok na wok i winim ol bikos planti kastomas tru i kamap na liklik lain wokman tasol i no inap stretim wari na hevi bilong olgeta lain gut.

Wokman ya i tok ol bikpela sevis olsem putim mani o rausim mani em orait bikos ol liklik lain wokmanmeri i traim long sevim ol kastoma. Tasol

ol arapela sevis olsem salim mani o kisim lon o ovasis trensfea na ol arapela sevis em i hat liklik bikos nogat inap wokman long stretim dispela.

Wokman ya i tok tu olsem ol arapela sevis olsem ATM kat i wok orait na ol manmeri i ken sekim masin long kisim mani bilong ol long masin o baim ol kaikai long stua na kisim mani.

Narapela tu em potnait pe bilong ol manmeri i kam long PNGBC akaun bilong ol bai orait na ol i ken kisim mani bilong ol long ATM masin wantaim kat bilong ol.

Wokman ya i tok em i save olsem long ol arapela provins, PNGBC brens i no wok gut tu long dispela straik bikos em i straik bilong ol union wokmanmeri long olgeta brens long kantri. Bikos Mosbi i save givim tok orait long go het long straik o nogat.

Em i tok bikpela samting ol i laikim em long menesmen i mas stretim ol wari ol wokmanmeri i gat i stap pastaim

long Gavman i ken go het na salim PNGBC beng. Mipela i no wari long Gavman i laik salim PNGBC, mipela laikim beng i stretim ol liklik wari bilong mipela pastaim, em i tok.

Long kot haus long Tunde dispela wik, Sief Jas, Sir Arnold Amet i tok em i no inap mekim wanpela samting long dispela straik bilong wokmanmeri egens long menesmen.

Sir Arnold Amet i tok bikos miting namel long ol union na menesmen bai kamap, em i laik larim ol toktok bilong kot i stap pastaim na dispela miting i mas kamap pastaim namel long tupela kros grup ya.

Ol union lain bilong PNGBC i bin kamapim kot bikos ol i tok sampela sinia opisa i no bin kisim potnait long las potnait na tu ol lain i bin go long straik i mas kisim K50 komisin na 4-pela de rekriesen liv. Dispela em bikos ol liklik lain husat i bin go long wok i bin kisim K50 komisin taim ol union i go long straik long las mun.

## Gavman loya i no redi long VAT kot

WANPELA bikpela kot inap kamap na testim lo bilong Velu Eded Takis (VAT) sapos em i stret o i mas gat sampela senis o i mas pinis. Dispela kot em enti VAT kot salens we Morobe Provinsal Gavman i kamapim egensim Nesenel Gavman long kamapim nupela takis we ol i kolim VAT.

Dispela kot bilong salensim lo bilong Velu Eded Takis (VAT) i bin kamap long Tunde dispela wik tasol ol loya bilong Gavman i no bin redim ol pepa bilong ol long tokim kot sapos ol i redi long sanap long dispela kot.

Dispela i mekim Sief Jas Sir Arnold Amet i hatim ol long stretim gut ol pepa na wanem kain wok ol i mas mekim long redim gut olgeta toktok na pepa bilong ol long dispela kot.

Loya bilong Morobe Provinsal Gavman Alfred Manase bilong Pato Loyas i tokaut olsem ol i bungim na stretim olgeta pepa bilong ol pinis long go het wantaim dispela kot. Na ol i givim kopi bilong olgeta ripot na kot pepa bilong ol i go pinis long loya bilong Gavman long Jun las mun.

Sief Jas Sir Arnold Amet i tok pasin bilong i go moa i save kamap olgeta taim long dispela kantri. Olsem na em i askim ol loya long stretim gut ol samting na makim stret taim ol i redi long en bai kot i ken makim taim bilong kot i ken kamap long en.

Sief Jas i makim Fraide tumoro long loya bilong Gavman (Intenel Reveniu Komisin) long kamap na tokaut sapos em i redi long holim dispela kot.

Sapos Gavman loya i redi, bai Jas i makim taim long Oktoba samting long kot tru i ken kamap.

Morobe Gavana Luther Wenge i tok ol i redi tru long kamapim dispela kot na ol i ting bai Jas i mekim disisen long kot i kamap long mun Ogus. Tasol nau ol loya bilong Gavman i no redi yet, dispela i soim olsem ating ol i laik kamapim pasin bilong surukim surukim taim i go longpela.

Mista Wenge i tok ol i gat ripot bilong 10-pela witnes pinis na tu ripot bilong wanpela saveman bilong Nesenel Rises Institut (NRI).

Mista Wenge i tok Gavman i feil tru long soim sapos em i ken salensim dispela kot.

## Pawa bilong makim ol Gutpela Lida o Lida Nogut i stap long vot bilong yumi



**ELECTION  
2002**

BOS bilong ileksen Mista Reuben Kaiulo i lusim pinis wanpela gutpela kuskus o advaisa bilong em.

Nem bilong dispela gutpela kuskus em i Mista Mura Koloa husat i bin wok olsem ileksen 2002 tok save o komyuniti awenes advaisa bilong Mista Kaiulo long Iletorol Komisin.

Wok bilong Iletorol Komisin em i long stretim na wokim gut olgeta ileksen insait long Papua Niugini na Mista Kaiulo em i Iletorol Komisina o bos bilong ol.

Mista Koloa i bin dai long bik moning bilong Fraide, Julai 6.

Mista Kaiulo i tok olsem Mista Koloa em i wanpela smatpela man stret bilong wok na bai hat tru long painem ken wanpela kuskus olsem em.

"Mura Koloa em i man bilong wok hat tru na i save laikim tru long traim tingting o save bilong em long olgeta kainkain wok," Mista Kaiulo i tok. "Ah brat, mipela olgeta lain bilong Iletorol Komisin long olgeta hap bilong Papua Niugini wantaim ol femili bilong mipela i sori tru olsem yu i no nap wokabaut mo wantaim mipela. God Bless."

Long 3-pela mun nau, Mista Koloa i

bin wok wantaim Iletorol Komisin long stretim olgeta tok save bilong 2002 Nesenel Ilekse.

Mista Kaiulo i bin makim em long toktok wantaim ol NGO long stretim olgeta samting bilong ileksen tok save.

Long Fonde, Julai 5, Mista Koloa i bin sik na i no go wok. Long Fraide, olgeta lain bilong Iletorol Komisin i kirap nogut olsem turangu i bin dai long bik moning yet long Pot Mosbi Jenerel Hospital.

Long bipo yet, Mista Koloa i bin gat wanpela sik long nek bilong em na i bin go long Ostrelia we ol dokta i bin


stretim em. Long tupela yia i go pinis em i bin stop long kisim marasin bilong dispela sik, meri bilong em Waia i tok.

Krismas bilong Mr Koloa i bin 55 taim em i dai.

Long las wik Trinde apinun, ol i planim em long ples bilong em Tauraba long Rigo.

Olsem ol Rigo i save tok, Bono Gena Mura Koloa, Gudbai brata na God Bless.

• PNG Iletorol Komisin i sponsorim dispela Ilekse Tok Save.



# NIUGINI AILAN NIUS



## Ol skul long Nu Ailan wetim skul sabsidi bilong ol

OL HAI skul, vokesenel senta na sekenderi skul long Nu Ailan provins i wet yet long ful pemen bilong namba tu kwata skul fi sabsidi mani bilong ol.

Provinsal edukesen edvaisa Edward Timan i tok provinsal gavman i bin peim hap sabsidi mani bilong olgeta dispela skul bilong namba tu kwata tasol.

Mista Timan i no bin tokaut long amas mani bai provinsal gavman i mas givim ol skul bilong wanem provinsal edministresen opisa i no stap bilong tokaut long dispela.

Em i tok ol i bin luksave long baset pinis tasol ol i no save long wanem taim bai ol i peim ful pemen bilong ol dispela skul.

Mista Timan i tok nesanel gavman i bin isi isi long givim ol sabsidi mani bilong em tasol ol bin kisim olgeta mani bilong ol long sabsidi. Long sait bilong provinsal gavman ol sekendari, hai skul na vokesenel senta tasol i kisim sabsidi mani i kam long provinsal gavman.

Em i tok we bilong kisim mani i save kamap isi isi tru tasol ol bai i wet yet long kisim mani bilong ol we provinsal gavman bai givim.

Mista Timan i tok ol sumatin husat i save slip long skul i stap long holide na taim ol i kam bek long skul bai ol i nidim mani long kaikai bilong ol.


Em i tok bilong namba tri kuata ol i bin givim pepa i go pinis long Fainens Dipatmen na ol i wet yet i stap.

Olgeta skul i bin kisim pinis fanding bilong ol long kisim ol skul saplai bilong ol olsem na ol i mas gat ol saplai bilong ol pinis.

Mista Timan i tok sapos ol skul i no kisim ol saplai bilong ol yet em ol bod ov menesmen na ol skul edministresen i no bin putim oda long ol saplai. Mani em ol i kisim pinis.

Em i tok tu olsem narapela hevi long provins em ol skul saplai i bin kam let tumas long ol skul i no bin kisim hariap.

Taim ol i putim ol skul saplai long sip i karim olsem kago i go dispela i save go bhain tru sam-pela taim na ol i no save kisim.



• Wokman bilong stretim telefon Carolius Kiroha i wok hat tru long stretim telefon long Arawa taun long las wik. Foto: TIMOTHY SAKETE.

## Is Nu Briten komon rol i no stretim gut olgeta nem

PLANTI manmeri long Is Nu Briten provins i no inap vot long neks yia 2002 nesanel ileksen sapos llektorel Komisn i yusim komon rol bilong 2000 we ol i wok long stretim, wanpela kaunsil presiden i tokaut long dispela.

Dispela kaunsil presiden i autim dispela bel hevi bikos em i ting ol wokman bilong llektorel Komisn i karimaut wok bilong stretim gut ol nem long komon rol insait long tupela de tasol we dispela taim i no inap. Ol i bin stretim ol nem long komon rol long taim bilong bai ileksen long Pomio, Gasel na Is Nu Briten rijinol sit.

Kaunsil presiden bilong Bitapaka, John Maono i tokaut olsem long taim bilong ol dispela bai ileksen, planti manmeri i no bin vot long dispela taim. Provins i gat olsem 121,666 namba bilong ol pipel long vot.

Mista Maono i ting mani bilong karimaut wok bilong bai ileksen na wok bilong stretim gut ol komon rol i no bin go stret long Is Nu Briten ilektorel opis long karimaut wok bilong ol gut. Het opis i no givim stret olgeta mani.

Em i tok mani bai bilong mekim ol dispela wok em K1 milien we provinsal ilektorel opis i askim long en tasol ol i no kisim stret dispela mani.

Em i tok llektorel Komisn i makim na oraitim K800,000 bilong ol dispela wok tasol hap bilong dispela mani i kamap long provins long mekim ol dispela wok.

## Gavana helpim ol yut na mama long distrik

FRED RAKA i raitim

WOK bilong ol tisa na lainim bilong ol pikini-ni wantaim wok bilong ol yut na mama insait long Bunga Nalolo Wod bilong Talasea lokol level gavman eria bai senis gut na go het moa bhainim bikpela helpim i kam long Wes Nu Briten Gavana Clement Nakmai.

Long mun Februari long dispela yia gavana Nakmai i bin wokim ilektorel raun bilong em i go long dispela wod na em i bin promisisim ol pipel olsem em bai givim sampela halivim i go long wanem we em i nap long givim helpim long ol wok bilong ol yut na mama.

Long las wik Sarere i go pinis Mista Nakmai i bin inapim ol dispela tok promisis bilong em na Namala Praimerri Skul nau i gat wanpela nupela pawa jenereta, wan-

pela poto kopi masin na wanpela pawa taiprait. Pawa jenereta nau bai givim lait long olgeta haus bilong ol tisa, ol klasrum na komyuniti ed pos.

Moa long K20,000 i bin go insait long baim olgeta dispela samting.

Ol yut tu i bin kisim wanpela sek mani i kam long Gavana mak long K2,000. Presiden bilong ol yut Henry Raka i tok amamas na tenkyu long Mista Nakmai long dispela helpim na em i bin tokaut olsem dispela sek mani nau em ol yut bai yusim long statim ol ragbi lig klub.

Dispela ol ragbi lig klub i save pilai insait long Kimbe ragbi lig resis.

Ol mama grup bilong Wod Tu i kisim wanpela sek mani em long K1,000 na bai ol i yusim dispela long go het long helpim sampela wok ol i mekim i stap em long kukim bret na skon, samapim klos na pilai sofbol.

"Mi askim yupela olgeta long yupela i

mas lukautim ol dispela samting gavman i givim yupela. Pe bilong baim ol samting i go antap tru olsem na wanem liklik samting gavman i givim yupela i mas lukautim gut na em i mas sevim yupela," Mista Nakmai i tokim ol pipel bilong em.

Em i tok ol pipel olsem ol wok bilong ol mama na yut long distrik i mas go het. Ol yut i mas wok strong namel long lukautim ol komyuniti bilong ol.

Mista Nakmai i tok ol yut em ol pat bilong komyuniti na ol mama tu i wankain olsem na ol i mas strongim komyuniti long kain wok ol i save mekim.

Gavana Nakmai i tok em i amamas olsem Bunga Nalolo wod i gat gutpela straksa na plen bilong kirapim wok kamap olsem na em i redi tasol long givim han we komyuniti i ken kisim ol dispela helpim long kamapim gutpela laip na sindaun insait long komyuniti.

## Bogenvil laik kamapim yunivesiti

HELEN REI i raitim

Not Solomons Yunivesiti Senta bai kamap Yunivesiti ov Bogenvil na bai em i gat tupela yuni senta long sentral na saut Bogenvil.

Not Solomons provinsal edukesen Edvaisa Tony Tsora i tok dispela i kamap long wanem planti sumatin tru i laik mekim ol yunivesiti stadi.

Tupela sab-senta bilong yunivesiti em ol i bin kamapim pinis long tupela eria na ol i wok long skulim ol sumatin pinis.

I gat 12-pela CODE senta long provins na dispela i save helpim ol pipel bilong Bogenvil gut tru long taim ol i gat hangare long skul.

Het opis bilong tupela

yuni senta na CODE i stap long Kubung Ailan long Buka.

Mista Tsora i tok bikpela opis bilong senta em klostu tru bai ol i pinis bildim we bai tupela senta na CODE bai mekim het opis bilong ol.

Edukesen Divisen i plen tu long kamapim wanpela radio netwok long ol sumatin i ken skul na toktok wantaim ol leksera bilong ol arasait long klasrum.

Taim ol i yusim radio ol i ken toktok long planti ol lain husat i no inap kam long senta tasol long kisim skul tasol bai ol i go long olgeta hap bilong provins we planti pipel tru i stap.

Divisen bilong Edukesen long Manus i kamapim wanpela radio program we ol tisa i save givim skul long ol sumatin long radio.

Tasol Mista Tsora i tok dispela radio program long radio long Manus em ol tisa tasol i save toktok na ol sumatin i harim. Em i laikim olsem long Buka ol i ken kamapim wanpela radio program we ol sumatin na tisa i ken toktok na lainim samting i go i kam na tupela wantaim i mas toktok.

Mista Tsora i tok ol radio program tu i bikpela mani tu long kamapim.

Narapela plen ol i gat em long bildim ol klasrum long olgeta stadi senta long provins. Tasol em i tok long mekim olsem ol i nidim moa fanding i mas kam long provinsal gavman.

Em i tok planti sumatin husat i pinis stadi long yuni senta i go long ol koles na yunivesiti.

**Biabia** OL GAMING BOD IGINIM MONI LONG BIABIA LONG GO OPIM WANPELA POKIS HAUS LONG ELECTORET BILONG EM...

TENKS BRO!

MIPELA ARESTIM YU LONG MISUSIM MONI BILONG OL GAMING BOD!

TASOL NOGAT, BIABIA IGO NA MISUSIM MONI LONG PILAI POKIS LONG LAMANA GOLD KIAB...

MI MISUSIM WANEM MONI?! EM MONI BILONG OL YET MI GO PILAI POKIS NA OL I KISIM BEK YAH?! MI LUSIM OLGETA MONI IGO BEK LONG OL!

NAU OL FRAUD SKIWAD IGO NA ARESTIM BIABIA LONG OPIS BILONG EM...

SATE ORGIN IIIII



# SEPIK NIUS



## AIDS Kaunsoling woksop

OLGETA manmeri husait i gat kaikain hevi na ino inap long painim rot bilong helpim , ol i mas kism kaunsoling.

Dispela em i toktok bilong Dairekta bilong Nesenel Katolik Famili Laif Office, Sr Lourdes Hummes husait i bin kam lomg Aiatpe long givim skul bilong Aids Kaunsoling long ol memba bilong

Aitape Dioses Aids Komiti.

Sr Lourdes i beis long Goroka na save raun raun long ol provins long givim skul long ol famili laif program na trening long famili laif.

Sr Lourdes i givim

skul long Diocese Aids komiti olsem tupela de tasol.

Em i givim skul long ol long Psychosocial growth, moral growth, psychosocial growth, famili Aids, STD, Basik Kaunsoling skills na famili values.

Sr Lourdes tok olsem kaunsoling bilong HIV/AIDS ino bilong givim infomeisen tasol. Em i bilong helpim ol manmeri long luksave o di wantaim ol kaikain ting ting bilong ol long ol hevi long Aids.

Em tok: "putim iau na harim toktok em i wanpela skil we yumi mas developim."

Kaunsela em i man o meri bilong harim as tok bilong wari manmeri, pilim as tok bilong wari manmeri, bekim as tok bilong wari manmeri na kirapim o strongim tingting, pilim na laik bilong wari manmeri.

Sr Lourdes i tokim ol komiti memba olsem kaunsela i mas tingim tu olsem sampela taim, em i no inap helpim wari man long painim rot bilong sampela kain hevi bilong wari man. Tasol wanpela bikpela samting kaunsela inap melim em long redi oltaim long sambai long brata bilong em husait i gat bel hevi.

Sr Lourdes i givim skul long ol long wanem taim long kaunselim ol manmeri bifo long HIV testing (pre test coounselling), kaunsoling bihain long testing na kaunsoling bihain long kism negativ resal o positiv resal.

Em i tokim ol tu long ol wei bilong long givim HIV/AIDS kaunsoling em yet long ol manmeri husait i gat dispela sik.

Ol memba husait i stap insait long dispela tupela de woksop em ol yut representatives, wanpela dokta, publik helt ofisa, ol religious brata na sista, ol nesing sista na famili laif representatives.



• Ol memba bilong Aitape Diocese AIDS komiti wantaim Sister Lourdes (namba tu long lephan) long pinis bilong AIDS kaunsoling woksop i soim sampela ol posta bilong mekim awenes long AIDS.

## Rainakir opim nupela haus lotu

by SILVIA AVITU

LONG Sarere 7 Julai ol pipel long Rainakir i mekim bikpela bung bilong opening bilong haus lotu bilong ol.

Namba bilong ol pipel i bung moa long 200 olgeta. Ol manmeri i kam olsem long Poro, Amu, Lemieng na Aipokon long putim ol pilai o singsing long dispela dei.

Fr. Chidi Omezi CSSp long semon bilong em i tokim ol

pipel olsem ol i mas amamas long tuat bilong ol, tasol em i tok dispela wok long haus lotu i no pinis yet.

"Wok ino bilong kirapim haus lotu tasol, yumi mas lukluk tu long kirapim ol wok insait long dispela haus lotu na tu long ol pipel husait i kam long lotu insait long dispela haus lotu," Fr. Chidi itok.

Dispela nupela haus lotu ol sios lida i bung na ol i givim nem bilong en, St Robert Sab Peris.

Dispela nem i kam long wanpela man nem bilong em Robert Amawauw husait i wanpela gutpela sios lida long taim bilong en.

Em i bon long yia 1932 na dai long yia 1960. Em i wok long sevim peris long Aindrin komuniti na em i wanpela man i gat gutpela pasin bilong bel isj na laikim narapela.

Ol sios lida i laik bai wanpela pikinini bilong ol long Aindrin i bihainim pasnj bilong dispela man na go kamap

olsem pater long sevim komuniti bilong ol.

Plenti manmeri, grup na ol komuniti bilong Aindrin/Tainapin na long Aitape ibin givim moni bilong helpim.

Ol doneisen ol pipel i givim i olsem K1500 long moni na ol samting.

Siaman bilong St Robert Sab Peris itok bikpela tenku tru long husait ol i givim helpim long sait bilong moni, ol samting na helpim bilong ol.

### Sikau Projek Ion Lumi Distrik

LONG 19 Jun 2001 ol lain long wanpela Non Gavaman Oganaisisen grup i bin kam long Lumi na tok klia long ol pipel bilong Lumi olsem ol bai i statim Sikau Projek insait long Lumi Distrik.


Sikau em i wanpela tri kengeru we ol i painim long Lumi tasol na dispela Sikau projek i bilong lukautim ol tri kengeru na mekim stadi long ol na long hap ol i stap long en.

Gavaman i apruvim pinis K160,000 long statim Risets Senta. Bikpela tinting i bilong banisim Sikau na lukautim bus graun bilong yumi, i Lumi Dineri Siaman Terence Eki itok.

Igat eitpela Bod ov Dairekta insait long SikauKonseveisen Elain. Ol lain i kam long Lumi i stap insait long Bod tu, em Chris Talie, Tom Pringel na Steve Hamilton.

Ol dispela eitpela Dairekta em ol save man na saintis na ol i wok wantaim Melbon ju (ples lukaut bilong ol enime).

Ol bai i stat wok wantiam ol papa graun na tu bai statim Risets Senta olsem beis bilong ol na wokim ol haus, wanpela opis na banis bilong Sikau, ol wok bai i stat long Oqus, Mr Eki itok.



• Fr Chidi Omezi CSSp i raunim haus lotu na blesim insait na ausait wantaim Holi Wara.

### Woksyen Yut Ritrit ripot

LONG 16 Jun Siaman bilong Woksyen Katolik Yut bilong ples Yongite, Katolik Misin Yauluwape long Lumi Dineri ibin holim wanpela skul ritrit bilong wasman bilong moning.

Long dispela skul plenti memba bilong yut ibin kamap long dispela ritrit skul bilong wasman bilong moning. Namba bilong ol yut i kamap

long ritrit i olsem 37 olgeta.

Lumi Dineri Yut Siaman Terence Eki na Siaman bilong Woksyen Yut Masion Kati i bin amamas tru long dispela ol kain kos ol i bin kism long Seint Matin we, ol itok inap long senisim laip bilong ol yut bilong nau na bihain tu.

Mista Eki i amamas

tru na givim bikpela tok tenkyu igo long Masion Kati husait i oganaisim dispela ritrit na tok tenkyu igo long ol memba bilong Woksyen Katolik Yut.

Mr Eki tu i askim wanwan Yut Katolik Siaman imas mekim kain samting olsem insait long Aitape Daiosis na dispela bai i helpim ol yut na luksave long ol yut

bilong tumoro.

"Long dispela bung ol yut yet i bin spendim moni olsem K70.00 olgeta long baim ol kaikai bilong stoa," Mr. Kati itok.

Mista Kati tok olsem igat helpim tu ibin kam long ol yut memba long kontribuisen bilong kaikai bilong ol yet.

Na long dispela taim Mr Kati ibin askim

Dineri Yut Kodineta Terence Eki long kamap na witnesim dispela nambawan bung bilong ol Woksyen Yut tasol igat sampela senis ibin kamap na em ino go.

Insait long dispela ritrit bung. Mi yet i amamas tru long bekim bilong ol kuwesten na Baibel rit serim i bin kamap namel long ol

EKSKUS MI MAI MEMBA ...YU MAS RIMEMBA... VOTIM "YESA" LONG AMENDIM KONSTITUSEN LONG OL ILEKSEN RIFOMS ...IS GUT 4 PNG..AN' IS GUT 4 YU... AN'MI!



Awareness on proposed changes to the electoral system

TI (PNG) Inc. and its coalition partners together with the Constitutional Development Commission and Electoral Commission bringing education and awareness on the electoral reforms to the people through the Electoral Reform Project.

For information on Preferential Voting System, Fax: 321 3716, write to: Electoral Reform Project, PO Box 501, Port Moresby NCD, PNG or email: dlaytor@online.net.pg

Electoral Reform Project

SUPPORTED BY THE EUROPEAN UNION



# SAUTEN



# RIJON



## manmeri bilong Pot Mosbi les long poka masin

PEKU PILIMBO i raitim

PLANTI manmeri long Pot Mosbi we Wantok Niuspepa i toktok wantaim i laikim tingting bilong Prais Minista Sir Mekere Morauta long rausim poka masin.

Ol i ting olsem dispela masin nogut i save bagarapim sindaun bilong planti manmeri na bilong wanem gavman i larim i stap.

Sampela mama i tok ol i no amamas bikos papa i save kisim mani bilong potnait na pilai poka masin wantaim dispela mani.

Apinun i save dring spak na kam paitim mama na planti famili i save bagarap taim nogat kaikai samting long haus.

Ol i ting olsem Sir Mekere i kamap wantaim wanpela gutpela tingting long rausim.

Sampela manmeri i ting olsem gavman i mas larim poka masin i stap bikos gavman inap kamapim planti mani long dispela rot.

Ol dispela lain i ting olsem ol man i gat het

na ol inap skelim gut wanem likik ol kisim bilong famili na ol yet. Bihain ol man i ken go pilai raun na sapos ol man i stupit tru na i no yusim het.

Ol lain laikim poka masin i stap i ting olsem poka masin em gutpela rot bilong gavman i kisim mani na givim sevis long ol manmeri bilong ples.

Ol i tok ol lain long taun i gat olgeta samting na mani tu i inap na ol i pilai olsem na wanem likik ol i pilai em ol ples manmeri i mas kisim sevis.

Planti bisnis tu i save bruk daun taim manmeri wantaim i go sindaun long poka masin haus na traun laki long winim moa.

Ap likik i laikim masin i stap tasol planti tu bilong ol pipel i ting olsem poka masin em wanpela pipia samting tru i bin bagrapim pinis planti famili na sapos i stap i go inap kamapim wankain hevi.

Wantok Niuspepa bai karim ripot bilong ting ol pipel i givim neks wik.

## Koiari pipel pret long pravitaisesen

KENNEDY EDENE i raitim

OL papagraun Koiaripapagraun givim wanpela petisen long Rijinel memba bilong Sentrel Ted Diro las wik long Sogeri.

Dispela petisen nau stap wantaim nesanel gavman na ol pipel laikim gavman stretim wari bilong ol long pravitaisesen.

Dispela petisen em ol redim long givim Kairuku Hiri memba Moi Avei tasol em i no kamap na ol i givim long Mista Diro.

Mista Diro tokim ol pipel olsem em stap long oposisen tasol em bai toktok long Prais Minista na givim pas long em.

Insait long dispela petisen ol pipel autim belhat na i bilip raits bilong ol bai gavman tok nogut na lus tingting sapos ol bikpela kampani wok long mekim planti mani long graun bilong Koiari olsem Eda Ranu, PNG Elcom na narapela kampani.

Insait long dispela petisen ol laik Prais Minista na gavman bilong em long givim gut ansa na adresim ol wari bilong ol kwik.

Ol pipel strong long stet mas stretim ol dispela wari bilong ol:

- K15 milien, pemen bilong wari i go long 1955 inap 2001 na pemen ol mas peim;
- Sirinumu Dem Koiari K5 milien,
- Sentrel Sogeri Koiari (5 milien bilong liklik ol ankontrol liklik na ol riva; na
- Rouna Koiari bilong instalesin o ol samting ol stap long graun (we ol i no bin

kisim gut mani yet). Wota Saplai - K2.5 milien na Jenerata pawa K2.5 milien.

• Loyalti, ol tok olsem gavman peim papagraun bilong wari bilong ol olgeta yia;

• Sirinumu Dam Koiari K500,000 wan yia;

• Sentrel Sogeri Koiari K300,000 wan yia; na

• Rouna Koiari K300,000 wan yia; • Infrastraksa;

• Sabsidais olgeta infrastraksa developmen insait long olgeta Koiari eria;

• Edukesen, helt, rot, wata saplai na pawa i go long ol wan wan hauslain;

• Agrikalsa: promotim agrikalsa skim insait long Koiari we em klostu long Pot Mosbi maket na ples em gutpela long planim planti ol gutpela kropps;

• Koiari mas gat distrik bilong em yet na kamapim nupela ileksen bilong em yet bipo 2002.

• Pravitaisesen: sapos stet em laik pravitaisim ol nesanel asets insait long Koiari eria, ol papagraun laik wok wantaim ol assets na risos bilong ol olsem:

• Sirinumu dam; • Rouna Hydro scheme; • Mt Eriama Water Planti;

• Mt Lawes na ol arapela sab ripita stesins long Koiari eria.

• Sirinumu Dam royaltis: Pipel laik Stet tokim olsem Papua Niugini putim bek royalti pemen bilong ol Sirinumu Dam Koiari gen, we ol bin stapim long 1998.

Na Papua Niugini Elcom tu apim baset bilong em i go antap K2 milien na i no daun long K1.6 milien wan yia.

• Eilogo/Ninoo stabex fans: I SIDCO askim stet tokim Moi Avei Sirinumu Developmen Kampani; Eilogo/Ninoo plentesin Stabex fans hariap.

## Kiunga pipel i no kisim na salim pas

HELEN REI i raitim

Ol pipel long Kiunga na ol narapela hap bilong Westen provins i no bin save kisim o salim ol leta na pas bilong ol i go i kam inap tripela wik nau.

Ol ripot i kam long Kiunga i tok olsem PNG Airlines balus husat i save kisim ol pas i go long Kiunga i stapim ol sevis bilong em long karim ol pas long wanem Post PNG i no bin peim ol bil bilong em wantaim balus.

Ripot i tok narapela we ol yusim long salim ol pas em long salim ol leta long meil beg i go long Mt Hagen na long Mt Hagen Mission

Aviation Fellowship (MAF) i save kisim i go long Tabubil. Post PNG i save haiaim ol kar long kisim ol leta i go long Kiunga em mak long 136 kilomita rot na i save kisim 6 haua olgeta.

Ol ripot i kam long Kiunga i tokout olsem planti lain i kisim taim tru long wanem sampela leta ol i save laikim long go hariap long lain wantok bilong ol i no save go long wanem em i save kisim planti taim tru.

Nupela we bilong salim long MAF tu i no wok gut long wanem MAF i save flai i go long Kiunga wanpela taim tasol long olgeta wik.

Ol lain long Kiunga i stat long salim ol pas bilong ol

wantaim ol laini husat i save go kam long Pot Mosbi long wanem ol i lukim olsem dispela we em ol lain i save kisim pas bilong ol i go hariap moa winim taim ol i bai wetim MAF.

Ol pipel long Kiunga i nidim tru dispela sevis na sapos ol atoriti i no hariap long stapim dispela bai ol pipel i kisim bikpela hevi tru.

Post PNG i gat planti dinau wantaim PNG Airlines olsem na balus kampani i tok nogat long go het long karim ol pas bilong ol lain long Kiunga olsem na ol i mas wet inap dispela samting em ol i stretim bipo long ol sevis i ken ran gut long olgeta hap long kantri.



### Balus lain wet yet

• Ol opisal bilong Sivel Eviesen Wokas Yunien wantaim Minista bilong ol John Tekwie long wanpela bung las mun. Ol i bin askim gavman long peim sampela mani bilong wok ol i mekim pinis. Ol yunien mausman i tok ol i wetim yet bekim long ministal. Ol i tok olsem hevi namel long sumatin bilong UPNG mekim na ol iwet yet. Foto: PEKU, PILIMBO.

**BOROKO FOODWORLD AT GORDONS**

*Groseri Spesol*

**Ol Spesol bilong dispela Wik!**

**Butsa Shop Spesol!**

Roots Rice 1kg	K1.49	Lamb Shoulder Chops A Grade per kg	K8.99
National No Tea Bag 25s	K1.10	Lamb Shoulder Chops Budget per kg	K5.99
Pine O Clean 500ml	K4.33	Saveloys per kg	K5.49
Cold Power 200gr	K1.57	Beef Sausages per kg	K6.95
Tulip Supa Pork 170gr	K2.15	Pork Sausages per kg	K6.95
Sunshine Milk Soft with free pencil case 2x200gr	K3.75		
Bluebird Sardines in Oil 425gr	K1.98		
Cont. Chicken Noodle Soup 45gr	K1.44		
Hiway Beef Biscuit 125gr	K0.62		
Symbol Soy Sauce 250ml	K0.98		
Heinz Tomato Sauce 300ml	K1.88		

**EXTENDED TRADING HOURS**

Monday to Wednesday - 8.00am to 7.30pm

Thursday / Friday - 8.00am to 8.00pm

Saturday / Sunday - 8.00am to 7.00pm

**Hamamas na baim kaikai long Boroko Foodworld Gordons!**

Planti moa kaikai prais i go daun long en!

Ph: 325 7566, 325 7310 Fax: 325 7096



# HAILANS NUIS



## Wara saplai bilong Kapal Haus bagarap

**HILDA WAYNE i raitim**

Provinsal gavman opis long Maunt Hagen, Kapal Haus i no bin gat wara long las wik i kam inap nau na wokman bilong Watabod i wok nau yet long stretim dispela hevi.

Ol ripot i kam long Wata Bod long Hagen i tok dispela hevi i bin stat long Sarere las wik na graun

flo na pes flo bilong Kapal Haus i kisim wara tasol namba tri flo i no bin kisim wara long las wik i kam nau.

Ol wok lain bilong Edukesen Dipatmen na ol narapela dipatmen nabaut i lusim wok long Mandé na Tunde long wetim wok long stretim dispela samting.

Plantil ol pablik sevan i no go long wok long wanem ples bilong

wok i no gutpela taim nogat wara long yusim long toilet.

Ol lain long Wata Bod i tok olsem dispela hevi i kamap bikos pamp bilong pamim wara i go antap long namba tri flo i no pamim wara strong tumas. Wara presa i wok long daun tru na dispela i mekim na nogat wara i go antap olgeta.

Ol i tok ol wok lain bilong Wata

Bod i stat wok long dispela tasol ol i no save bai wanem taim ol i ken stretim dispela hevi.

Ol opisa bilong Wata Bod i tok ol i no katim wara na ol i wok yet long stretim dispela samting.

Long Mandé planti pablik sevan long Kapal Haus husat i gat opis bilong ol long antap flo i no bin go long wok na long Tunde tu wankain samting i bin kamap.

Sapos dispela hevi ol i isi yet long stretim bai planti pipel i ken wet long taim ol i laik go lukim ol pablik sevan long kisim kain sevis long gavman opis.

Dispela hevi em i save kamap planti taim bipo tasol problem bilong kisim nupela pamp i wok long mekim ol lain isi isi long stapim dispela hevi.

## Rot bagarap na Tambul pipel kisim taim

ROT riamel long Tabul distrik na Maunt Hagen siti long Westen Hailans provins i bagarap na ol pipel i kisim taim stret

Ol pipel long Tambul i save mekim planti hat wok long groim ol gutpela gaden kaikai olsem kaukau, potato, kabis, brokoli, kerot, onion, kumu na ol narapela planti moa gutpela kaikai.

Bikpela saplai bilong kaikai i kam long Hagen siti maket i save kam long Tambul.

Tasol long karim dispela kaikai i kam long bikpela maket i hat tru long wanem rot bilong ol ka i go kam long ol viles long Tambul i bagarap nogut tru.

Plantil viles lain manmeri i komplek olsem ol i nogat narapela rot long bihainim na ol i stap wet yet.

Nau ol pipel i hat wok tru long yusim rot we i bagarap nogut tru na i hat long ol pipel kisim kaikai bilong ol i go long maket.

Ol pipel i no klia husat bai stretim dispela rot hevi bilong ol na ol i ken salim wanem kain kaikai ol i hatwok na groim long gaden.

Nogat narapela kes krop o maining wok i save kaniapim mani bilong Tambul na hatwok bilong ol olsem fama long mekim gaden i save karim mani i kam insait long distrik.

Sapos nogat wanpela wok i kamap bilong stretim dispela rot, ol pipel bai nogat maket na inap stap long wok gaden bilong ol.

Gutpela rot inap helpim ol dispela manmeri bikos planti man bilong dispela eria i gat bisnis na ol samting we i kamap long hatwok bilong ol long gaden tasol.

Hat wok bilong planti liklik pipel long dispela distrik na kantri i gat planti man i wok long ol bikpela opis long kantri. Minista bilong Praivetaisesen na wanpela sinia memba bilong gavman Vincent Auail i bilong Tambul tu.

Gavman i mas helpim ol dispela pipel husat laik helpim ol yet na stretim dispela rot hariap bai ol pipel i ken salim wanem samting ol i groim.

Ol pipel long Tambul i save kisim taim long ol sevis olsem sevis skul, edpos, pawa na rot we gavman inap givim.

Rot em wanpela bikpeal samting long ol pipel i ken kisim ol dispela kain sevis long eria bilong ol.

Developmen inap kamap sapos olgeta manmeri i wok olsem ol Tambul pipel tasol nogat helpim i kam long gavman long stretim hevi bilong ol.

# ENROL NAU



## TOK SAVE I GO LONG OL PIPEL BILONG ENGA, SIMBU, ISTEN, SAUTEN NA WESTEN HAILANS

Ilektorol Komisin bai i kam long ples bilong yu stat long mun Julai i go inap long mun Ogus long dispela yia 2001.

Sapos yu laik vot long 2002 ileksen, nem bilong yu i mas stap insait long buk ol i kolim Komon Rol. Taim ol lain bilong Ilektorol Komisin i kam lukim yu, yu mas stretim gut toktok bilong yu long Komon Rol.

Sapos krismas bilong yu i 18 o krismas bilong yu i abrusim pinis 18 yia, yu ken putim nem bilong yu insait long Komon Rol taim yu filim Enrolmen Fom.

Ol pipel bai bilip olsem ileksen bilong Papua Niugini i fea na gutpela sapos Komon Rol i stret na i no rong.

**Tingim Gut! Lo i tok Yu Mas Enroll!**




**ELECTORAL  
COMMISSION**  
Papua New Guinea

SAPOS YU I NO KLIA GUT LONG WOK BILONG ENROLMEN, RINGIM OL DISPELA TELEFON NAMBA:  
SAUTEN HAILANS PH. 549 1378 · ENGA PH. 547 1144 · WESTEN HAILANS PH. 542 2349  
SIMBU PH. 735 1204 · ISTEN HAILANS PH. 732 1151

Toktok i kam long Papua Niugini Ilektorol Komisin



# MADANG NIUS



## Madang plis bai sekim ol setelmen lain

**PAULUS TALI i raitim**

MADANG plis bai go het long painimaut sapos ol setelmen lain we ol i bin muvim long taim ol i bin rausim ol long setelmen las tupela mun i go pinis.

Sampela pipel i no harim toktok na i wok long traime long go bek long setelmen eria em ol i bin rausim ol long en.

Provinsal gavman i gat ol gutpela plen long developmen i mas go insait long provins tasol ol setelmen i wok long stapim dispela.

Sinia plis Inspekta James Kupi i tok moa olsem dispela i bihainim tasol eviksen eksasais we i bin kamap pinis nau i stap long pes 2.

Em i tok ol i mekim dispela long bihainim na luksave long wanem samting ol lain husat ol i bin muvim i mekim wanem long taim ol i lusim setelmen.

Mista Kupi i tok moa olsem ol setelmen lain we ol i bin rausim ol i mas go bek long as ples bilong ol na husat man o meri i les long lusim Madang na go bek long ples bilong ol em kot yet i bai ol i kisim go long kot na kot bai stretim.

## 40 manmeri gat sik AIDS long Madang

**BEN TAUMAI i raitim**

SIAMAN bilong Helt long Madang provins Kingsley Yomybom i tokim Madang Provinsal Asembli olsem provins nau i gat 40 pipel wantaim dispela sik nogut ol i kolim AIDS.

Mista Yomybom i mekim dispela toktok taim em i tokaut long pepa bilong em long toksave long Asembli olsem ol i sanapim pinis Provinsal AIDS Komiti bihainim lo bilong Nesenel AIDS Kausnil Ekt 1997 seksen16.

Em i tok long Januari 2000 i kam inap long pinis bilong yia i bin gat 12-pela manmeri moa i kisim dispela sik nogut, tasol namba i ken go bikpela sapos ol i no kamap long haus sik long kisim blut bilong ol na sekim.

Yu Inap kisim dispela sik

sapos yu pamuk wantaim wanpela man o meri husat i gat dispela sik, em i tok.

Siaman Yomybom i tokaut olsem Provinsal AIDS Kausnil nau i wok klostu wantaim Nesenel AIDS Komiti long traime daunim na stapim dispela sik long i no ken go bikpela moa long provins. Komiti tu bai helpim tu long sait bilong sosel na ekonomik na tu long rait bilong wanwan man na meri na pikinini tu.

Ol komiti memba em Provinsal Edministreta Clant Alok olsem siaman na ol arapela memba em Augustine Dungstan, Markus Kachau, Bill Sei, Joe Bade, Otto Ovorosi, Geo Gedabing, John Levi, Dokta Steven Demok, George Chapok, Sista Eleen Kavang, Don Kudan, Sista Ann Vienzens, Ed Anderson, Reveren Paulus Moi, Nick Powell na Ms Maureen Hill.

## Presiden askim asembli long pasim Infomesen Opis

PRESIDEN bilong Astrolobi Bei Lokol Gavman Garry Kulonga i tokim Madang Provinsal Asembli olsem i moa gutpela olsem ol mas pasin Infomesen Opis.

Dispela em bikos em tok Opis i no mekim wok na ol wok long stap nating na kisim pe nating nating long olgeta potnait.

Em i tok, long dispela as i moa gutpela long gavman long pasin daun dispela opis long serim K60,000 bilong ol pipel bilong Madang na fandim ol arapela developmen projek long ol bus ples long provins we bai helpim na stretim sindaun bilong ol pipel long ples.

Mista Kujonga i tok,

dispela wankain askim olsem bin kamap long 10-pela yia i go pinis taim olpela prima Andrew Ariako i bin askim.

Long sem taim em i tok opis i no gat mausman long PEC, olsem

na sia mas luksave nau na rausim dispela opis. Ekting Gavana Pengau Nengo i tok, opis bilong Infomesen i stat bipo yet long olpela Nesenel Gavman plen, na sia bai lukluk long em.

## Ol Sumkar kendidet kisim tok lukaut long Distrik Edministreta

**FUZO PAUL i raitim**

SUMKAR Distrik Edministreta i putimaut wanpela strongpelea tok lukaut igo long olgeta pablik sev-ens, ol kausnila, ol kendidet lain na olgeta pablik long noken statim kempen bilong 2002 nesenel ileksen yet bikos kempen taim i no stat yet.

Insait long wanpela notis pepa we i bin kamaut long opis bilong Sumkar Distrik Edministreta long Me 24, 2001 i tok lukaut olsem olgeta kendidet husat bai resis long 2002 ileksen i noken statim yet kempen baim Gavana Jenerel i no sainim pepa bilong kempen i op yet.

Insait long dispela notis pepa Alung Wang i tokaut olsem ol kendidet i mas lukaut long wanem samting ol i tokaut o mekim bikos ol inap long sanap long kot sapos ol i no bihainim lo bilong lektorel Komisin.

Mista Alung i tokaut olsem i gat ol komplek i kamap pinis long opis bilong em olsem sampela kendidet i statim kempen bilong ol hait raun i stap na tu ol i wok long tromol ol kainkain toktok salens long ol arapela kendidet na tu i wok long tromol mani long baim kaikai long grisim ol manmeri.

Mista Alung i tok ol dispela kain pais em i no stret aninit long Kriminal Kod na Ogenik Lo bilong Nesenel na Provinsal Gavman ileksen bikos dispela i egensim tru pasin bilong fridom na stretpela ileksen.

Em i givim strongpela tok lukaut olsem Kot bai mekim save long husat i wok long givim mani long baim kaikai na ol samting long grisim ol manmeri long vot na tu i wok long mekim giaman toktok egensim ol arapela kendidet o mekim toktok long radio na niuspepa we i nogat nem bilong ol long en o kempen klostu long poling but na eria bilong vot, Mista Alung i tok.

Dispela toksave i go aut pinis long ol plisman long karimaut na lo bai mekimsave long husat kendidet i brukim dispela toksave bilong Distrik Edministreta.

## Lo bilong pipia i no wok stret long taun

PASIN ol sekuriti bilong Madang Eben Taun Kausnil i save mekim long i no save holim ol save lain bilong ol husat i save brukim lo em i no gutpela.

Presiden bilong Astrolobi Bei Garry Kulonga mekim dispel toktok insait long asembli bilong Madang Provinsal Asembli tupela i go pinis.

Mista Kujonga i tok, em harim na lukim planti taim pinis ol sekuriti bilong MUTC i no save holim ol save pes husat save i stap long taun na brukim Litarung Lo long kaikai buai na tromol ol pipia nabaut.

Tasol ol save strong moa yet long holim ol lapun man o meri husat i kam long ples long maket o wokim ol sampela bisnis.

Em askim siaman bilong Lo na Oda na tu taun Meya Steven Amanasik long luksave long dispela na traime stretim bikos em tok Madang taun em bilong olgeta manmeri bilong dispela provins na



• Memba bilong Raikos na siaman bilong Edukesen Fainens na Plening long Madang Stahl Musa i tok long skol subsidi.

olgeta gat olgeta rait long muv raun na mekim ol bisnis long laik bilong ol.

Dispela lo ya em ol polis tu nau i no helpim ol sekuriti na planti ol manmeri nau save slip long fran bilong ol stoa.

Pasin ya i no save kamap bipo taim tupela olpela bos bilong plis long provins i stap.

Siaman bilong Edukesen Fainens na Plening Stahl Musa i kamapim pes kwata ripot bilong 2001 Nesenel Gavman Skol Subsidi na kontrak bilong besik teks buk na steseneri long Madang provinsal asembli long Mande.

Em i mekim dispela ripot long tok kila long asembli bihainim wanpela bel hevi we bin kamap long mun Februari long dispela yia we sampela ol tisa na skol bod long taun eria bin kamapim.

Musa givim ripot bilong em na tok olsem long pes kwata subsidi we edukesen Minista Profesa John Waiko i givim long provins, provinsal gavman i yusim narapela tingting long baim balk besik skol material bilong ol praimer komyuniti na elementri skol long provins we i kostim K282,466 14.

Na ol Sekendari Hai na

Vokesenel Skul i kisim sek mani bilong ol yet long baim ol meteriel long laik bilong ol yet.

As bilong dispela bikos long bipo ol sampela ol skul i no save soim ol rekot bilong mani ol i yusim. Sampela skul no save i gat inap mani long baim trenspot we i bikpela hevi bilong ol skuls long long-we ples na dispela ol skul i save peim moa long rot na i no gat inap meteriels bilong ol sumatin long yusim long skul.

Na long sem taim ol het-masta na tisa i save lusim skul long skul taim long ol i kam long taun.

I no dispela tasol, sampela taim ol westim mani nabaut.

Long dispela ol as gavman i no laikim na givim kontrak long kontraka long liklik prais long kamapim ol gutpela skul buk na meteriels long planti bilong ol sumatin bilong yumi long Madang long yusim na kisim sevis em bikpela laik bilong dispela gamvan siaman, Musa i tok.

I GAT GENSET, AIS BOKIS NA ESKI KULA LONG WINIM

# WINIM

WEEK EIGHT WINNERS  
6TH DRAW 18 07 01

**Flame**  
Strength & Energy

**GENERATOR SET**  
LARI NAMBIA TICKET  
5391587

**CHEST FREEZER**  
LARI NAMBIA TICKET  
5272400  
5254568  
5319081

**ESKI KULAS**  
LARI NAMBIA TICKET

5407777	5446608
0176358	0860351
5403188	5350811
0333612	0808348
5362577	5332623
0465249	0757638
5460632	5032250
0571324	5034312
5484888	5099202
0914620	5118040


**WINNERS CONTACT GFI OFFICES:**

PORT MORESBY PH: 320 2260 - LAE PH: 475 7066  
 MT. HAGEN PH: 545 1570 - GOROKA PH: 732 3213  
 RABAU PH: 982 9209 - BUKA PH: 973 9141  
 MADANG PH: 852 1622 - WEWAK PH: 856 1708  
 ALOTAU PH: 641 0472 - KIMBE PH: 983 4907  
 POPONDETTA PH: 329 7366





# Lae Nius



## VAT kot bilong Morobe Gavman i kamap

### YAKAM KELO i raitim

MOROBE Provinsal Gavman i go long Kot nau long salensim Nesenel Gavman long lo bilong takis we i sut long Velu Eded Takis (VAT).

Morobe Gavana Luther Wenge i tokaut olsem ol i redi tru long kamapim dispela kot long Suprim Kot long dispela wik tasol loya bilong Gavman tasol i no bin redi. Tasol Mista Wenge i tok wok bilong ol long redim olgeta ripot na ol toktok bilong ol save man bilong dispela samting i pinis na ol i redi long dispela kot long kamap.

Mista Wenge i tokim Wantok olsem pasin ol loya bilong Gavman bilong mekim long i no redi long kamapim kot i no gutpela na trupela pasin. Ating ol i mekim olsem long giaman

surukim surukim kot i go long-pela.

Mista Wenge i tok 10-pela saveman i givim ripot bilong ol pinis na tu wanpela bikman bilong Nesenel Rises Institut (NRI) i raitim ripot bilong em pinis long dispela Morobe Gavman i ken soim long dispela kot bilong Velu Eded Takis.

Sief Jas Sir Arnold Amet i hatim ol loya bilong Gavman long ol i mas redim ol yet gut na kam bek long Fraide tumoro na tokaut sapos ol i redi long salensim dispela kot Morobe Provinsal Gavman i kamapim.

Loya bilong Morobe Provinsal Gavman, Alfred Manase i tokim Kot olsem olgeta pepa na ol ripot bilong ol i redi pinis na ol i bin givim ol pepa igo pinis long ol loya bilong Gavman long mun Jun yet long lukim.

Dispela kot bilong VAT bai inap kamap long mun Oktoba sapos

Sief Jas Sir Arnold Amet i harim wanem samting ol loya bilong Gavman bai toktok long em tumoro.

Gavana Luther Wenge i tok em i ting bai ol loya bilong Gavman i redi long Tunde dispela wik bai Jas inap makim taim long mun Ogos long kamapim kot.

Dispela em kot bilong VAT we Morobe Gavman i egensim na i bin kamapim planti bikpela fan resising na kempen long pulim mani bilong salensim Nesenel Gavman long kot long stapim VAT long i no ken kamap.

VAT lo i kamap pinis na nau olgeta samting yumi baim long stua i gat 10-pesen (%) takis i stap antap long ol.

Dispela kot tu inap testim tu sapos lo bilong VAT-em i stret ol i mas senisim sampela ol Palamen i mas rausim.

## Wenge, Saonu na Nakalip amamas long Seko viles kot

GUTPELA viles kot sistem bai kamap long Seko Lokol Level Gavman kaunsil eria long Kabwum distrik bihain long ol opisa olsem viles mejistret, pis opisa na ol kot klak i bin pinisim tupela wik kos bilong ol stat long Julai 9 na pinis long Julai 20, 2001. Dispela kos i bin kamap long ples Kambuk we Provinsal viles kot opisa Dick Dikori i ronim.

Gavana bilong Morobe Luther Wenge wantaim memba bilong Kabwum Ginson Saonu na Seko kaunsil presiden Giukta Nakalip i bin raun long wanpela wok bung bilong ol na kamap bungim dispela kos.

Memba Ginson Saonu i tokim ol kos lain ya olsem ples nau i gat tripela han bilong gavman i wok pinis. Ol dispela tripela han bilong gavman em Lejislativ, Eksekutiv na Judiseri. Na dispela ya i strongim na kirapim Judiseri han bilong gavman long wok gut insait long ol ples.

Mista Saonu i tokim ol dispela lain long ol i mas wok bung gut

wantaim famili na ol wantok bilong ol yet pastaim bai ol arapela i ken lukim na bilip long wok bilong ol.

Gavana Luther Wenge i tok em i bilip long wok bilong viles kot bikos kantri bilong yumi PNG i gat moa manmeri i stap long ples na ol i save lukautim ol yet na stap long ples.

Mista Wenge i tokim kos lain ya olsem sapos ol i lain bilong kros pait na bikhet, ol i mas senisim dispela pasin pastaim long ol i ken statim wok bilong ol.

Presiden Giukta Nakalip i tok amamas long tupela lida long kam long kaunsil eria bilong em. Na em i tok dispela kain rot tasol bai pipel i ken lukim helpim na senis i kam taim ol lida i kam wantaim na bungim pipel.

Lida bilong ples Kambuk Mista Gima i amamas long lukim Gavana, memba na presiden i kam wantaim na em i tok kain wokabaut wantaim olsem i gutpela tru long rot na pasin bilong ol lida i wok bung wantaim bilong sevim ol pipel bilong ol.

## Bulolo yut na komyuniti wok bung wantaim

BULOLO Taun ausait tasol long Lae siti nau i wok long lukim ol gutpela senis we ol manmeri i amamas nau long wok bung wantaim Bulolo plis long daunim hevi bilong raskol na ol trabel insait long taun na komyuniti.

Bos bilong Plis long Bulolo taun Joe Noah i tokaut olsem gutpela senis i wok long kamap insait long taun we i lukim komyuniti na plis i wok bung wantaim long lukautim gut komyuniti. Na dispela i mekim ol manmeri i pilim gutpela long sindaun bilong ol.

Wanpela bikpela lotu o krused i bin kamap tu long las wik we i bungim ol manmeri wantaim long amamas na lotu wantaim.

Mista Noah i tok nau yet ol yut long Bulolo i save mekim awenes long maket eria long noken tromoi pipia nabaut long maket na

long Bulolo taun. Sas bilong tromoi pipia em K5.00. Sampela bilong ol dispela yut husat i daunim ol yet na laik wok long helpim komyuniti em ol trabel manki tasol nau ol i senisim pasin na i laik helpim komyuniti.

Mista Noah i tok olsem nau hevi bilong lo na oda i go daun na em i ting dispela gutpela wok bilong ol yut na komyuniti bai go het yet na bai lo na oda hevi bai go daun olgeta long Bulolo taun.

Mista Noah i tok planti krismas i go pinis Bulolo taun i no senis olsem tude bikos long planti bikhet pasin na tu ol manmeri i save tromoi pipia nabaut long rot na bagarapim ples. Tasol nau senis i kamap na em i tok bikpela tenkyu i go long olgeta komyuniti na ol yut long wok klostu wantaim narapela narapela long

kamapim dispela senis long taun.

Plantu ol bikhet manki tu i senisim pasin bilong ol na go long-lotu na dispela em wanpela bikpela senis, Mista Noah i tokaut.

Em i tok kain gutpela senis olsem i ken kamapim ol gutpela senis long taun na komyuniti we ol bisnis tu i ken wok gut na kamapim moa bisnis insait long taun.

Bulolo Edministreta Bart Ipambonj i tokaut tu olsem long pinis bilong olgeta mun ol Lokol Level Gavman Kaunsil presiden wantaim ol viles kot opisa, ol yut na ol plisman i save bung na kamapim ripot long wok bung bilong ol.

Distrik Edministreta i tok em i lukim kain pasin olsem i gutpela tru na em i laik lukim i go moa yet.



• (Namel) Gavana Luther Wenge na Seko Presiden Guikta Nakalip i sanap wantaim ol viles kot na ol kuskus bilong Seko Kaunsil eria long Kabwum.

## Bikman askim Bulolo pipel long noken pundaun long gris

PASIN bilong politiks kempen i wok long kamap ples klia irsait long Wau Bulolo ilektoret nau olsem na ol pipel i mas lukaut gut long ol pasin gris na mauswara sampela kendidet bai kamapim, wanpela bikman bilong Bulolo eria i tokaut.

Bikman ya i no laik autim nem bilong em, tasol em i lukim nogut long kain pasin bilong strongpela gris pasin ol kendidet i wok long mekim wantaim mani na kago na ol mauswara toktok long pulim bel bilong ol manmeri long votim ol neks ya.

Bikman ya i tok ileksen i no nupela samt-

inglong ol pipel bilong Wau Bulolo olsem na ol kendidet i no ken kilim skin long kainkain stail na pasin bilong pulim vot. Ol pipel i save long vot na ol yet i save skelim man long save na tingting bilong ol na makim ol.

Em i tok Bulolo ilektoret i save kamapim gutpela ileksen long bipo i kam na i no save gat ol trabel na bikhet pasin i kamap. Ol manmeri i save go isi tasol long laik na makim husat kendidet ol i laikim. Olsem na ol kendidet i no ken pusim ol yet tumas.

Bikman ya i tok ol kendidet i mas lukaut

tu bikos Gavana Jenerel i no tokaut yet long ileksen i op rit i open. Olsem na olgeta kendidet i mas stap isi na stretim ol tingting na rot bilong ol tasol i stap inap long taim bilong mekim nois tru orait ol i ken kam aut na soim pes na mipela i ken harim toktok bilong ol. Nogut ol i abrus na mekim samting krangki na ol i slip long rumgat na nogat ileksen bilong ol, em i tok.

Bikman ya i singaut tu long ol pipel long noken seksek na kirap nogut long wanem kain stail na gutpela samting ol kendidet i wok long givim ol tude. Kisim na kaikai bikos em taim bilong kisim sampela liklik

presen nau. Taim ileksen i pinis, yu no inap lukim kain presen olsem moa, em i tok.

Em i tok tude, Mumeng, Bulolo na Wau eria i kamapim planti save manmeri na ol bai kamap lida bilong yumi. Olsem na ol mipela ol papamama na ol lain bilong ples i mas glasim wanem pikinini tru yumi laik sanapim long dispela taim. Sapos pipel i laikim olpela memba i sanap yet, em laik bilong pipel. Sapos pipel i laikim senis, em tu laik bilong pipel yet, tasol mipela i mas senisim gutpela lida we em i ken harim tok na mekim samting we i sut long laik na tingting bilong yumi ol ples manmeri.

# ELC-PNG meri holim bikpela bung long Madang

PAULUS TALI i raitim

OL MERI bilong Evanjelikel Luteran Sios ov Papua Niugini (ELC-PNG) bilong Dinekpain i holim wanpela konferens long dispela wik long Fulumu kongrigesen long Amele seket long Madang provins.

Dinekpain em i nem bilong ol grup bilong ol meri insait long Madang distrik na konferens bai kamap long dispela hap.

Konferens i stat long Mande long dispela wik na bai pinis long tumoro Fraide, Julai 20.

As tingting bilong dispela konferens i long bungim ol meri long toktok long ol Dinekpain ogenaisesen long olgeta liklik distrik, seket na kongrigesen level.

Kodineta bilong ELCPNG women's grup Hilda Gunar i tok dispela bung bai lukim ol meri long 8-pela seket olgeta long Madang i kam na bung.

Misis Gunar i tok ol toktok bai ol i mekim long dispela bung bai helpim ol meri long kisim gutpela save long ol kain pasin ol i mas mekim long komyuniti.

Em i tok ol meri i mas traim long kisim planti save long dispela taim na lukim olsem dispela kain taim

bilong bung em taim bilong ol meri i luksave long wanpela na narapela na kisim helpim.

Misis Gunar i tok ol meri i mas traim long helpim na mekim dispela konferens i kamap gutpela.

Em i tok ELC-PNG long distrik level i save painim planti hevi tru long sait bilong mani na em i askim ol meri wok strong yet na sios i mas go het yet long eria bilong ol.

Misis Gunar i tok ol meri i mas wok bung long helpim long stretim ol wari na hevi i kamap long sios.

Las yia Dinekpain konferens ol i bin holim long Usino long apa Ramu eria na long dispela yia ol meri long Amele i holim dispela bikpela bung.

# Miting bai lukluk long makim nupela Bisop

HELEN REI i raitim

OLGETA provinsal kaunsil memba bilong olgeta Angliken Sios long PNG bai bung long Lae dispela wik na kamapim wanpela bikpela miting bilong ol.

Ol i bai toktok long planti samting tasol wanpela samting ol i bai toktok moa long em em ileksen bilong nupela bisop bilong Pot Mosbi Angliken Daiosis.

Pot Mosbi Daiosis i no bin gat bisop moa long sikpela mun olgeta taim Bisop Michael Hough i bin lusim na go las yia Disemba.

Pater Patrick Doulin archdeacon bilong Pot Mosbi Daiosis i tok ol i bai singautim wanpela komiti we i bai gat 8-pela memba bilong wanwan daiosis na 10-pela bilong ol narapela daiosis bai kam bung long dispela miting.

Angliken Sios ov Papua Niugini (ACPNG) i save bung tupela taim long olgeta yia na bung bilong ol long dispela yia em-pes wan bilong dispela yia. Narapela miting bilong dispela yia bai kamap long Novemba.

Long narapela stori Pot Mosbi daiosis bai amamasim Santu Lawrence Day long Agus 5 na bai ol i makim wanpela pater na tripela diken.

Nupela pater oi bai makim long dispela de em John Madigabuni. Tripela diken em Ken Ono, Nigel Sirigoi na Paulus Gerari na olgeta bilong ol peris long Mosbi.

Asbisop James Ayong bai go pas long makim dispela de.

Dispela em i de bilong makim pes Angliken misinari i bin kam long Kaieta long Milen Be provins na planti samting bai kamap long amamasim dispela de.

Long mun Agus bai wanpela sekretari bilong Angliken Bod ov Misens long Australia bai kam raun lukim PNG.

Nem bilong meri em Colleen Hodge na bai em i kam long Pot Mosbi na stap foapela de bipo long em go raun lukim ol sios insait long kantri.

Bikpela sios long Australia i save helpim sios long PNG na Misis Hodge bai kam raun long lukim wanem kain ol developmen i kamap long olgeta sios long PNG.



Amamas bilong kalabus • Kalabus man long Bomana Sel i so-op wantaim ol nupela T'Slot ol i bin long bos bilong Eda Ranu long dispela wk. Ol i bai werim ol siot long lonsim nupela kaset bilong ol. Foto: IVAN BAYAGAU

# Sios helpim ol yet long wokim nupela haus lotu

SAMPELA sios lain long Isten Hailans i luksave olsem planti samting em yu noken wetim gavman long mekim tasol yu mas traim long helpim yu yet.

Olgeta samting i save kamap long mani na sapos yu nogat mani yu mas wok hat na kisim o nogat sapos yu stap nating bai nogat senis i kamap we yu laikim long em.

Ol lotu lain bilong Unaitet Pentikostol Sios long Lufa, Isten Hailans i luksave olsem ol i mas helpim ol yet long wokim wanpela sios bihain long ol i bin holim lotu bilong ol na i nogat haus lotu i sanap.

Ol i tingting i go na kamap wantaim dispela tingting long mekim mani bilong ol yet na traim planim tapiok long salim na kisim mani.

Ol i mekim wanpela traipela tapiok gaden stret na stat long salim na nau long dispela taim ol i bin kisim moa long K1,000 long wok ol i mekim.

Wantaim dispela mani ol i baim ol kapa na plang long statim haus lotu bilong ol.

Ol i mekim olgeta wok long bildim dispela haus na long las taim tasol ol i opim nupela haus lotu bilong ol na planti ol memba bilong sios long Hagen na olgeta narapela rijen i lusim ples na kam long amamas long opim dispela haus lotu.

Ol i mekim ol kainkain pilai, drama, singsing grup


na lotu long opim nupela haus lotu bilong ol.

Pasta bilong nupela sios Abraham Finde i tok haus lotu bai i no inap sapos ol lotu lain i no bin hat wok long mekim gaden na salim kaikai.


Pasta Finde i tok bipo ol i save lotu ananit long as bilong ol diwai nabaut.

Long taim bilong ren ol i save painim narapela hap long holim lotu bilong ol.

Pasta Finde i tok taim em i lukim olsem ol i kisim taim long mekim lotu em i kisim kot long bel bilong em long mekim wanpela nupela lotu na dispela em i bin mekim na em i amamas tru.



Opim haus lotu • Memba bilong Lufa, Mathias Karani katim rop long opim nupela haus lotu long distrik. Foto: SAPE METTA



**Man i prea long God i helpim em**

Bikpela, mi bel hevi tumas na mi singaut long yu. Bikpela, harim kra i bilong mi. Harim mi singaut long yu helpim mi. Sapos yu kaunim olgeta sin bilong mipela bai husait inap long winim kot bilong yu? Tasol yu save rausim ol sin bilong mipela, olsem na mipela i mas pret long yu. Mi laikim tumas Bikpela i helpim mi, na mi wet long em. Na mi hilip tru long tok bilong en. Mi save wet long Bikpela, na mi laikim tumas bai em i helpim mi. Na dispela em i winim laik bilong ol wasman i save wet long tulait i kamap.

Buk Song 130: 1-6

# Ol meri helpim wan lotu bilong ol

OL LUTEREN meri long Kote Hanta Kompaun insait long Redeemer Peris long Lae i bin go long Mape, Finsafen distrik Morobe provins long kamapim sampela wok wantaim ol wan lotu meri bilong ol bilong Ranijara Luteran Kongrigesen.

Mausmeri bilong grup Ruth Kipasang i tok 46 meri olgeta

i bin go las wiken long kamapim progrem we bai helpim ol meri long Ranijara eria. Dispela progrem i kisim tupela de tasol na ol meri i kam bek gen long Sande.

Misis Kipasang i tok ol meri long Hanta i bin go long Mape long soim ol meri long Mape olsem i gat gutpela wok pren namel long ol meri long sios.

Em i tok Baibel i save tok olsem yumi mas helpim ol lain husat i nogat samting olsem na ol i laik go bihainim dispela toktok.

Las yia long wankain progrem tasol ol meri long Kote Hanta i go long Lebafu Sialum eria na givim K2,000 long helpim ol meri long Lebafu mekim ol wok

bilong ol.

Ol yet i bin mekim we bilong painim trenspot long go long Lebafu em i stap insait long Finsafen.

Misis Kipasang i tok ol meri i save amamas tru long go raun na helpim ol wan lotu bilong ol tasol i gat hevi long baim sip taim ol i laik raun long Luteran Siping.

# Sik daiabitis i bagarapim planti pipel

# Madang laik resis long Mis PNG

**HILDA WAYNE I raitim**

Sik daiabitis i wanpela sik we planti pipel long Papua Niugini i gat tasol ol i no save olsem ol i gat dispela sik.

Wanpela wok painimaut long dispela sik i soim olsem 182,000 manmeri long PNG i gat dispela sik tasol 90 pesen (%) bilong ol dispela lain i nogat wanpela liklik save olsem ol i gat dispela sik. Dispela toktok i kam long Wol Helt Ogenaisesen bihain long ol i bin mekim wanpela wok painimaut long dispela sik long kantri.

Pot Mosbi Jenerel Haus sik i save lukim mak long 35 i go 40 sik lain husat i gat daiabitis long olgeta wik na namba bilong ol lain

husat i wok long kisim dispela sik i wok long go antap yet olgeta wik. Sik daiabitis em sik suga. Planti suga long blut.

Sik daiabitis i save kamap taim man o meri i no save mekim planti eksasais o mekim ol strongpela wok we ol i ken muvim bodi na narapela as ol i save kisim sik hariap em taim ol i no kisim gutpela kaikai bilong bodi. Sapos yu pat nogut tru bai isi long yu kisim dispela sik tu.

Taim man o meri i kisim daiabitis ol i ken kisim sik long het ol i save kolim strok, ai bilong ol i ken bagarap, lewa bilong ol i save stap o hat atek, kidni i save bagarap na blut i no save ron gut long olgeta hap bilong bodi.

Taim yu lukim ai na

kidni i stat long bagarap na blut i no ron gut long olgeta hap bilong bodi em i soim olsem yu gat daiabitis.

Dispela sik i save kamap taim yumi no lukautim bodi bilong yumi yet gut na ol namba bilong suga insait long bodi i wok long go bikpela tru.

Daiabitis i no save kauntim yu yangpela o lapun manmeri. Em i ken kamap long husat yu no tingting gut long we yu lukautim bodi bilong yumi wanwan.

Wanpela nes husat i save go pas long mekim ol wok painimaut long ol sik long PNG Jessica Lesley i tok taim wanpela man o meri i kisim dispela sik bai sik i stap wantaim em long olgeta taim em i stap laip.

Misis Lesley i tok planti man na meri i

mas luksave long dispela sik na tingting gut long laip bilong ol na lukautim ol yet gut.

Em i tok kain kaikai olsem skin bilong kakaruk na ol gris bilong ol kain kuk mit i no gutpela na i ken kamapim daiabitis.

Planti i save tingting long kaikai gris bilong kakaruk o pik na bihain dring planti bia o ti tasol ol i no save olsem bel i pulap long kaikai tasol sik i ken kamap tu.

Misis Lesley i tok planti manmeri i wok long kisim dispela sik olsem na yumi mas save long we bilong dispela sik i save kamap na noken larim sik i bagarapim yumi.

Long Westen Pasifik Rijen PNG em i kamap namba tu long ol manmeri i save kisim dispela sik.

**BEN TAUMAI I raitim**

**BOS bilong Red Cross long Madang Maureen Hill i singaut long olgeta komyuniti long Madang long kam na sapotim wanpela meri ol i makim long sanap resis long Mis PNG resis bilong dispela yia.**

Meri ya i mekim dispela toktok taim em i tokaut olsem Madang bai sanapim wanpela meri long stap insait long resis bilong Mis PNG long dispela yia. Em i tokaut long nem bilong dispela meri em Cathy Angu, krismas bilong em 21 na em i save wok wantaim Lae Builders kampani. Samba ov Komes na Industri bai sponsarim em.

Mis Hill i tok dis-

pela em namba 5 taim Madang i sanapim wanpela meri long go insait long dispela resis bilong Mis PNG Kwes na olsem em i singaut long olgeta komyuniti bilong Madang long kam na givim ful sapot long strongim dispela meri long dispela resis bikos dispela em bilong gutpela wok.

Mis Hill i tok em i no laik tokaut long wanem hap em Mis Angu i kam long en tasol bikpela samting em meri ya i bilong Papua Niugini na em i askim long sapot bilong olgeta lain long komyuniti long Madang.

Madang Red Cross i bin mekim planti wok long helpim ol manmeri insait na ausait long provins tasol long nau yet ol i nogat opis bilong

putim ol samting ol i gat long en. Olsem na em i tok wanem mani ol i kamapim long dispela yia bai go long wokim nupela opis na stua rum bilong ol.

Em i tok long nau yet ol i nogat stua rum long putim olgeta masin na ol samting bilong wok long en olsem na sapos ol i ken mekim mani long dispela yia, ol bai wokim opis bilong ol bikos nau yet ol i gat wanpela graun pinis bilong sanapim opis long en.

Mis Hill i tok ol bai statim namba wan fan reising bilong ol long dispela wik Fraide na ol i makim pinis ol komiti we Bill Hughes na Lee Wellington bai i go pas long en.

# PNGCS i gat ol nupela Komisina

**IVAN BAYAGAU I raitim**

PAPUA Niugini Koreksenal Sevis (PNGCS) i bin makim 7-pela opisa bilong en long kamap olsem Deputi komisina na Asisten komisina las wik.

Namel long dispela 7-pela opisa husat i bin gat promosen i gat tupela bilong ol i bin kisim bek posisen bilong ol olsem Asisten Komisina.

Tupela ya em i Asisten Komisina Dominic Tomar husat i lukautim Eksekutiv Sapot na Asisten Komisina Vagi Toua husat i lukautim Sapot Sevis.

Ol arapela promosen em Kelly Karella i kamap Deputi Komisina bilong operesens, Girubane Moihau, Deputi Komisina bilong polisi na edministresen, Godfried Neggints, Asisten Komisina bilong operesens, Solomon Kai, Asisten Komisina bilong welfea na Martin Balthasar, Asisten Komisina bilong pesonel menesmen na trening.

Minista bilong Koreksenal Sevis, Henry Smith husat i bin bilasim ol dispela opisa wantaim bej o mak bilong promosen bilong ol i tok olsem dipatmen ov Korektiv Sevis i leit pinis long mekim dispela apoinmen.

Em i tok olsem i no bin gat ol opisa bilong lukautim dispela ol posisen inap long Ogas 15, 1999 na dispela em i tok olsem i leit tumas.

Mista Smith i tok olsem PNGCS i painim planti hevi stret bikos long ol Minista na Komisina bilong bipo i no bin bihainim lo bilong dipatmen na planti pasin wantok sistem, pasin bilong les nabaut long wok na tu long lukautim ol wokman yet i bin kamap bikpela tru we i bin bagarapim dipatmen stret. Em i tok long dispela na nem bilong dipatmen i bin go daun.

Mista Smith i tok olsem em i save

olsem i gat sampela posisen long arapela renk i nogat opisa i holim ol na dipatmen i no tokaut long dispela. Dispela posisen i kamap bikos ol opisa i holim dispela posisen i pinis long fos na sampela bilong dispela posisen i stap wantaim nogat opisa long lukautim moa long 14 yia.

Mista Smith i tok PNGCS i bin gat planti hevi i kamap insait long dipatmen. Na dispela hevi i stopim ol kainkain developmen long kamap.


Tasol nau Nesenel Eksekutiv Kaunsil (NEC) i mekim ol apoinmen long dispela ol posisen bilong Deputi Komisina na Asisten Komisina em i laik wok i mas ron gut insait long dipatmen.

Minista Smith i tok wanpela bikpela wok ol Komisina i mas mekim em, long kamapim ol polisi, plen na program bilong kamapim gutpela sistem bilong ronim wok bilong kalabus lain. Em i tok olsem dispela ol polisi ol i bai kamapim bai helpim ol kalabus komanda long yusim olsem gaidlain bilong lukautim ol kalabus insait long kantri.

Mista Smith i tokaut tu olsem em i redim wanpela koporet plen bilong dipatmen we em bai givim i go long NEC long tokorait long en long PNGCS bai i bihainim. Em i tok long dispela plen ol bai lukluk long sampela kalabus we projek na program bilong kalabus bai stap long en insait long kantri.

Em i tok olsem long dispela plen bai i gat wanpela polisi we bai i gat sampela kain rihabilitesen program bilong ol kalabuslain long lainim ol bipo ol i kamaut na stap wantaim ol pablik.

Minista Smith i tokim dispela 7-pela nupela Komisina olsem ol i mas wok bung wantaim na kamapim gen gutpela nem bilong dipatmen.



• Ol nupela Asisten Komisina bilong CIS i kisim wok long las wik. Minista Henry Smith i kamap na givim namba long ol. Foto: IVAN BAYAGAU.

# Nupela FM redio bilong Porgera

**GRAYSON JASON TAU I raitim**

PORGERA em wanpeal nambawan maining taun insait long PNG long i gat wanpela nupela redio stesen.

Dispela nupela redio stesen i stap daunbilo opis bilong Paiam Town Menesmen Kampani long nupela Paiam Taun, Porgera insait logn Enga provins.

Nem bilong dispela redio stesen em Ipili FM (Ipili em bikpela nem bilong ol pipel long Porgera, Paiela, Hewa na Maunt Kare).

Pangtel i givim tok orait long redio stesen i ken operet long Frequensi 88.5 olsem wanpela komyuniti redio stesen.

Ipili FM 88.5 em wanpela projek aninit logn Flai In Flai Aut tok orait namel long Nesenel Gavman, Enga Provinsel Gavman, Porgera Developmen Atoriti, Porgera Join Vensa na

Porgera Len Ona Asosiesen long 1998.

Paiam Taun Menesmen Kampani Ltd i menesmen Ipili FM 88.5 na givim opis spes tu. Mani bilong sanapim dispela stesen em K70,000 na dispeal i karamapim ol samting bilong redio, peim ol wokman bilong TE PNG Ltd husat stretim ol samting, sia, tebol na narapela samting bilong wok na tu peim ol man husat helpim.

Dispela i redio stesen i nidim mani inap olsem K92,000 moa long strongim pawa bilong olgeta manemri insait long Porgera, Hewa, Paiela na Maunt Kare long harim bikos maunten na wara i blokim planti toktok bilong redio raun long eria.

Dispela redio stesen i ting long kamapim ol komyuniti samting bai ol pipel i ken lainim samting.

Redio bai kamap ol grup bilong pipel olsem wanpela na larim ol amneri i ken soim ol kala bilong tumbuna pasin logn dis-

pela eria. TE PNG Ltd i sanapim ol dispela masin long Disemba 3 2000 na stat brodkas long Disemba 4 2000 na opisel opening i bin kamap long Januari 19 2001.


Dispela em redio stesen bilong ol komyuniti. I gat 3-pela wokman stret na 8-pela anaunsa husat save helpim long brodkasim ol program.

Stesen i save brodkas long English, Pidgin, Enga, Ipili na Huli na Ipili FM i kamapim ol program bilong em yet i brodkas long 7 kilok moning i go pinis long 9 kilok nait olgeta de.

Redio em bilong komyuniti na husat manmeri olsem komyuniti grup, skul, haus sik, bisnis o pablik grup i ken yusim redio long toksave long wanem samting ol i laik mekim long komyuniti.

Taim i nogat wanpela program i stap Ipili FM i save pilaim ol musik ol manmeri bilong komyuniti i askim.

# Minj win tru wantaim bataflai na binatang projek



• Ol memba bilong Wemax Komyuniti Divelopmen Asosiesen i lainim ol kiau bilong bataflai long Kunjumung bataflai na binatang fam ausait tasol long Minj, Westen Hailans. Aninit:



• Man husat i go pas long dispela asosiesen, Yama 'Bataflai man' Demas i soim sampela bataflai we em i save kolektim long Kunjumung fam .



• Nupela bilding we Wemax Komyuniti Divelopmen Asosiesen i kamapim long Kunjumung viles long Minj, Westn Hailans.



• Yama Demas i soim sampela naispela kala sampel bataflai we em wantaim grup bilong em i save salim i go aut long ol ovasis maket.



• Ol grup memba bi sekim ol bataflai na binatang long laborator.

### Ol papamama kisim helpim long skul fi

SIMBU provinsal gavman i bin peim moa long K900,000 bilong namba tu kuata skul fi sabsidi i go long edukesen divisen.

Edukesen edvaisa Joe Kunda i tok em i bin kisim mani pinis na ol dispela mani i bilong skul fi asistens skim gavana Pater Louis Ambane i bin kamapim long dispela yia.

Mista Kunda i tok skim gavana i bin kamapim i bilong helpim ol papamama husat i save painim hat na i no inap peim olgeta skul fi bilong ol pikinini.

Hevi bilong ol papamama long peim olgeta skul fi em nau gavman i bin helpim ol pinis na nau bai ol i tingting long peim hap tasol.

Mista Kunda i no inap givim namba bilong amas mani bai helpim ol papamama tasol em i tok sabsidi bilong pes kuata tasol em K1million.

Long wanpela skim yet ol sumatin husat i stap long ol bikipela skul olsem koles o yunivesiti i save kisim

helpim long dispela skim tu. Mani em i no tokaut tasol edukesen divisen i wok long mekim ol pemen long olgeta bikipela skul ol sumatin bilong Simbu provins i save skul long en.

Em i tok ol skul i mas kisim ol skul saplai bilong ol pinis long wanem olgeta i bin kisim fan bilong ol pinis.

Long narapela stori Simbu provinsal gavman na edministresen bilong em i wok long plenim wanpela semina na as tingting bilong dispela semina i bilong helpim long developim provins.

Ol pipel bilong Simbu husat kisim bikipela kain ol save na stap long ol narapela hap long kantri i ken kam bek long provins na helpim long kamapim developmen long provins bilong ol yet.

Dispela ol lain i bai toktok long semina long givim tingting long ol pipel i ken save long sampela we ol i ken mekim long kamapim developmen.

## Ol sumatin bilong Wes Papua i laik kam stadi long marasin

OL sumatin bilong provins bilong Wes Papua long Indonesia i soim bikipela laik tru long kam stadi long marasin long Papua Niugini.

Ol digri program we PNG Skul bilong Marasin i save givim long ol kos i bin pulim tingting bilong planti sumatin long Cenderawashi Yunivesiti long Jayapura.

Edministretiv opisa, Tom Boyama na Asosiet Din, Paul Sali bilong Skul bilong Marasin long PNG i bin go raun long Cenderawashi long traime long luk-save long husat ol sumatin i laik kam long PNG na stadi long marasin na lukluk ol Momase rijen long taim ol i stadi dispela yia.

Taim tupela opisa i pinisim raun bilong tupela na kam bek long kantri tupela i i mekim wanpela ripot i go long Eksekutiv Din bilong skul, Profesa Mathias Sapuri na ripot i tok planti moa sumatin long Wes Papua i gat bikipela laik tru long kam long PNG na stadi long marasin long kantri.

Tupela i tok planti bilong ol sumatin i laikim tru ol program UPNG Skul bilong Marasin i save givim na ol i tok ol dispela program i wankain olsem ol i save givim long ol skul long Australia. Planti moa i tok PNG em i klostu tru long we ol i stap na i moa lsl long kam long PNG.



• Profesa Mathias Sapuri

Planti taim ol i save go long kapi-tol siti bilong Indonesia, Jakarta na dispela i longwe tumas.

Tasol Profesa Sapuri i tok long dispela taim UPNG bai kisim ol sumatin husat i laik baim skul fi bilong ol yet i ken kam skul hia.

Em i tok tupela gavman i ken toktok long mekim sampela kain we long ol sumatin i kam stadi long hia tasol long dispela taim i nogat wanpela agrimen o toktok i stap long ol sumatin i ken kam stadi long hia.

Profesa Sapuri i tok Indonesia gavman i save sponsaim ol sumatin bilong na sapos tupela gavman i kamap wantaim wanpela agrimen bai ol Wes Papua sumatin i ken kam stadi long UPNG.

Ol aplikesen em i go aut long

planti sumatin bilong narapela kantri long wanem UPNG i laik opim doa bilong em long planti moa sumatin long ol narapela kantri i ken kam stadi long hia.

Profesa Sapuri i tok planti moa sumatin bilong ol pasifik ailan kantri i save kam stadi long marasin long hia na em i laik bai ol Wes Papua tu i ken kisim dispela sans long kam.

Tupela opisa bilong skul i bin go raun long ol skul long olgeta hap long Momase rijen na bihain tupela i raun i go abrusim boda i go long Jayapura na lukim ol sumtin long Cenderawashi na toktok long ol.

Profesa Sapuri i tok long las yia ol i bin go raun na mekim helt kempein long Sauten rijen bilong wanem i no gat planti dokta long hap. Bihain long dispela kempein planti sumatin husat i bilong Sauten rijen i bin kam skul long marasin na Momase em narapela rijen ol i bin go raun tu.

Olgeta dispela raun em AusAID i save sponsaim ananit long wanpela program ol kamapim long trenim ol pipel long helt sekta na infrastraksa developmen.

Dispela kempein i save kamap olgeta wanwan yia na narapela rijen ol bai go raun tu em Ailans rijen.

Profesa Sapuri i tok ol Ailans, Hailans na Momase rijen i gat moa dokta i winim Sauten rijen.

### 48 sumatin pinis long Hohola Trening Senta

HOHOLA Teknikal Trening Senta na Senta 2000 i bin bung na holim wanpela greduesen las wik we i lukim 48 sumatin i kisim ol setifiket bilong ol.

Dispela tupela skul i save bung na ofaim ol kos long sem ples long Hohola.

Senta em wanpela praivet koles, Senta 2000 na Hohola Teknikal Trening Senta i kam ananit long wanpela projek bilong divisen bilong

ol meri bilong Dipatmen ov Sosol Welfe na Developmen.

Teknikel Senta i save ranim ol kos long plama, mekenik, welding, pawa teknisen, kapenta na ol narapela gutpela wok.

Senta i save givim ol sumatin ol gutpela kos long developim tingting bilong ol gut bipo long ol i ken stadi long wanem kain ol wok ol i gat laik long mekim.

Senta 2000 i save ranim ol bisnis kos na

long greduesen tupela wik i go pinis 25 sumatin olgeta i kisim setifiket na 10-pela em ol meri tasol i kisim pepa. Ol narapela 23 sumatin i kisim ol setifiket long ol narapela kos ol i stadi long senta.

Kos i save ran i go wan yia na 3-pela mun we ol sumtain i save givim wan yia long stadi tasol long skul na 3-pela mun ol i save go aut na mekim ol praktis bilong samting ol i bin save lainim long skul.



**NATIONAL HEART FOUNDATION OF PAPUA NEW GUINEA INC.**

**WANKAIN TAIM LONG OLGETA YIA MIPELA ASKIM LONG YU LONG HALIVIM**



**MIPELA I STAT NAU LONG YIA 2001...**

**HELPIM MIPELA LONG KISIM TAGET MAK BILONG MIPELA!**

PLIS SALIM OL DONESIN BILONG YU IGO LONG ADRES DAUNBILO

P.O. BOX 158  
M.T HAGEN, W.H.P  
PAPUA NEW GUINEA

TELEPHONE: 542 2199  
FACSIMILE: 542 2384  
Email: mount\_hagen@guinpkf.com.pg



### 2001 ANNUAL APPEAL

Name:.....

Company:.....  
(IF APPLICABLE)

Address:.....

My/Our donation to the foundation is:

K10.....K25..... K50.....

K100..... K250 .....K500.....

K1000.....Others.....

NB: Donations in excess of K50.00 are Tax Deductable

# Post PNG gat bikpela dinau wantaim balus kampani

HELEN REI i raitim

PNG Airlines i tokaut pinis olsem bai ol i no inap go het long karimaut ol sevis bilong em long karim ol pas na leta i go i kam long ol ples long kantri long wanem Post PNG i gat planti dinau wantaim dispela balus.

Man husat i save lukautim mani bilong balus, Domingo Balingit i tok Post PNG em ol i stapim akaun bilong em

stat long mun Epril long dispela yia long wanem Post PNG i gat bikpela mani em i dinau em i no baim bek long PNG Airlines.

Dispela ol dinau i kamap long ol sevis PNG Airlines i save gimim long Post PNG tasol Post PNG i no bin baim ol dispela sevis.

Mista Balingit i tok taim dispela problem i bin stat PNG Airlines i ofaim ol sampela spesel ret tasol Post PNG i no bin peim ol bil bilong em gut olsem na nau

yet em ol het lain bilong balus i stapim ol sevis inap ol i gimim mani bai sevis i go.

Em i tok ol narapela dinau i stap yet tasol ol bai gimim sevis sapos Post PNG i gimim mani pastaim long ol i ken karim ol sevis i go long ol hap we sevis i mas go insait long kantri.

Mista Balingit i tok ol i bin sainim wanpela agrimen long dispela samting tasol ol pemen i no kamap olsem na ol i stapim akaun bilong Post PNG inap em i stat long

baim bek mani bilong ol.

Menesing Darekta bilong Post PNG Peter Mision-Yaki i tok olsem i tru dispela problem i stat tripela wik i go pinis long Kiunga long wanem em i wanpela longwe ples tru na nogat planti balus i save go long em.

Tupela kampani wantaim i bin kamapim wanpela agrimen we Post PNG i gat wanpela akaun wantaim PNG Airlines na balus i save karim ol pas nabaut i go long Kiunga na Post PNG i mas

bekim ol dinau bilong ol dispela sevis insait long 30 de olgeta. Dispela i mekim na Post PNG i bin gat namel long K30-K40,000 dinau inap em stat long baim bek ol dinau isi isi.

Mista Mision-Yaki i tok dispela problem i kamap long wanem Post PNG i bin isi isi tru long gimim bek dispela dinau na tu Post PNG em gavman i laik salim olsem na planti hevi i wok long kamap.

Tupela sait wantaim i wok

long toktok long kamap wantim sampela gutpela ya long stapim dispela hevi tasol long nau bai balus i gimim sevis long ol pipel na Post sapos ol i gimim mani pastaim na nogat dinau wok bai i kamap.

Narapela samting Mista Mision-Yaki i tok balus ya i save gat ol narapela kain ron bilong em yet na dispela i hat long ol i bihainim gut long salim ol pas nabaut i go i kam long ol ples kain olsem Kiunga.



• Dispela bikman i mekim save sindaun ausait long Kagamuga ples balus na salim ol kaving. Gutpela rot bilong mekim mani. Foto: SAPE METTA.

## AIDS bai kilim planti wok manmeri

PEKU PILIMBO i raitim

BIRUA bilong sik HIV/AIDS i bikpela tru insait long kantri na inap kilim ol yangpela manmeri husat inap wok na kamapim developmen long kantri.

Minista bilong Helt Tommy Tomscoll i mekim dispela tok-tok bihain long em kam bek long wanpela raun i go long bung bilong Yunaited Nesens (UN) long Niu Yok siti, Amerika.

Aninit long lo, PNG i gat Nesenel AIDS Kaunsel na tingting bilong dispela kaunsel i bilogn stadi na kamapim ol rot bilong pait stretim hevi we PNG i luk ris tru tasol i stap prabis yet. Ol i tingting long

helpim ol manmeri long kamap gutpela.

Long dispela miting em bin tokim ol manmeri olsem em i no laikim UN na ol narapela helpim kantri long lusim tingting long hevi kantri PNG i gat na lukluk long bikpela hevi bilong Afrika na Esia.

Mista Tomscoll i bin tok long miting ya olsem sik HIV/AIDS i bikpela insait long kantri na em i no gutpela tingting long ol i lusim tingting long hevi kantri olsem PNG i gat.

Em i tok olsem sapos PNG i no mekim wanpela samting long stapim dispela hevi bilong sik HIV/AIDS, mak bilong 10,000 i go long mak bilong 15,000 manmeri inap dai long foa o faipela yia taim.

Em i tok PNG i gat 5.2 milien pipel i stap tasol hat long toksave long ol na ol pipel inap kisim dispela sik nogut na dai nating.

Em i tok pret bilogn dispela samting i bikpela tasol iol pipel i no luksave gut bikos ol manmeri i gat kainkain tok ples, ol ples i stap long we long rot.

Wara, maunten na narapela hevi bilong rot na bot samting bilong toksave long ol pipel i nogat na ol manmeri i no klia na inap kilim ol yet hariap sapos ol i no kisim toksave gutpela long birua bilong dispela sik nogut.

Mista Tomscoll i tok olsem em i askim UN Jenerel Asembli long lukluk long PNG na gimim helpim bilong ol pipel.

## PNG bai kisim helpim long paitim HIVAIDS

PNG i stap insait long wanpela program bilong Yunaited Nesens (UN) we i tingting long bungim mani inap K30 bilien (US\$10 bilien) long ol kantri i ken kamapim rot bilong paitim sik HIV/AIDS.

Helt Minista Tommy Tomscoll i tok i tok UN Jenerel Asembli i bung na kamapim tok bilong mani na tu lukluk long wok bung wanpela narapela arapela long pait wantaim birua sik nogut i save kamapim.

Em i tok wari bilong em long dispela miting long Niu Yok wantaim UN i bin long toksave long hevi ol ailan kantri bilong Saut Pasifik bungim long HIV/AIDS.

Ol i bung wantaim na askim UN wantaim pren kantri husat laik gimim mani bilong helpim na traim daunim hevi i mas tingting long wanem hevi

inap kamap sapos ol manmeri i no traim pasim sik.

Mista Tomscoll i bin tok olsem wanem helpim i laik kam i mas kam stret long wanwan kantri na noken putim wanpela komiti we inap kaikaim mani.

Helt Minista bilong kantri Tuvalu husat makim maus bilong ol kantri long Saut Pasifik i tok olsem hevi bilong Afrika na Esia i noken mekim na ol lus tingting long Saut Pasifik bikos nogat wanpela samting i kamap bai planti pipel dai bihain.

Em i tok wanwan kantri long rijen i gat plen bilong ol long karim aut wanwan kempen long pasin bilong ol yet.

Ol komyuniti i no wankain long pasin kastom na rot ol manmeri i save lukim narapela arapela.

## Gavman bai larim praivet bisnis ronim wok bilong CMB

GAVMAN i kisim tingting bilong ol pipel pinis long praivetaisim Kopra Marketing Bod (CMB) na larim ol praivet bisnis manmeri i ronim.

Opis bilong CMB bai traim lukautim olgheta operesen bilong kopra industri long kantri na lukim olsem olgeta samting i ron gut tasol.

Ol i wok yet long wanpela pepa we ol bai gimim long gavman long Julai long wanem wok painim aut na bekim ol i kisim long dispela raun bilong ol i go long Madang, Rabaul na Pot Mosbi.

Dispela bai lukim CMB i no moa baim na salim kopra insiat long PNG. Wok bilong baim na salim kopra bai stap logn han bilong wanwan bisnis haus na CMB bai lukautim na ronim ron bilong wanem kain bisnis ol praivet man i mekim.

Gavman i raun pinis insait long ol ples olsem

Madang, Rabaul na Pot Mosbi long kisim tingting bilogn wanwan grup husat stap insait long groim na salim kopra long kisim wanem ka9in tingting ol i gat long dispela samting.

Gaman i ting olsem wanwan kampani inap peim bikpela prais bikos ol i laik resis wantaim narapal kampani.

NAu wanpela tasol bihain planti kopra baia i kamap baim inap long planti arere bisnis tu i kamap.

Dispela samting inap helpim planti manmeri long ples na ol pipel i ken salim stret i go long husat man i laik baim kopra bilong ol na ol dispela man husat baim i ken salim i go ovasis na kisim mani.

Tasol dispela lo bilong gavman inap kamapim hevi ol manmeri bilong bus ples nabaut i no inap gat sans long salim kopra bilong ol long ol praivet baia.

I gat ol askim olsem ol bihain bilong kopra stabilaisesen fan na inap ol praivet kampani kamapim inap long salim long bikepal maket.

Olasem wanem long kokonat fektori, salim gut i go ovasis na tu bai i gat sip bilogn kisim ol dispela kago i go o no gat.

Task husat i kamapim dispela riptot i tokaut las mun pinis olsem ol baim gimim long Kabinet taim ol i bung long Julai 23.

Dispela miting las mun las mun i lukluk long wanem tingting ol pipel i gat long tingting bilong gavman logn praivetaisim CMB.

Olgeta lo gavman laik kamapim bai lukluk long helpim ol manmeri bilong ples husat groim kopora na wankain taim mekim na luksave olsem namba bilong kopra kantri i salim i mas i go antap.

PNG Maritaim Wokas Industriyel Yunien i laikim Minister bilong Leba na Emploiman Chris Haiweta wantaim Seketeri bilong Leba long tokaut long wanem as ol i rausim rejistra.

Industriyel rejistra i save wok aninit long Dipatmen bilong Leba na i save lukluk long hevi i kamap long wok ples na komplem bilong ol wok manmeri. Taim ol i laik go straik long wok o mekim wanpela i mas kisim tok orait pastaim long opis bilong em. Dispela opis i stap

## Husat rausim Industriyel Rejistra?

aninti long mama lo bilong dispela kantri na i save lukluk long bikpela grup bilong wok manmeri olsem nau PNGBC.

Dispela singaut i kamap bihain long ol i rausim Industriyel Rejistra long wanem em i gimim tok orait long ol PNGBC Nesenel Staf Asosiesen long kamapim vot bilong straik.

Ol i tok opis bilong Industriyel Rejistra em long bihainim lo na

kamapim dispela kain tok orait sapos ol man i laik traik na kisim tok orait long em, industriyel rejistra i save kisim ilektorel komisin long kamapim vot na painimaut tingting bilong ol manmeri.

Tasol dispela rausim bilong industriyel rejistra na nupela apoinmen i mekim planti arapela yunien grup i no wanbel long pasin bilong leba dipatmen.

"Taim em gimim tok orait bilong

hait vot bilong PNGBC wok manmeri long kamap, industriyel rejistra i mekim wok bilong em aninit long lo.

"Dispela rausim bilong em i ol i sutim toktok nating tru long em," ol i tok.

"Seketeri bilong Leba i gat bikpela wok long tokaut long pablik em yusim opis em holim na rausim na pretim- Industriyel Rejistra.

"Ating seketeri i mas pretim industriyel rejistra na tokim em

olsem em bai rausim em sapos em gimim tok orait bilong PNGBC wok manmeri long vot hait bilong straik," ol i tok.

Ol i askim seketeri bilong leba long tokaut sapos em i gimim tingting bilong em long minista bilong leba long rausim industriyel rejistra.

Ol i ting olsem sapos industriyel rejistra i raus bikos seketeri i gimim toktok long minista, orait ol i laikim minista bilong Leba long rausim seketeri bilong dipatmen tu.

# Prais bilong kaikai i go antap, tasol pe i no senis



samting tru ol pipel bilong Papua Niugini i stap long en tude. Dispela toktok bilong 2000 Minimum Wejes Ditaminesen i no bin

kamap yet na turangu ol liklik wokmanmeri bai sot tru long mani taim ol i taitim bun long baim ol kaikai na ol samting long stua

taim prais i wok long go antap yet. Sapos Wol Beng i givim i givim sampela dinau mani long PNG, orait gavman i mas

yusim gut dispela mani long gutpela rot we i ken traim long kamapim moa mani long kantri na traim apim strong bilong

Kina igo antap liklik long mekim ol prais i kam daun liklik bai ol traungu liklik manmeri bilong PNG i ken pilim gut liklik.

PRAIS bilong tin mit i go antap gen long dispela wik long mak olsem 16 pesen (%). Prais tru bilong OX & Palm tin mit em K3.29 tasol nau ol i surukim i go antap moa long K3.55. Dispela prais igo antap i wankain long Globe tin mit tu. Olsem na wanem kampani i save mekim Ox & Palm na Globe long PNG bai apim prais long olgeta kainkain nem bilong tin mit we fektori bilong tupela i save mekim.

Prais bilong rais i bin go antap, prais bilong flawa i bin go antap na klostu prais bilong olgeta kaikai long stua igo antap. Ol kampani i save wokim ol dispela kaikai na salim long stua i askim Gavman long ol i laik apim prais bilong ol kaikai i go antap bikos ol i bungim hevi long sait bilong mani long go het wantaim wok blong ol. Em i tru na ples klia olgeta na yumi olgeta manmeri bilong Papua Niugini i save olsem mani i bikpela hevi tude long kantri na planti samting i hat long baim na planti samting i no isi long kisim. Prais bilong planti samting i luk olsem bai igo antap yet bikos strong bilong mani (Kina) i no go antap yet na i wok long pundaun isi isi egensim dola bilong Australia na Amerika.

Prais bilong kerosin, fiul na disel i go antap pinis na nau ol papa bilong bas na pmv i askim long apim fea bilong pasindia bikos prais bilong fiul i go antap na spea pat tu i go antap.

Bai yumi lukim prais i go antap long olgeta samting long olgeta hap inap wanem taim gavman i stretim dispela hevi bilong mani insait long kantri.

Bikpela samting nau em, taim prais bilong ol kaikai na ol kago o ol sevis i wok long go antap long olgeta kona, prais o potnait pe bilong ol wokmanmeri i no go antap yet. Na ating ol kampani na gavman i no inap long apim pe bilong ol wokmanmeri bikos ol bai kisim ekstra mani we long apim pe bilong ol wokmanmeri. Dispela em hat bikos kampani i wok long traim apim prais bilong ol samting em i laik salim bikos em i no mekim inap mani taim strong bilong mani (Kina) i pundaun.

Olsem na yumi ken lukim olsem ol lain husat bai kisim bikpela hevi na hat taim stret em ol turangu woktain na ol famili bilong ol long taun. Taim prais bilong kaikai na ol kago i go antap, ol bai baim moa na mani bai sot long ol harlap tru na ol bai sindaun nating wetim narapela potnait gen. Dispela em wanpela hatpela



# PNGBC beng i straik gen

Haus mani bilong Papua Niugini Benking Kopresen (PNGBC) i bungim hevi gen taim ol wokman i holim straik long dispela wik. Dispela em namba tu taim ol i straik gen bikos ol i tok ol bosman o menesmen bilong PNGBC i no harim na bihainim ol disisen ol i bin pasim long las mun long namba wan straik.

Insait long namba tu straik tu ol union i askim menesmen long givim ol K50 bones wankain long ol lain husat i bin kamap long wok long taim arapela i bin go long straik. Ol i tok menesmen i mas givim ol dispela K50 bones na tu givim ol 4-pela de rekriesen liv, em foapela de ol i bin stap ausait long straik.

Dispela singaut o askim i sanap yet na menesmen i no stretim o kamap wantaim wanpela toktok yet long dispela. Tasol Minista bilong Leba na Emploimen, Chris Haiweta i bin singaut long PNGBC wokas union wantaim menesmen i mas go bung wantaim ol na

ol i ken sindaun toktok wantaim long stretim dispela toktok na bel nogut. Dispela miting i no bin kamap long Tunde dispela wik.

Tasol ol ripot i kamap olsem planti brens bilong PNGBC long ol wanwan provins tu i stap insait long dispela straik. Sampela i wok long op tasol ol i wok isi tasol na wetim ol toktok we bai i kam long nesenel bodi bilong ol, Nesenel Staf Asosiesen (NSA).

Praim Minista Sir Mekere Morauta i tokaut olsem kabinet i makim pinis wanpela olpela Nesenel Kot Jas, Sir Robert Woods long go pas long harim ripot bilong dispela straik we i kamap long las mun na tripela man i bin dai we tupela em studen bilong yunivesiti na planti lain tru i kisim bagarap na go long haus sik.

Praim Minista i tokaut olsem dispela inkwairi o kot em gavman i no stretim hariap bikos ol i wok

long traim painim man bilong go pas long dispela kot. Dispela wik Mande Praim Minista i tok em i painim Sir Woods long Australia na askim em na em i wanbel long kam bek long PNG na mekim dispela wok. Dispela kot o enkwaeri bai lukluk i go moa insait long dispela hevi na tokaut long husat tru i asua long dispela hevi. Kabinet i no tokaut long nem bilong narapela tupela Mejistret bilong sindaun na harim dispela inkwairi kot. Tasol bihain ol i stretim nem bilong tupela bai Praim Minista i tokaut bihain.

CIS Minista Henry Smith i makim pinis ol nupela Asisten Komisina na Deputi Komisina bilong CIS long las wik. Ol dispela posisen i bin stap nating long longpela taim i kam inap dispela yia we nupela CIS Komisina i bin kamap na stretim ol wok bilong makim ol man i kisim ol dispela wok bilong ol. Dispela seremoni bilong givim bej o mak long ol dis-

pela bikman bilong CIS i bin kamap long las wik.

Bikpela lotu bung o krused i kamap long Mosbi we i pulim planti tausen manmeri i go bung long Sir John Guise Stadium long olgeta nait. Dispela krused bai pinis long dispela wik Sande. Dispela em wanpela bikpela lotu tru we i kisim tupela wik olgeta na planti tausen manmeri i wok long go pulap olgeta de long harim tok bilong Bikpela. Narapela samting em dispela krused tu i kamap long televisen we olgeta manmeri long ol arapela provins i ken sindaun na lukim long wanpela taim tasol. Long ovasis tu, ol manmeri i sindaun na lukim dispela krused long Sir John Guise Stadium long Mosbi. Dispela em ol i kolim setelait krused we yu ken lukim long narapela hap long warfem samting i kamap nau long narapela hap graun. Seven De Edventis (SDA) igo pas long dispela krused.



Toktok bilong pinisim olgeta wanbel na opim rot bilong Bogenvil i ken go het wantaim provinsal gavman bilong em i kamap nau we Minista bilong Bogenvil Afeas Moi Avei i stap pinis long Rabaul long bung wantaim ol Bogenvil lida. Dispela las toktok em long pasim olgeta wanbel na opim rot bilong Bogenvil gavman i ken gat moa pawa long go het wantaim administresen bilong provins. Dispela bikpela pawa o otonomi i karamapim ol wok bilong gavman na administresen na sait bilong mani tu long ronim provins.

## God yet mas kisim laip, Presiden Putin i tok

PRESIDENT bilong Rasia Vladimir Putin i strong yet olsem ol i mas noken kisim olupela lo bilong kilim man o det penelti bek.

Bipo Rasia i save kilim ol strongpela trabel man tasol dispela lo i bin stap long 1996 bihain long Rasia i laik go kamap memba bilong Kaunsel bilong Yurop we olgeta kantri i stap memba.

Peersiden Putin i tok em bai no inap ok orait long dispela tasol planti pipel i tingting strong olsem dispela lo i mas kam bek bikos planti trabel wok long kamap insait long Rasia bihain long ol i ok ol trabel man i no inap kisim det penelti.

"Lo mas noken kisim wanpela rait bikman antap yet i givim long ol man na dispela em long

kisim laip bilong man. "Long dispela as mi bilip strong olsem Rasia i mas noken kamapim gen dispela det penelti," Mista Putin i tok.

Nau yet Rasia i kisim bagarap long kainkain trabel manmeri na bikpela pait i bruk aut namel long ol liklik provins bilong kantri.

Plantu man i ting olsem sapos gavman tingting long holim yet

pawa em mas kisim det penelti i kam bek na noken larim ol stilman na trabel man i raun long laik

Oi i ting dispela bai bagarapim kantri olgeta.

Rasia i bagarap long sait bilong mani na tingting bilong ol long bung wantaim Kaunsel bilong Yurop em long kisim sampela mani helpim samting.

## Soka klab baim bikpela mani long kisim sempien pilaia

WANPELA soka sta i sainim bikpela kontrak wantaim wanpela soka tim. Mak bilong mani tim laik baim em long pilai wantaim ol em US\$64.45 milien (K192.135 milien.)

Nem bilong soka pilaia em Zinedine Zidane na em bilong kantri Frens.

Tim husat i laik baim em ol i kolim long Real Madrid na dispela em bikpela mani ol i peim i go long wanpela pilaia insait long wol.

Zidane yet i kamap long wanpela kain eria olsem setelmen bikos ol lain bilong em i bin lusim

kantri Algeria na i go stap long Frens.

Taim em liklik manki yet, em save pilai long strit nabaut na i no save tasol ol man i luksave long gutpela stail pilai bilong em na kisim em i go insait long tim na givim trening.

Nau em wanpela nambawan pilaia bilong soka insait long wol na Real Madrid husat i gat laik long em i givim bikepal mani long em i ken pilai insait long tim bilong ol.


Zidane, 29 i marit na i gat tupela pikinini. Taim em i no pilai

soka, em save laik long sindaun wantaim meri na pikinini bilong em long haus.

Taim em pilai, em save masta main na save logn wanem hap kona gep bai kamap na em save pasim stret long wantok bilong em o putim long maus bilong gol stret.

Dispela stail pilai bilong em i lukim em makim kantri bilong em Frens planti taim long pilai egen-sim ol narapela kantri.

Em i save helpim kantri na klab bilong em long win wantaim stail pilai bilong em.



ZINEDINE Zidane ... biggest transfer.

Top 10 soccer transfer fees

Player	Year	From	To	Fee
Zinedine Zidane	2001	Juventus	Real Madrid	\$US\$64.4m (\$A127)
Luis Figo	2000	Barcelona	Real Madrid	\$56.1
Hernan Crespo	2000	Parma	Lazio	\$54.1
Christian Vieri	1999	Lazio	Inter Milan	\$50.0
Gianluigi Buffon	2001	Parma	Juventus	\$45.9
Nicolas Anelka	1999	Arsenal	Real Madrid	\$35.7
Denilson	1997	Sao	Paolo Betis	\$35.0
Rui Costa	2001	Florentina	AC Milan	\$35.0
Lilian Thuram	2001	Parma	Juventus	\$35.0
Gabriel Batistuta	2000	Florentina	Roma	\$33.8

## Bikpela ren kilim 26 manmeri long Saut Korea

BIKPELA ren tru i bagarapim tru Sentrel Saut Korea na planti samting tru i bagarap nogut tru.

26 manmeri i dai na 13 narapela i lus long wanpela bikpela ren tru we i lukim wara karim ka i go na rot i blok nogut tru.

Gavman i salim pinis ami i go insait long eria long helpim.

Tait wara i karim pinis 30 ka, bagarapim

14,000 haus i pulap long wara na 1,900 pipel husat silip arere long wara lusim dispela hap na mov i go aut. Ol ripot i tok triepela man i dai taim haus i bruk antap long ol na nainpela i dring wara na i dai taim tait wara kamap long haus bilong ol.

Narapela 10-pela ipipel i dai taim pawa i kisim ol na ol narapela i dai long wara na

graun i bruk.

Ripot i foapela pikinini longn wanpela kem arere long wara i bin lusim laip bilong ol insait long dispela birua tu.

Ol gavman na bisnis atoriti i no save logn wanem kain bagarap dispela ren i kamapim tasol i mak bilong bagarapim bikpela hap tru bilong groim rais.

Ripot i tok ol pablik rot na transpot sevis tu

i kisim bagarap long displa hevi tu.

Kapitel bilong ol Sol tu i kisim sampela ren tu na i klostu i bin kamap orait gen.


## Ating meri mekim pamuk piksa

DISPELA meri em wanpela ekta na em i gat biknem long mekim ol gutpela muvi tasol i gat luksave long wanpela piksa bai kam aut klostu.

Em wantaim narapela ekta i mekim pasin nogut long piksa. Em meri bilong Niu Silan na mekim piksa long Yurop. Planti manmeri long Australia i tok piksa bilong em i nogut na ol mas noken soim long pablik.

Nem bilong dispel meri em Kerry Fox na em i karim wanpela pikinini i no long taim i go pinis.

Boipren bilong em i wanbel long meri i mekim dispela piksa na em i no kros long man husat ol i tok i mekim pasin nogut insait long piksa.



Em wanem ya!

• Dispela olgeta samting hangamap logn diwai i no lip o sampela pipia klos. Em ol pusi ket hangamap. Ol man i kilim ol displa pusiket, taitim olgeta tel bilong ol wantaim na hangamapim olsem i stap. Dispela ol pusike i save kamapim bikpela hevi. Ol i save kamap planti tru na bagarap na kilim i dai narapela animel olsem pisin, kapul na wanem narapela samting. Ol man i save helpim long kilim ol displea pusiket bikos noppat narapela animel inap kaikaim o kilim ol dispela pusiket. Ol man i traim daunim namba bilong pusiket na traim holim ol narapela-animel long dai aut olgeta. *Poto: The Weekend Australian.*





• Ol dispela pipel i mekim protes na askim olsem Jenerel Pinochet i mas sanap long kot. Ol pepa i soim sampela wantok bilong ol Pinochet i bin kilim taim em lida.

Poto: The Weekend Australian.

## Israel na Palestain i kros yet

BIKPELA hevi bilong graun long Israel na Palestain i mekim na planti manmeri i lusim laip bilong ol.

Pait i go yet namel long tupela grup tasol Israel Foren Minista Shimon Peres wantaim lida bilong Palestian Yaser Arafat bai bung displa wik long Isip aninit long lukaut bilong Isip presiden Hosni Mubarak long painim sampela sampela rot bilong kisim bel isi.

Presiden bilong Isip i no harim singaut bilong ol narapela Arab kantri bikos ol arapela i

laikim olsem Israel i mas stap em yet na i noken toktok wantaim ol.

Praim Minista bilong Israel Ariel Sharon i kisim bikpela toktok long ol minista bilong em olsem ol i mas traime pait bek strong long ol Palestian manmeri.

Ol i tok olsem dispela pait mas lukim ol Israel i rausim Arafat wantaim Palestian Atoriti tasol olpela praim Minista Ehud Barak i ting olsem dispela em las samting Israel bai mekim.

em i ting dispela em gutpela tingting tasol bai ol i tingting long dispela samting las tru taim olgeta narapela rot bilong bringim bel isi namel long tupela pipel i no wok.

Arafat i bin wantaim ol bik man bilong Amerika tasol i nogat wanpela ripot i kam aut yet long dispela miting bilong ol.

Tasol bikpela tingting bilong Amerika em long lukim olsem olgeta pait i mas stap na ol manmeri i mas painim wanpela gutpela rot bilong kamap wanbel.

Ol Israel opisel i tok ripot i kam aut olsem i gat wanpela plen i redi bilong Israel i salim ami bilong em i go kilim olgeta Palestian manmeri na rausim opisel bilong ol tu i no tru.

## Chile pipel laikim olpela presiden sanap long kot

DISPELA ol pipel i bin lusim wanpela man, meri, pikinini long taim olpela presiden bilong ol Augustus Pinochet. Jenerel Pinochet i bin presiden bilong Chile long 1973 i kam long 1990.

Long dispela taim em save bosim ol manmeri long laik bilong em. Em i bin kilim planti manmeri husat i tok gavman bilong em i nogut. Planti tausen manmeri bilong dispela kantri i bin dai.

Dokta tok i bin tokaut i no long taim i go pinis olsem Jenerel Pinochet i sik nogut tru na em i hat long sanap long kot.

Pinochet i bin ronawe lusim

kantri long 1990 taim em lus long pawa na i go stap long Spain na England.

Ol pipel i singaut long em i mas kam bek na sanap long kot long ol rong em i mekim taim em i stap olsem presiden bilong kantri.

Long long 3000 pipel i bin dai taim em kisim ami i go insait long kantri na kilim ol man long laik.

Jenerel Pinochet i gat 85 krismas na i lapun tru long sanap long kot tasol ol pipel husat i laikim em sanap long kot i tingting long pait i go moa na traime kisim lapun man ya i kam na sanapim em long kot long ol rong em i bin mekim.

## Saina Kempen strong long kisim 2008 Olimpik gem

BIKPELA kempen tru i kamap bilong Saina bikos ol i gat bikpela laik tru long kamapim Olimpik gem long kantri bilong ol.

Kempen bilong ol i karim kaikai na ol bai kamapim Olimpik gem long 2008 bihain long Olimpik Komiti i tok orait olsem ol bai kamapim gem.

Ol manmeri bilong Saina husat i laik givim helpim long Olimpik Komyuniti i stat ringim pinis olimpik komiti na man ol telepon i rong long laik.

Ol telepon opereta i kisim taim long kisim telepon. Ol dispela

telepon em pipel husat i gat bikpela laik long lukim Saina i kamapim dispela 2008 Olimpik gem.


Saina inap holim dispela 2000 Olimpik we Sydney i kisim tasol dispela i no kamap taim ol memba bilong Intenesen! Olimpik Komiti i bung na tok olsem Saina i nogat gutpela rekot bilong lukautim ol man olsem na Australia i bin kisim 2000 Olimpik.

Planti pipel i ting em gutpela long mekim Saina luksave long wanem rong em i mekim na wok bung wantaim ol manmeri

bilong narapela kantri tu.

Saina i stap aninit long Komyunism yet tasol em i stat long kam aut liklik long pablik wantaim sistem bilong gavman na laik tingting long givim fridom long ol manmeri na larim ol i stap olsem ol manmeri bilong dekmokratik kantri.

Wanpela hap bilong faivpela pipel long graun i stap long Saina na i dispela em gutpela sana bilong ol pipel i luksave long wanem narapela kantri na pasin bilong dispela wol i olsem wanem.



## Amerika les long pipel kisim gan

• Amerika i no wanbel long ol manmeri nating karim gan raun bikos dispela inap bagarapim ol yet. Yunaited Nesen (UN) i bin bung na kamap wantaim wanpela tingting long salim gan na larim ol manmeri kisim na lukautim ol yet. Dispela em Wallis Kendal husat i laik soim ol gan long pablik na wanem birua ol inap kamapim taim ol pipel yusim long Niu Yok. Poto: The Weekend Australian.

89.9 93 96 98 100



**Yumi sanap strong long tok ples bilong yumi yet!**

**Laikim yu nating tru!**

Yumi FM your community service station

PNG FM LTD Trading as NAUFM, YUMI FM & TOTAL EVENT MARKETING  
P.O. Box 774, Port Moresby Papua New Guinea  
Ph: (675) 320 1996 Fax: (675) 320 1995 <http://www.naufm.com.pg>

# LAI PSTAIL


## Waghi Komyuniti Tieta grup i bungim hevi

### SAPE METTA i raitim

**W**ANPELA lokol tieta grup husat i wok long traim hat tru long kisim gutpela luksave long provinsal gavman na ol bisnislain long Westen Hailans provins tasol bekim ol i wok long kisim long mekm wok bilong ol i no luk gutpela tumas.

Dispela grup em Waghi Komyuniti Tieta grup husat i gat 18 manmeri we 6-pela em ol meri husat i gat bikpela laik tru long kamapim ol tieta na drama pilai na ol arapela tieta pilai long pablik, ol skul, na sios na insait long ol arapela kainkain bikpela de insait long kantri.

Ol samting em dispela grup i gat bikpela laik long mekim tu em long kamapim ol awenes wok long tieta na drama pilai long skulim gut ol manmeri



• Ol memba bilong Waghi Komyuniti Tieta grup i bin stap insait long mekim ol pilai na singsing long welkamim ol kos lain long woksop bilong FORD long las mun. Ol foto: SAPE METTA.

na pikinini long komyuniti long ol sait bilong sik, smok mariwana, spak pasin, edukesen, lo na oda na kirapim tu pasin bilong kalsa na

pasin tumbuna bilong Westen Hailans na Papua Niugini i stap laip namel long ol yangpela bilong tude na tumoro.

Man husat i go pas na kirapim dispela grup, John Kupul i tokim Wantok olsem grup bilong em i gat bikpela laik long

kamapim ol tieta pilai tasol i nogat singaut o invaitesen na bekim i kam long ol we ol i ken kirap na mekim wok bilong ol.

Em i tok bipo long em i kirapim Waghi Komyuniti Tieta grup em i bin stap insait na wok olsem wanpela ekta o pefoma wantaim Westen Hailans Provinsal Tieta grup tasol em i lusim dispela grup na kamaut long wanem provinsal gavman i no bin i gat gutpela helpim long sopotim Westen Hailans Provinsal Tieta grup.

Ol lain husat tu i bin stap wantaim em long Westen Hailans Tieta grup i bin kirapim lusim tu na go wantaim em na ol i kamapim Waghi Komyuniti Tieta grup. Na ol i bin go het na rejistaim dispela grup long Epril 2000.

Taim mipela i statim Waghi Komyuniti Tieta grup, mipela i bin raun na putim aut planti pilai long ol pablik, ol sios na long sios. Tasol bihain long wanpela mun, mipela i no moa raun na mekim wok bikos nogat singaut o askim i kam long mipela na tu mipela i

nogat moa manmeri i kam long laik lukim mipela i pilai, Mista Kupul i tok.

Foundation for Rural Development (FORD) i bin luksave long hevi bilong dispela tieta grup tasol i nogat wanpela gutpela mani yet long sopotim na helpim ol long wok bilong ol.

Mista Kupul i askim olgeta bisnis lain na gavman bilong Westen hailans long luksave na sopotim ol bikos wok bilong tieta grup i save givim gutpela awenes na skul long ol manmeri na pablik long ol gutpela tingting na rot bilong stretim na kamapim gutpela sindaun long komyuniti na kantri olgeta.

Em i tok insait long grup bilong em, ol i gat ol membas long Hagen Sentrel, Waghi, Jimi na Baiya we ol i ken tanim olgeta tok ples bilong Westen Hailans provins taim ol i kamapim ol pilai bilong ol long pablik.

## Ol busples i save hat tru long kisim sevis

HEVI bilong bris o rot i go long ol ples long Papua Niugini em bikpela samting stret nau long olgeta hap bilong kantri. Dispela long wanem ol ples bilong yumi i stap insait tru long bik bus we yu mas brukim planti bikpela wara, maunten na bus bipo yumi kamap long ples.

Long dispela as, planti pipel bilong yumi long ol ples ino save kisim ol kain sevis olsem helt, edukasen na ol arapela gavman sevis.

Tasol long wanwan hap tasol i save gat sans long kisim ol dispela kain sevis olsem long bris, skul, haus sik o rot i kamap long ples. Sampela bilong dispela sevis i save kam long ol ovasis dona olsem AusAid bilong Australia na ol arapela NGO grup tu long arapela ovasis kantri.

Kistuen bris em wanpela long ol projek we halivim i kam long ovasis dona i lukim dispela waia bris i sanap. Kistuen fut bris em i stap long Boana distrik long Morobe Provins na i krosim Kistuen wara samting olsem hap kilomita long Kasanombe stesin ples balus.

Dispela wara strong bilong em i moa bikpela we planti taim i go pinis ol pipel long dispela hap ol ples i save kisim hevi long brukim. Planti laip i bin lus pinis long taim bilong ol tumbuna i kam inap nau we dispela bris i sanap.

Memba bilong Nawae Mista Kennedy-Wenge i bih gat bikpela wari long ol pipel bilong em long dispela hap ples taim em i kisim pawa olsem lida bilong ol. Em i traim hat pait long kamapim bris inap ol AusAid i kam insait na sanapim bris.

Long namba 26 de bilong mun Sektemba, long dispela 1999, ol pipel bilong Kasanombe na Kistuen i lukim nupela fut bris bilong ol i op. Bris i op i lukim planti lain i wari na amamas wantaim long wanem em namba wan taim ol i lukim strongpela waia bris i kamap long ples we ol i no inap moa long brukim wara olsem bipo long

taim bilong tumbuna.

Long histori bilong dispela wara i tok em i bin karim pinis planti manmeri na pikinini long taim bilong ol tumbuna i kam inap nau bris tru i sanap. Dispela nupela bris em longpela bilong em olsem 30 mita na daun bilong em inap 60 mita.

Long taim bilong bris i op, bikpela kaikai na singsing i bin kamap na tu ol yut grup i amamas paitim gita long dispela bikpela de. Ol pipel long ples i amamas tru we ol i paitim kundu na singsing maski liklik ren bilong maunten i pundaun na kol i kisim ol ges, kundu i pairap mekim olgeta kol i ronawe nabaut.

Dispela bris i stap namel long tupela bikpela maunten we long go ples bris i stap bai yu wokabaut hap aua long Kasanombe stesin ples balus i go daun. Ol pipel long dispela hap save wokabaut tu de long kamap long ples rot i stap long kisim kar i go daun long Lae.

Long go long dispela hap bai yu flai long balus o helikopta tasol save pinis hevi bilong mani i mekim ol pipel i kisim bikpela hevi we wanpela rot tasol long go long taun na baim ol samting olsem sol, suga o sop em yu mas wokabaut yet.

Op bilong dispela bris tu i lukim rot i op long ol pipel long ples long go kam long arapela ples istap long hap saif na tu em wanpela rot ol i bai yusim long go long Lae.

Long dispela hap tu em ples bilong kaikai olsem raun kabis, swit patote, na planti ol frut olsem suga pruit, banana na kukumba.

Yu go long dispela ples bai yu no inap lus long kaikai ya, long wanem taim bilong ol bikman i go bek long Lae, helikopta i pulap wantaim ol kaikai na kepten i rausim sampela bilum kaikai bilong ol bikman i go daun. Dispela de em ol lain long ples i amamas we singsing i bruk i go i nap long narapela de.



# The Station with

# the best music mix!

"SOUNDS BEAUTIFUL ONE DAY, PERFECT THE NEXT"

# Raskol pasin i bagarapim tisa na skul

## MASTA WAI i raitim

**W**ANPELA bikpela skul insait long biksiti bilong Pot Mosbi i bin bungim wanpela bikpela hevi tru we i pretim planti skul tisa na ol papamama long ol skul pikinini bilong ol. Dispela em i wanpela kain nius nogut tru bilong dispela skul bikos wanpela man nogut i bin go insait long skul long las wik wantaim sotgan na hensapim wanpela tisa meri na bagarapim em insait long klasrum bilong em.

Taim i olsem 3 kilok na tisa meri ya i sindaun yet long klasrum long stretim ol lesan na wok bilong klas long neks de. Em wanpela i stap long klasrum tasol long ausait long skul graun em ol sumatin na ol wokmanmeri bilong skul i wok long i go i kam.

Dispela klasrum i stap beksait long toilet eria bilong studen olsem na taim dispela hevi i kamap long turangu tisa meri ya, nogat man inap lukim bikos toilet bilding i haitim. Dispela hevi i mekim na dispela skul i nogat klas inap tripela de long las wik.

Long Sande bikpela bung i bin kamap long dispela skul na ol papamama i bung long autim ol bel hevi na tingting bilong ol i go long dispela hevi na tu wanem kain rot skul inap kamapim long lukim olsem sekyuriti bilong skul i gutpela bai ol skul pikini wantaim ol tisa i ken stap gut na skul gut.

Het tisa bilong skul i tromoi sampela bikpela toktok salens i go long ol papamama long skelim long sait bilong sefti bilong ol skul pikinini na ol skul pikinini. Dispela i mekim ol papamama i mekim planti bikpela na strongpela toktok long dispela hevi bikos ol i pret long dispela kain trabel i kamap long skul gen.

Tarangu tisa ya bai pilim nogut long kam bek wok long dispela skul gen bikos em i ting em i kam long wanpela gutpela skul tasol hevi i bungim laip bilong em. Tasol dispela disisen bai i no inap isi. Ol pikinini wantaim papa bilong ol bai skelim tingting tu long kamapim laik na disisen bilong mama bilong ol.

## Raskol pasin i pretim ol tisa na sumatin

Dispela em wanpela kain hevi we ol papamama na ol tisa i no laikim tru long i kamap long skul bilong ol. Dispela em wanpela bikpela raskol pasin tru we inap pretim laip na sindaun bilong ol tisa na ol skul pikinini long skul graun.

Taim man nogut i holim sotgan na i go insait long skul graun na mekim raskol pasin insait long skul, dispela i ken pretim tru ol arapela fiklik skul pikinini na gutpela tingting bilong ol long skul bai lus nating bikos pret i karamapim tingting bilong olgeta. Bel bilong ol tisa tu bai i nogut olgeta bikos ol bai istap wantaim pret long laip bilong ol.

Planti papamama i tokaut long skul i mas pas inap olgeta rot bilong stretim na lukuatim gut skul i kamap gut pastaim bikos ol i

pret long dispela kain trabel na hevi i kamap long skul gen.

## Komyuniti i save bagarapim skul

Dispela taim tude planti skul i save sanap namel long ol komyuniti olsem kompaun na setelmen ol long ol ples. Na dispela kain skul i ken bungim planti kainkain trabel na hevi olsem raskol pasin long stil, pait, smok nogut, bagarapim ol tisa na studen, brukim banis bilong skul, kompensesen na planti arapela trabel na hevi moa. Bikos insait long dispela komyuniti i gat ol gutpela man na man nogut i stap. Ol bikhet manki bilong dispela kompaun o setelmen i save kamap wantaim kainkain tingting long bagarapim skul na wanem kain bikhet pasin bilong ol tu ol i save soim long ol skul manki. Olsem long pasin bilong smok na dring, ol bai smok ples klia o dring bia ples klia na tok nogut nabaut. Na ol skul pikinini tu i save lukim na laikim na sampela taim ol i pren wantaim ol na traim ol dispela pasin. Planti ol pikinini man long skul i stat long lainim bikhet pasin long dispela rot tasol we ol i lainim long ol bikhet manki long kompaun. Na papamama bai paul olgeta bikos tupela i no lainim pikinini long dispela kain bikhet pasin.

## Prensip bilong skul na komyuniti

Tasol bikpela samting tu long bel bilong planti papamama insait long kompaun na ol setelmen em ol i laikim skul i mas sanap klostu long ol. Bai ol pikinini bilong ol i ken go skul isi. Skul i sanap long komyuniti tu em gutpela bikos em i wok bilong dispela komyuniti long was na lukuatim gut skul. Skul i sanap olsem wanpela hauslain bilong dispela komyuniti o kompaun o setelmen na planti pikinini long dispela komyuniti i save go skul long dispela skul



tasol

bikos em i

klostu tasol long haus bilong ol. Long dispela as, ol papamama bilong dispela kompaun i save lukim olsem dispela skul em skul bilong ol. Taim dispela kain tingting na save i stap, bikpela samting em ol dispela papamama na ol famili insait long dispela komyuniti i mas amamas long sevis bilong skul i stap klostu tru long dua bilong ol na ol i mas wok klostu tru long lukim olsem skul i ron gut. Ol i mas krosim na rausim husat bikhet pikinini i laik pulim kapa o banis bilong skul o i laik kamap i go insait skul banis. Ai bilong ol papamama long komyuniti ya i mas was long wanpela bikhet man i noken traim long bringim hevi i go insait long skul. Komyuniti yet em olsem sekyuriti na waspapa bilong dispela skul bai skul i ken stap gut na ron gut long givim gutpela edukesen i go bek long ol pikinini bilong yumi.

## Ol sumatin i save bikhet

Igat ripot olsem planti skul pikinini i save smok na stat long smokim tu mariwana. Wanem rot ol i lainim long smok na tu smokim mariwana em bikpela tru long ol poroman long kompaun na strit. Taim ol skul pikinini long gret i go antap long gret 10 i stat long smokim smok mariwana, yumi ting wanem long dispela?. Mi ting em i nogut tru bikos smok mariwana em samting spak na het bai i go longlong na ol bai mekim ol krangki pasin olgeta. Ol i ken pekpek na pispis long trausis bilong yet taim ol i smok mariwana we inap kilim olgeta strong long het na bodi bilong ol na ol bai i no inap pilim wanpela samting. Bikos bodi bilong ol i no strong olsem ol bikpela man, ol bai mekim planti nogut samting.

## Sekyuriti i mas wok strong

Sekyuriti bilong skul i bikpela samting tru long olgeta de long lukim olsem ol skul pikinini i skul gut na skul i stap orait. Sapos skul i gat ol waswas man o sekyuriti, orait ol dispela sekyuriti i mas mekim gut wok bilong ol. Ai bilong ol i mas op long lukim wanem kain samting i kamap long skul na sapos sampela skul pikinini i mekim sampela kain pasin o eksen we i no stret, orait sekyuriti i mas go insait na painimaut long dispela. Sapos sampela ausait man i kam na i go insait long banis bilong skul, orait wok bilong sekyuriti long stapim em long geit na askim em gut pastaim. Sapos man i laik kisim pikinini bilong em, em i mas wet ausait na arapela skul pikinini i ken go na tokim pikinini i kam long geit. I tambu tru long wanpela ausait man i go insait long skul graun. Olgeta i mas wet long geit tasol.

## Edukesen em bikpela samting long yumi

Edukesen bilong ol pikinini bilong yumi em bikpela samting. Na ol bai kisim gutpela edukesen sapos olgeta samting i stap stret long skul na i nogat hevi o trabel o raskol pasin i kamap. Bikpela samting tu em sapos olgeta tisa i stap gut na i nogat pret long ol, bai ol tisa i stap gut wantaim amamas na mekim gut wok bilong ol. Taim ol tisa i gat gutpela haus bilong slip na skul banis i stap gut, yumi ken kamapim gutpela edukesen bilong ol pikinini na kantri i ken amamas long kamapim ol gutpela manmeri husat i ken kirapim kantri long nau na bihain taim tu.

Skul i no olsem wanpela bikpela stua we i gat ol gutpela na ol naispela swit samting o mani istap. Em i wanpela banis wantaim ol haus win nating i stap long ol pikinini i bung olgeta de wantaim tisa bilong ol. Na i nogat wanpela bisnis wok i stap long skul long yumi aigris long brukim o mekim raskol.

# Poka masin, gutpela o nogut?

## PEKU PILIMBO i raitim

POKA masin i gutpela o nogut? Planti manmeri i gat kainkain tingting long gutpela na nogut sait bilong dispela masin. Manmeri husat save pilai masin bai ting em mas gutpela na ol manmeri husat i no save pilai bai tok em samting nogut. Sampela i no save wanem em poka masin.

I no long taim i go pinis taim kabinet i bung long Maunt Hagen las mun, Prait Ministia Sir Mekere Morauta i bin tokaut olsem em i laik pasim poka masin bikos planti famili i kisim bagarap.

Em i tok olsem planti famili i kisim taim long dispela masin nogut. Ol manmeri wantaim liklik mani i save lusim long masin na nogat bilong haus. Em i ting olsem masin i no gutpela long kantri.

Dispela toktok bilong praim ministra i bin kamap bihain long em i bung wantaim ol sios lida, bikman bilong komyuniti long Westen Hailans provins.

Ating lo bilong stapim poka masin bai kamap strong taim palamen i bung long Julai 23 na sampela lo bai kamap bilong stapim o larim ol mani man tasol long pilaim dispela masin.

Man husat i go pas long kisim poka masin i kam insait long kantri, John Nilkare i tokaut olsem em i tingting long kisim takis mani long poka masin haus na helpim long developim spot insait long kantri. Em i tok i bin gat lo i stap bilong ol dispela masin i ken stap long wanpela hap tasol na i no long olgeta hap. Tingting bilong em long lukim olsem ol manmeri wantaim mani tasol i ken dispela masin.

Tasol dispela bilip bilong "papa bilong poka masin" i no bin kamap tru. Kainkain liklik bisnis tu i laikim poka masin na planti hap i kamap. Lo i no tok orait long dispela kain samting bai kamap tasol ol man i no luksave long dispela lo.

Ol i givim aut laisens long kainkain manmeri. Ol dispela bisnis i larim ol liklik potnait lain tu i go insait bilong traim laki bilong ol.

## Famili bagarap

Papa pilai poka masin na mama wantaim ol pikinini kisim taim long haus. Planti leba na sekyuriti wokman i tingting olsem ol bai winim bikipela mani. Wanem liklik ol i kisim we inap lukautim famili i no save kamap long haus.

Papa i tingim poka masin taim em lukim pe bilong em na em i go pastaim long poka masin haus.

Wanpela K10 i go. Em ting neks K10 bai em win. Mekim olsem i go tasol samting ya i save gris. Wankain olsem pilai kas o binggo. Yu bai tingting laki bai kamap. Sampela taim ol man i no save slip long nait. Ol bai kisim piksa bilong poka masin na wanem mani ol inap winim tumoro. Ol save tok ol bai kisim "ful haus" tumoro. Ful haus long poka masin i min olsem olgeta namba o wanem kain piksa i stap long poka masin bai sanap long lain.

Wanem liklik mani ol i gat i save go nating tru na apinun ol i save sikirapim het bilong ol na go long haus nating.

Sampela mama i gat wok mani na i save lukautim famili taim papa i mekim dispela pasin. Sampela famili i save lukluk long han bilong papa tasol i stap. Taim papa pilai poka masin na i go kamap long haus nating, em nau taim bilong famili long pilim pen long bel na het. Planti famili i save dinau long stua o taka sop i stap klostu. Dinau i save go antap yet. Ol famili i stap long siti o taun we nogat wanpela gaden bai go we? Ol nogat gaden long kisim kaikai.



• Planti taim ol konman tu pulap long poka masin haus na grisim yu long mani, bia na smok.

Pikinini inap stil o lusim skul taim nogat skul fi. Meri inap go pamuk taim nogat mani. Pikinini gel inap go raun nabaut taim nogat mani.

Ol i kamapim masin bilong grisim ol manmeri long pilai tasol ol i no kamapim rot bilong grisim ol long lusim masin. Dispela gris bilong pilai masin i stap bikipela insait long ol pilai man. Ol i save tingting long win olgeta taim tasol dispela em bilip bilong ol man na masin i no save wok olsem.

Ol man bilong ples i save gat gaden i mas orait liklik bikos kaikai i kam fri long gaden. Ol holim wanem liklik mani ol inap yusim long haus sik, kompensesen, braid prais o wanem narapela hevi save lus nating na taim bilong dispela kain hevi i kamap, ol i save sikirapim het bilong ol na stap tasol.

Ol man i kamapim masin. Ol i mekim o progremim masin olsem masin i mas noken givim win mani winim bikipela mani papa bilong masin i kisim. Olgeta taim em save givim aut wanwan win o planti taim em i no save givim aut win.

Planti mama tu save sindaun long fran bilong ol dispela masin. Sampela taim bai yu lukim tupela marit karim olgeta mani na go sindaun pilai laki i stap. Planti taim tupela bai lusim bikipela mani na go long haus nating. Ating ol dispela manmeri mas bisnis lain na pikinini bilong ol i save kaikai gut na ol i gat olgeta samting.

## Masin bilong husat?

Taim ol waitman i kamapim poka masin, ol i tingting long yusim long bikipela hotel we ol mani man i save go. Ol man husat i no inap wari tumas long lusim K5,000 o K10,000. Ol mani man i save laik pilai raun wantaim mani. Ol i no mekim bilong ol pipia man long setelmen o yu man bilong strit o wokman husat save kisim inap pe bilong lukautim famili.

Taim ol wait mameri i kam lukim yumi, ol i save lap i dai stret. Ol i save pilai laki taim ol i stap long holide na taim bilong malolo. Ol i no save lusim opis na givim siksti i go pilai wanpela gem pastaim.

Ol kamapim masin bilong ol biksot olsem yumi long Papua Niugini i save kolim ol mani man.

Masin ol i kamapim bilong grisim ol man long pilai yet. Wankain olsem smok na buai. Taim yu stat, yu bai ting olsem yu no inap lusim.

Masin i save grisim ol man long ol bai winim bikipela mani wantaim liklik bet. Fran bilong ol masin i save gat ol samting olsem taim yu betim K5, yu inap winim K10,000. Sapos yu betim K10, yu inap winim K100,000. Man, samting bilong gris ya. Yu lukim liklik K10 yu holim na

lukim K10,000 o K50,000 win yu inap mekim wantaim dispela mani, yu bai pasim ai na traim winim dispela bikipela mani.

Samting tru ol poka masin i save bungim olgeta liklik K10, K20 o amas yu betim na kisim bikipela mani stret.

Mani i no bilong ol i kisim fri olsem. Dispela K10 o K20 i kamap long hatwok.

## Gavman traim stapim

Taim gavman tok orait long kisim poka masin i kam insait long kantri, em i ting ol mani man tasol bai pilaim dispela gem. Tasol dispela samting i no kamap. Kainkain pipla man nabaut i laik traim laki na petim wanem liklik mani ol i kisim i go insait long masin. Olgeta nait ol i lus tasol na go long haus.

Gavman i apim takis bilong masin i go antap. Dispela tu i no stapim ol manmeri long pilai. Planti pulim lain i go long ol poka masin haus.

Ol mama, sumatin na sios grup insait long Madang i bin kamapim wanpela bikipela bung long Madang na stapim poka masin long go insait long Madang long 1998. Olpela gavana biong Madang, Jim Kas i bin tok maski na dispela provins i no lukim hevi bilong poka masin olsem ol narapela provins.

Provinsel gavman long kantri i bin lukim gutpela mani masin inap mekim na ol i tok orait long kisim masin i go long eria bilong ol. Tasol planti bilong ol dispela lain i luksave long wanem ol gutpela na nogut sait bilong dispela masin tude.

## Luksave long husat pilai

Givim wanpela kain kat. Wankain olsem ol man save kisim beng kat. Ol man husat laik pilai i mas putim dispela kat i go insait long masin na masin luksave na rekotim wanem kain mani em i betim, winim na lusim.

Long taim bilong givim dispela kat, gavman mas sekim amas mani dispela man i ken kamapim insait long wanpela yia? Em i gat amas pikinini, meri na man long lukautim long haus? Em i gat inap mani bilong pilai raun olsem? Em slip long wanem kain haus? Em gat wanem samting olsem haus, ka, bisnis? Ol pipel bai kisim bagarap long dispela pasin bilong em o nogat?

Sekim gut ol dispela hevi na bihain givim kat na tok orait long pilai.

Noken larim praivet kampani long ronim ol dispela samting. Gavman mas ronim wantaim strongpela lo na noken givim aut laisens nating long ol liklik bisnis nabaut. Givim laisens long ol bikipela hotel na motel i ronim dispela kain bisnis. I no liklik nait klab nabaut we nogat inap kastoma na ol i save traim pulim ol liklik man husat


bilong em long rausim poka masin.

## Long pinisim

Nesenel Geming Bod i bin kisim bikipela mani tru long poka masin, hos res na narapela laki haus insait long kantri. Planti bilong ol dispela mani i bin go long han bilong wanwan memba olsem fan long las na bipo las yia nabaut. Ol memba yet i kisim i go bek long wanwan ilektoret bilong ol na skelim long wanem kainkain rot ol i tingting long yusim dispela mani.

Ating sampela memba i yusim gut long kamapim developmen long ples. Tasol planti i yusim dispela mani long braibim ol wantok husat votim ol i kam long palamen. Dispela i no mani bilong ol tasol ol i mekim nabaut.

Palamen i kamapim lo bipo na i tingting long givim mani i go stret



• Ol man pilai poka masin i save holim bla wantaim. Em save gris liklik na yu lus nating.

nogat inap mani.

Planti mama na pikinini insait long kantri husat save bungim planti hevi bikos papa save pilai poka masin i kisim dispela toktok bilong pasim poka masin olsem wanpela gutnius.

Olgeta taim papa save lusim mani wansait na ol i save kisim hevi stret. Taim ol stapim, ating papa inap tingting moa long famili bilong em na kisim wanem liklik i go stret long haus.

Gavman bai stretim sindaun bilong planti famili sapos em stapim poka masin. Planti mama i bin lusim papa wantaim pikinini na stap ols yet i ken kam bek. Planti bagarap long haus inap kisim stretim moa. Ating ol pikinini i no inap lukim papamama i kros olgeta taim. Ating planti kaikai bai pulap long haus na ol pikinini i no inap hangre moa.

Planti mani inap lep bilong putim long beng na baim ol narapela samting tu. Ol i no inap dinau moa long stua.

Tingting bilong gavman long stapim poka masin i kisim bikipela sapot tru. Olgeta taim ol mama i putim yau long redio na laik harim wanem samting bai kamap.

Planti pipel husat bin painim hevi bikos long poka masin i amamas na sapotim gavman wantaim tingting

long developim spot tasol ol memba bihain tanim na yusim dispela pablik mani i kam long em na baim ambulens ka bilong sampela. Sampela i kisim mani tasol planti manmeri i nol kila yet long wanem rot ol dispela memba i yusim mani.

Ating ol memba i kamapim wanpela rot bilong pulim mani long ol pipel na pulumapim poket bilong ol yet. Olsem na tingting bilong Prait Ministia Sir Mekere Morauta long rausim ol dispela masin i mas go het.


Bilong wanem bai yu bagarapim famili? Famili i stap na yumi stap gut. Nogut yumi pipel i tromoi wanem liklik mani yumi holim na narapela man yusim na i no developim o yusim gut.

Bilong wanem yumi sapotim wanpela samting we inap bagarapim yumi. Poka masin i no inap helpim yu long wanpela rot. Bilong wanem yumi pulim lain na karim wanem liklik yumi gat go long poka masin haus na lusim long hap? Yumi tuhat na kisim mani, papa bilong poka masin i stap tasol na kolektim wansait. Yumi lusim, larim gavman pasim bikos ol memba tu i no yusim dispela mani gut.

Yumi pilai masin na ol paulim mani raun na husat bai developim kantri?



• Oi lida bilong PNGBC wokas yunion i bung na stretim ol rot bilong go het wantaim straik. Poto: JOE IVAHARIA. (Raithan) Memba bilong Lufa Mathias Karani i wokabaut wantaim ol sios lida taim ol i opim Yunaited Pentikostel haus lotu long Lufa las mun.



• Minista Henry Smith i putim mak bilong promosen bilong deputi komisina bilong Polisi na Edministresen, Girubane Moihaus. (Lephan) Mama na susa ya bilong Tambul i soim ol gaden ol i save wok long en long ples. (Aninit lephan) Oi dispela lain bilong BP tim i bin winim Susu Mama golf resis long las wiken. Poto: JOE KANEKANE. (Aninit raithan) Oi dispela famili i amamas long soim ol kabis ol i planim long gaden long Tambul eria, long Westen Hailans provins.





# Wari kilim mama



**B**IPO bipo tru long taim bilong ol tumbuna i gat wanpela man wantaim tupela meri na pikinini man bilong em i stap long wanpela ples. Dispela man i save stap wantaim namba tu meri tasol na i no save stap wantaim namba wan meri na pikinini bilong em.

Orait wanpela taim nau ol i kirap lusim ples na go long wanpela maunten bilong mumuim pik.

Taim ol i go kamap pinis long dispela maunten ol i putim ol samting bilong ol na stat long redim ol samting bilong mumuim pik.

Ol i mumuim pik wantaim ol kaikai bilong ples i no rais na tinpis long wanem i nogat ol dispela ol samting long dispela taim olgeta kaikai i tan pinis orait, ol i stat long tilim i go i kam long ol yet na stat long kaikai i go inap ol i pinisim, na sampela i stap long karim i go bek long haus bilong ol long ples.

Ol i redim pinis olgeta samting long go bek gen long ples na namba wan meri i tokim ol, "Yupela i stap ya pastaim mi i laik i go sekim wanpela samting."

Taim ol i wet i stap meri ya i kirap kisim pikinini man bilong em na i go long arere bilong maunten we wara i kalap i kam daun long en. San tu i go daun pinis na ples i kol na win bilong maunten i wok long mekim nois long diwai na ol bus.

Ol pisin bilong san i go daun i wok long lukim kain kala bilong dispela kain taim na i wok long singsing kra i sore.

Meri i sanap na i lukim dispela kain samting na bel bilong em i pas tru na tingting bilong em i senis i go narakain olgeta.

Em i stat long tingting i go bek gen ol kain



pasin we man tru bilong em i save mekim na em i pilim olsem em inap nau.

Em i kirap-tokim pikinini, "Yu go bek gen long ples. Mi bai kalap long dispela maunten i go daun na dai." Na meri ya i kirap i no wet em i kalap na i dai pinis.

Man i kam kamap na painimaut olsem meri ya i dai pinis na kra i kisim pikinini na go bek long ples.

**Philip Pais**  
Vanimo, Sandaun provins.

Nem: Ivan Aumari  
Krismas: 24 (man)  
Adres: Bundaia CIS, P.O. Box 96, Kainantu, EHP.  
Save laikim: Harim lotu singsing, wok na raitim pas i go long ol pen pren.

Nem: Igwas Lawop  
Krismas: 18 (man)  
Adres: Aitape Vocational Training Institute, P.O. Box 34.  
Save laikim: Harim musik, laitim long leta, sekim presen i go i kam.

Nem: Jim Peter (Capt 2000)  
Krismas: 15 (man)  
Adres: Aitape Vocational Training Institute, P.O. Box 34.  
Save laikim: Harim musik, pilai futbol, raitim lav leta, serim pasin na idias na go lotu.

Nem: Ronald Albert  
Krismas: 18 (man)  
Adres: Aitape Vocational Training Institute, P.O. Box 34.  
Save laikim: Harim musik, pilai futbol, kukim rais, mekim fan, kalkai ret buai na go lotu.

Nem: Ignas Lausep  
Krismas: 18 (man)  
Adres: Aitape Vocational Training Institute, P.O. Box 34, Aitape, Sandaun Province.  
Save laikim: Harim musik, raitim pas long pren na lukim muvi.

Nem: Don Alberth  
Krismas: 18 (man)  
Adres: Aitape Vocational Training Institute, P.O. Box 34, Aitape, Sandaun Province.  
Save laikim: Watchim muvi, waswas long nambis, harim musik na go lotu.

Nem: Raymond Kuma  
Krismas: 18 (man)  
Adres: P.O. Box 39, Kawantu, EHP.  
Save laikim: Pilai ragbi, serim aidias, lukim ples na watchim muvi.

Nem: Delilah Gol  
Krismas: 15 (meri)  
Adres: PNG Institute of Medical Research, P.O. Box 378 (IMR) Madang.

Nem: Eugene James Ruma  
Krismas: 17 (man)  
Adres: Code Provincial Centre, P.O. Box 2071, Yomba, Madang Province, PNG.  
Save laikim: Go long skul, raun wantaim ol poro, tok pilai, raitim pas na planti moa.

Nem: Ruddy Mosek  
Krismas: 18 (man)  
Adres: P.O. Box 721, Madang, Madang Province.  
Save laikim: Singim songs, raun long taun, stori wantaim pren, salim pas na senisim presens, watchim TV, mi promis bai mi bekim olgeta pas mi kisim.

Nem: Peter Yasang  
Krismas: 26 (man)  
Adres: Markham Valley High School, P.O. Box 379, Lae, Morobe Province.  
Save laikim: Mekim pen pren wantaim sampela man-meri long narapela provins na long Papua Niugini.

Nem: Haruna Rashid  
Krismas: 18 (man)  
Adres: P.O. Box 1312, Cape Coast.  
Save laikim: Mekim pen pren.

Nem: Gilbert J. Ruben  
Krismas: 16 (man)  
Adres: Kapiura Plantation, Kautu (2), P.O. Box 451, Kimbe.  
Save laikim: Pilai soka, basketbal volibal, wokim gaden, go lotu, harim gospel musik, harim pop musik, senisim ol presens na i go waswas.

Nem: Peter Mothimbu  
Krismas: 18 (man)  
Adres: Ogelbeng Vocational Training Centre, P.O. Box 1157, Mt Hagen, Western Highlands Province.  
Save laikim: Harim musik na serim tingting na i stap ol pilai raun na i stap.

Nem: Bruno Thomas  
Krismas: 19 (man)  
Adres: Frontier Holdings (RH), Purari Base Camp, P.O. Box 28, Baimuru, Gulf Province.  
Save laikim: Wok mani, go long lotu, mekim pren wantaim ol narapela lain na painim wanpela gutpela meri long maritim.

Nem: George Kaa  
Krismas: 25 (man)  
Adres: George Kaa, C/- George Ecdima, Express Freight Management, P.O. Box 3398, Lae.  
Save laikim: I go long yut program lotu rom 12:1-2, pilai basketbal soka, wokim pren wantaim meri na rait i go kam long kamap pren.

## Papamama pasim rot bilong meri asples

**DIA Laiplain,**

*Mi wantaim gelpren bilong mi i bilong wanpela ples tasol. Mitupela i bin pren long tupela krismas olgeta na nau mitupela i pasim tok long marit.*

*Papamama bilong mi i laikim mi mas maritim wanpela wok-meri tasol mi no laikim dispela bikos mi laikim tru dispela meri wantok bilong mi. Nau i gat kros namel long mi na papamama bilong mi.*

*Laiplain, bai mi mekim wanem long grisim papamama bilong mi bai ol i wanbel na mi ken kamapim laik bilong mi stret long husat mi laikim long maritim?.*

**Dia Pren,**

Mipela i lukim pas bilong yu na mipela i klia olsem yu stap wantaim kros namel long papamama na yu yet long wanem meri tru bai yu maritim.

Yu bin askim Laiplain long



helpim yu long mekim ol papamama bilong yu i wanbel long yu ken mekim disisen bilong yu long maritim dispela meri wantok bilong yu na ol tu i ken wanbel. Dispela em wanpela samting we i kamap bikpela tude long nupela pasin bilong Melanesian sosaiti, long pasin bilong ol yangpela husat i save lusim ples na go long wok o skul.

Ol papamama i save gat strongpela tingting yet long makim gutpela meri bilong pikini-

ni man bilong ol. Tasol planti pikinini man i save ting olsem ol yet i ken skelim gut na painim gutpela meri bilong ol yet.

Disisen bilong ol yangpela kristen man na meri long bihainim toktok bilong papamama bilong ol o bihainim laik bilong ol yet i no save isi long kamapim.

Tupela rot wantaim bilong makim meri o man bilong maritim i save kamapim hevi tu. Sapos yu harim tok bilong mamapapa bilong yu na maritim wokmeri, yu bai pilim olsem yu gat bel nogut yet long mamapapa bilong yu taim hevi i kamap bihain na yu bai wari tru long wanem yu i no bin bihainim laik bilong yu yet.

Sapos yu gat hevi we yu laik autim long mipela, rait i kam long dispela adres: Lifeline Counselling Service, P.O. Box 6047, Boroko, NCD. Yu ken kisim mipela long Telipon namba: 3260011 (Kaunselin) na 3261680 (Opis). Bai mipela i putim ol trupela hevi we yu autim long niuspepe tasol mipela i no inap autim tru nem bilong yu. Taim yu rait i kam, salim trupela nem na adres na bai mipela i salim bek bekim bilong yu. LAIPLAIN

Long narapela sait tu, planti yangpela husat i no bihainim laik bilong mamapapa bilong ol i save painim hat long askim papamama bilong ol long helpim ol taim hevi i bungim marit laip bilong ol.

Mipela i ting yu mas toktok gen wantaim mamapapa bilong yu na ol i mas tokaut wanem as tru long dispela tingting bilong ol. Sampela taim ol papamama i save mekim asua bikos nogut ol i gat bel kros i stap na i stap insait long tingting bilong ol o nogut, ol i gat gutpela tingting moa long tingting yu gat.

**LAIPLAIN.**

# KANAGE

"Em nau, narapela wik bilong mi ken"



Taim ol poroman bilong Kanage i harim dispela, ol i lap i go na bel bilong ol i pen nogut tru na spak bilong ol tu i pinis nating.

**Masta Wai Mosbi**  
Kanage i save wok long haus bilong masta. Em i no save long toktok long telepon olsem na em i no laikim tru bai telepon i krai taim masta i no stap long

haus. Wapela taim masta i go aut na Kanage yet i wok long haus i stap na telepon i krai. Kanage i pret long toktok long telepon olsem na em larim telepon i krai longpela taim nating. Tasol bihain em i tingting i go na em i wok holim telepon na bikmaus. "Yu tok." Na man long telepon i tok, "Raka i stap?" Na Kanage i bekim, "em i no tap." Man long telepon i harim na askim gen, "yu tok wanem?" Na Kanage i tok "em tu i no tap."

**Masta Wai Mosbi**

begim susu bilong tupela long nus, pes, ia na maus bilong pik bai pik i tanim kamap pik susu." Taim olgeta manmeri i harim, ol i lap nogut tru na tupela meri ya i kisim bikpela taim tru long toktok bilong Kanage.

**Tuckwell Tundema Lae**

Ol manmeri i wok long kros long nupela misin i kam long ples bilong ol olsem na bikpela toktok i kamap. Kanage i sindaun na i no harim gut olsem na em i suruk i go klostu long harim gut as bilong toktok. Taim em i kamap klostu em i harim gut olsem ol lain i kros long nupela misin i kam long ples bilong ol. Olsem na Kanage i kirap na bikmaus, "siaman, mi laik tok olsem, maski nupela misin na olpela misin, olgeta bai i go ihsait long gutpela kondom bilong ples antap." Taim olgeta manmeri i harim olsem Kanage i tok kondom, ol i les long toktok moa na ol i lusim miting na go nabaut.

**Tuckwell Tundema Lae**

Kanage lusim haus na i go slip long bus wapela wik olgeta long painim abus. Long Sarere em go bek long ples na meri bilong em lukim olsem nogat abus na em kros nogut tru na tok, yu westim taim long slip long bus na nogat abus olsem wanem?. Kanage pilim nogut tasol em tokim meri bilong em olsem, "Mande mi sit nating, 2 de mi sit nating, 3 de mi sit nating, 4 de mi sit nating, Fraide mi sit nating na Sarere mi kam kamap, yu orait ah laka?" Meri nogat toktok na paul olgeta na lno moa toktok long Kanage.

**Francis Wapia Yaka Goroka.**

Kanage wantaim pikinini i go waswas long wara na junia i rausim trausis na kalap pas long wara na waswas. Bihain em tokim paps Kanage, yu rausim spot wea na kam long wara. Kanage isi tasol rausim spot wea na pasim namel bilong em wantaim tupela han na wokabaut isi i go long wara long waswas: Taim em i go sindaun long wara, junia i askim em, "paps, yu haitim wanem samting long han bilong yu ya?". Na paps Kanage kirap na tok, "mi haitim bubu bilong yu: ya. Bipo em i bin pait long woa na kisim yu kam long ples bilong yumi ya." Junia i harim na paul olgeta na em tekov pas i go long haus na Kanage i stap yet long wara na pilim bikpela hevi olgeta bikos junia bai i go na tokim mama bilong em gen long haus.

**Saki Simpson Kainantu.**

Kanage wantaim liklik junia i stap na Kanage i save hait na pren wantaim wapela meri. Meri ya i gat wapela pikinini meri tu na man bilong em i dai pinis. Tasol junia Kanage wantaim pikinini meri bilong meri ya i save pren hait tu long mama papa bilong tupela. Wapela taim Kanage i lukim tupela i hait na gris istap na em i go na krosim tupela nogut tru. Em

i tok long tupela ino ken pren moa. Kanage i tokim junia, hau bai yu prenim susa bilong yu gen?". Na junia Kanage kirap na tok, "paps, yu save mekim ol samting wantaim bagarap na mi save mekim ol samting wantaim sikirap bikos taim bilong yu em pinis na nau em taim bilong mipela." Kanage harim na nogat toktok olgeta na em tok, "go het son."

**Robert Timothy Maprik**

Ol yangela manki long Wewak i wok long smokim mariwana i stap taim paps Kanage i kamap. Ol i lukim Kanage na askim sapos em i laik pulim liklik. Kanage lap tasol na tokim ol, taim mi yangpela, mi save kilim ol traipela bikpela bandol smok ya. Ol boi larim em smok na pinisim na kalap antap gen long narapela i go na em aut olgeta na pundaun slip. Em nau ol boi i kirap tasol rausim olgeta su, han was, het na mani bilong em long poket na tekov nabaut.

**Rodney Noupura Ambunti**

Kanage i go raun long Mosbi So. Long dispela taim nau, Kanage i kamap bikman na em i gat bikpela mausgras na skin gras tu i planti. Em nau paps Kanage i raun i go na go kamap long banis ol i save lukautim ol enimol long en. Kanage i raun lukluk long ol enimol i go na kamap long banis bilong ol gorila. Wapela bikpela gorila i lukim Kanage i kam na em wisel long em. Tasol Kanage i no bisi. Tasol gorila ya i wisel strong gen na taim Kanage tanim na lukim, gorila ya i tromoi han long Kanage i kam long em pastaim. Olsem na Kanage tanim na wokabaut i go long gorila ya. Taim Kanage kamap klostu long waia banis, gorila i surik i kam klostu tu na askim Kanage isi tasol olsem, "pren, yu brukim banis na go ausait olsem wanem?". Gorila ya i ting Kanage em wapela gorila tu bikos Kanage i gat bikpela mausgras na planti skin gras tu wantaim.

**Taiisi Wabeth Mosbi**

Kanage na kandre bilong em sindaun long pmv na pulim stori i go. Tupela i wok long stori long ol yangpela meri bilong Lido na stori i go swit moa long maus bilong tupela stret. Antap long pmv ka tu em wapela yangpela meri bilong ples Kenex tu i stap. Em harim na tokim Kanage olsem, "yu wet, bai mi go na tokim misis bilong yu olsem yu wok long stori na aigris long ol meri Lido". Kanage harim na bekim long tok ples olsem, "da bol bol eh". (mining olsem, no ken go tokim em) Tasol meri Kenex ya i harim tok ples ya i krangi na bekim tok gen olsem, "yutupela yet i go dabolim em". Taim olgeta manmeri long pmv i harim olsem, ol i kilim skin stret long lap indai.

**Taiisi Wabeth Mosbi**

Wapela taim Kanage i raun long Wewak taun i go apinun. Em

nau boi nogut i kalap long wapela pmv na i laik go bek long ples. Em kalap long wapela liklik 15 sita bas na sindaun long fran. Bas i ron i go na stop long kisim wapela yangpela meri. Meri ya i go insait long bas. Taim em bendaun long brukim sit, as bilong em i begim Kanage long pes bilong em. Turangu Kanage i kaunim sta stret. Taim bas iron i go na stop, meri ya i go daun. Wapela poroman bilong Kanage i sindaun long bas tu na lukim dispela hevi i kirap na tokim Kanage, "meri ya i bagarapim yu tru ya". Kanage kirap na tok, "mi ting wapela hap saksak i pundaun long maus bilong mi tasol nogat. Olgeta meri i save min long mekim kain olsem long mi ya. Wapela taim bai mi sapim tit bilong mi wantaim fail na mekim em sap na sapim tang bilong mi tu i go longpela olsem snek. Husat meri i laik traim gen, larim em i kam. Bai em ting resa i karim em o snek ikaikai em".

**Joker Apex Ambunti, Is Sepik**

Ol turis i raun long Sepik wara na Kanage i ron i kam long bungim ol. Em i laik wokabaut wantaim ol turis na soim ol ples na ol samting. Olgeta manmeri i karim ol bilum, kaving na ol kain kain samting ol i mekim i kam long ol turis i baim.

Wapela waitman turis i kirap na tokim Kanage, "you people are good at carving wood and making clay pots". Tok inglis bilong waitman ya i kirapim bel bilong Kanage long tok inglis tu ya. Kanage kirap na tok, "we can make plenty of this kind, custom and tumbuna sospen and kaping". Taim kaunsel bilong ples i harim, man em amamas nogut tru na sikan long Kanage. Turis i tanim na lukim mak bilong tatu long bros bilong kaunsel na em askim Kanage, "whats this?". Na Kanage kirap na bekim, "this body is pukpuk". Kaunsel amamas nogut tru na apim nem bilong Kanage.

**Joker Apex Ambunti, Is Sepik**

Bikpela soka tonamen i laik kamap long Vanimo. Olsem na Kanage askim tupela kandre bilong em long ol tripela i raun i go na lukim pitai. Em nau ol tripela i go waswas. Na Kanage rausim wapela hap botol na tokim tupela long kisim pauda bilong botol ya na waswas long en. Tupela kandre i askim Kanage, "em wanem samting ya?". Na Kanage tok, "em sempu ya, bai i mekim skin i smel nais na ol meri bai pundaun long yumi". Man tupela kandre i laikim tru dispela na tupela kapsaitim dispela pauda long het bilong tupela na waswas. Taim ol tripela i waswas, man wankain strongpela smel olsem kari i kamap long skin bilong ol. Nau tupela kandre i askim, "Kanage, pauda ya i smel kari ya?". Na Kanage tok samting ya i gat kik ya, mi kisim long Jayapura i kam bilong autim ol meri ya". Samting tru em, ol man i trikim Kanage na Kanage i westim mani long baim kari.

**Taiisi Wabet Mosbi**

**K**anage wantaim meri bilong em i go long klinik long ples Wirik. Taim nes i lukim misis Kanage em sori nogut tru bikos misis Kanage i no save spesim gut ol pikinini na ol i wok long hipim i go antap tasol. Nes i toktok long misis Kanage pinis na em tanim bek long Kanage na tokim em, "lapun, yu mas traim na tokim spes long ol pikinini bilong yu. Gutpela long yu mas yusim kondom ah." Kanage harim na sikirapim het long ai bilong planti manmeri long haus sik na em bikmaus long nes olsem, "Papa bilong yu kamapim yu wantaim kondom ah, harim ol tumbuna bilong mipela long bipo ino save yusim dispela kain gumi o raba o plastik nabaut ya. Dispela gumi ya i no save mekim bel kirap." Nes i paul long toktok moa na rausim Kanage wantaim meri bilong em i go ausait long klinik.

**Buka Tee Rainbow**

Kanage i save go wok na taim ol pikinini i bikhet long haus, meri bilong em save kilim ol nogut tru. Wapela taim Kanage i go wok tasol em pilim sik na kam bek long haus. Taim em i kam bek, em lukim meri i kilim nogut tru wapela pikinini bilong tupela. Kanage i belhat na inglis long meri bilong em, "yu rabis, use your common sense". Taim meri bilong em i harim, em ting Kanage i tok nogut long em na em bikmaus long Kanage na tok, "yu yet kaikai".

**Dreadzii Wai Finsafen**

Kanage wantaim ol poroman bilong em i dring spak i stap na bia i pinis. Olsem na wapela poroman i kirap na kisim OMO, Mavolin na spre bilong skin, na tok, sapos yumi miksim dispela bai yumi ken dring na spak i go tulait. Kanage i lukim dispela na bel bilong em i nogut na em tok, "yupela laik giaman na kilim mi ah. Mi no inap dai na lusim meri pikinini bilong mi. Sapos meri na ol pikinini bilong mi i dai pastaim em orait bikos mi yet i ken karim ol na planim ol."

Kanage i tok moa olsem, "mi no laik bai mi dai pastaim na narapela man i maritim lewa meri bilong mi na kamap papa long ol pikinini bilong mi. Sapos mi dai na wapela man i maritim meri bilong mi na papa long ol pikinini bilong mi, bai mi wetim dispela man long heven. Sapos em i kam, bai pait i bruk long hap rot na bihain mitupela i ken go kamap long kot".

Kanage i go lukim bikpela singsing long Watabung na al bilong em i pas tru long wapela meri Simbu i bilas stail tru na danis i stap. Al bilong Kanage i pas long meri ya i go na taim meri ya i lukluk i kam long Kanage, Kanage brukim ai na small long meri ya. Tasol meri Simbu i kirap na tokim Kanage, "tu bed". Kanage harim na ron i go long haus na wokim tupela naispela bet bilong slip na tekov i go bek long ples bilong singsing. Taim meri ya i lukim Kanage gen, Kanage i kirap na tokim meri ya, "yu tok ya, mi wokim tupela bet pinis". Taim meri ya harim em tokim olgeta manmeri na ol i lap. nogut tru long Kanage na Kanage kisim bikpela sem nogut na tekov i go bek long ples bilong em long Henganofi.

**Samson Oumba Goroka**

Kanage bilong Sepik na em i go raun long Mosbi. Em i go long Gerehu na lukim wapela yangpela meri Papua i sanap kaikai ais krim na em waia lus olgeta long meri ya. Em kirap tasol na tok isi long meri ya olsem, "ah sori lewa, yu kering it ya". Meri Papua harim na belhat na bekim, "what carrying it, you dirty pig." Taim Kanage harim em bekim isi gen, "thats okey, never mind, but you carrying it tru tu."

Meri Papua harim na lus long dispela hap.

**Harry Bainor Lae**

Ol manmeri long ples i pasim tok long baim tupela pik bilong mekim bikpela kaikai long ples. Ol i tok long baim pik bilong ples na tupela yangpela meri i tok long ol i mas baim pik susu. Kanage i sindaun harim na em bekim, "harim ah, yumi ken baim pik bilong ples na tanim i go kamap pik susu. Em i no hat." Taim yumi baim pik bilong ples i kam, tupela meri ya bai

**KANAGE**

**OL TURIS GO RAUN LONG PLES BILONG KANAGE...**

YOU PEOPLE ARE GOOD IN MAKING CLAY POTS AND CARVINGS!

HE! HE!

**KANAGE BEKIM LONG TOK ENGLISH NA KAUNSEL BILONG PLES I AMAMAS TRU LONG KANAGE...**

YES! WE MEKIM PLANTI CUSTOM TUMBUNA SOSPEN EN KALSA KAPING!!

TRU?

GUTPELA TRU NA KANAGE SAVE LONG TOK PLES BILONG OL!

**NAU TURIS I LUKIM TATOO LONG BODI BILONG KAUNSEL NA EM ASKIM...**

WOW! WHAT ARE THESE TATOO MARKS FOR?

!!

!!

**NA KANAG I BEKIM...**

DIS IS MAK OF MASALAI PUKPUK! DANJERES PUKPUK!

WHAT THE HELL IS PUKPUK!

EM NAU!

# Senisim rijinel memba

**Dia Edita,**  
Mi laik bekim pas bilong Hizoron Hendie i bin kamap long wantok long Jun 7, 2001.

Tok bilong yu i stret long senisim rijinel memba bilong Is Sepik provins. Nogat developmen olsem na yu putim wari bilong yu.

Yes, developmen i no inap kamap nating sapos yumi olgeta putim het wantaim long kirapim developmen.

Mi save lukim olsem olgeta pipel bilong Is Sepik i les long kirapim developmen.

Is Sepik pipel i gat nem long pasin bilong kirapim rul na regulesin bilong ol arapela taun na siti tasol taim ol i kam long Wewak ol yet i save

bagarapim.

Spotim buai nabaut long publik ples na i no wari long lukautim taun.

Ol saveman long Is Sepik holim bikpela papa olsem digri klostu tasol nogat wanpela i kam na putim mani long kirapim developmen.

Olsem na sapos yu laik traim nupela hos orait nogat samting, kam long ples na i taim.

Sapos no gat orait, yu yet ken resis long 2002 na traim wok politikis isi na i no isi.

Nogat yumi i stap long sait na toktok nating.

**Michael Sam Saulia  
Yangoru, Is Sepik provins.**

# Wok developmen long Nawaeb

**Dia Edita,**  
Dispela pas mi laik bekim bilong bikman yu Fireka Okugo i kamap long Wantok niuspepa long Jun 7, 2001.

Mi ting yupela ol lain Nawaeb i ken amamas long wanpela man husat i karim tru nem bilong yupela Nawaeb. Wain, Erap, Boana nau long provins na rijen.

Dispela Wenges

famili i gat long wok politikis, saveman bilong wok bilong gavman.

Yu ting inap long kamapim moa developmen orait nogat yu tok-tok tasol long niuspepa traim na kalap long bikpela hos na ka na traim wok politikis.

Mi les pinis long sindaun toktok long wok developmen bai mi traim

long kalap long hos en ka na mi traim bringim senis long ples.

Olsem na mi laik traim 2002 maski long sindaun komplek, redi na yu ken winim feverte hos bilong Morobe provins na Nawaeb.

**Michael Sau Savila  
Urimo Kaunal,  
Is Sepik provins.**

# Meri i no samting nating

**Dia Edita,**  
Mi man i laik sapotim wanpela pas i kam long Wau, Morobe provins na dispela pas kamap long Wantok long Feb 2, 2001.

Dispela pas i bin toktok long ol musik man bilong Papua Niugini is ave singsing long ol meri.

Yes, mi yet tu save harim sampela ben, moa yet i kam long ol Papua na long Rabaul na i no ol tasol i gat sampela ben tu long narapeal provins. Tru tumas mi save les long harim ol i singsing meri, meri oltaim.

Ating yupela save painim singsing o wanem? I gat ol tumbuna singsing i stap, yupela ken tanim i go kamap long musik olsem ol Madang i save wokim.

Mi save harim ol Madang i save komposim ol stori singsing na i save saun olsem ol tumbuna singsing gat ol kain singsing olsem em i orait liklik.

Meri em samting nating bai yupela singsing oltaim long en.

Askim yupela bin kamap olsem wanem long dispela graun? Yupela bin pundaun i kam long skai?

Yupela i no save sem long ol mama, susa, wanlain bilong yupela

taim yupela save singsing long ol meri?

Antap long ol askim long mi laik reisis wanpela hap poin long hia. Yumi bin kamap long dispela graun long meri, em man i save kamap olsem.

**Francis Rakaeriri  
Kunua, Bogenvil.**

# Asua long kolim nem

**Dia Edita,**  
Mi wanpela manki i wanbel long bilip muvmen long Simbai na ol misineri wok ol i kamap long Simbai. Ol tru tru bilip na karimaut dispela wok bilong God aninit long haus misin tasol mi harim long wanpela midia long NBC njus ol i tok ol Baptis i kukim haus na bagarapim ol manmeri long Simbai em ol giaman.

Long stretim tok em ol brek awe lain em Duan ministri ol

dispela lain i no Baptis. dispela lain i hat nem na ol em liklik lain tasol.

Ol Baptis stap na orait long Simbai. Husat yu laik kisim kain ripot olsem inap yu go klostu long haus lain na kisim. Plis no ken stap longwe na harim tasol long mau bilong narapela man na bagarapim nem Baptis.

Mi bin groa aninit long Baptis misin na mi save Baptis i nogat dispela pasin.

# Politiks paulim ol pipel

**Dia Edita,**  
Mi wanpela man long Westen Hailans provins long Baiyer distrik long Mul Baiya open.

Mi laik autim wari bilong ol grasrut long provins bilong mipela.

Ol rot i bagarap na ol trenpot mani i wok long antap na ol haus sik fi tu i wok go antap antap moa yet. Ol rot bilong ka i wok long bagarap long ol foapela kona bilong provins na mipela i wok long karim ol ka na klostu bun bilong mipela i bruk. Mipela i gat ol etpela memba long provins na wok i no go stret.

Mipela i save olsem long het bilong wan wan manmeri, gavman i save basetim K20 long

EDF tasol dispela mani go we nau. Dispela em i asua bilong ol sikispela memba o gavman bilong nau na mipela i no kisim ol sevis long provins.

Mipela ol grasrut i laikim sevis long ol wan wan distrik bilong mipela na mipela i no laikim pasin politikis bilong yupela.

Pasin bilong tingim mi yet na i no tingim arapela pulap long provins. Kain ples olsem Baiya, Lumusa na Jimmy Veli na Tigi na Tapiboga na Is Kambia na Wes Kambia na Tambul mipela i pilim bikpela pen na memba i go we nau.

Neks yia em taim

bilong ileksen na mipela i no laik long pasin bilong giaman na braiberi. Tu olsem memba ol manmeri ol i makim em yu man tingim ol pipel bilong yu.

Na no ken pasim ol man bilong ol manmeri we ol i laikim sevis bilong gavman.

Ol memba i laik

promis okay promis bilong ol i mas kamap tru na maski long pilai politikis na yusim mipela ol grasrut olsem tuls bilong yupela kisim pawa.

**Kundi Nuki  
Mt Hagen, Westen  
Hailans provins.**

# Tok pisin i swit moa

**Dia Edita,**  
Mi wanpela sitisen man bilong Sandaun. Long 1992 ileksen Gavana John Tekwei i win na i no gat wanpela wok kamap long sikispela distrik long Sandaun.

Long 1997 ileksen i kamap na wankain samting yet, i nogat wok kamap.

Ol promis em i bin kempen na i win long em: Amanab Grin Timba Kampani, Wewak Welo, Frida Main i operet long 2000, Vanimo Grin Haiwe, Aitape Nuku rot, Aitape Lumi rot.

Dispela sikispela ol projek i helpim em long win. Na nau 2002 bai em i win long wanem samting em kamapim long sikispela distrik. So em i no ken pilaim Fri Tred Zon bai em i winim ileksen long em.

Mi askim yu Gavana memba bilong Sandaun, yu mas stop na larim nupela man long bus i kisim long wanem promis bilong yu i no gat wok kamap long en. Gavana Tekwei mi laikim yu. Salim ol opisa bilong yu na ol mausman bilong yu long ples Lito Waram kempen long yu long bus.

Gavana Tekwei tok pisin bilong yu i swit moa yet klinim Ramu Suga fektori.

**Samson Narkibua  
Vanimo, Sandaun provins.**

# Laikim smatpela meri

**Dia Edita,**  
Mi bin kamap insait long kain kain hevi long femill laip, wok sios, skol, helt, bisnis na arapela bikpela hevi moa.

Nau yet mi lainim ol dispela hevi inap long tupela yia pinis na mi kamap pinis long gutpela mak bilong save long bhainim wok developmen.

Mi i no bin skol long bikpela skol tasol mi skelim mi yet olsem mi inap pinis long mak bilong bikpela save bilong bhainim wok

developmen long ples manmeri. Tasol wanpela bikpela hevi em sait bilong save manmeri. Mi save laik prenim na maritim wanpela meri i gat pasin rispek, toksori na i save stap isi na stret. Na i gat bikpela save bilong stiaim wok bisnis insait long wanpela kampani. Em i mas i gat tingting long kamap sitisen bilong dispela grup o kampani.

**Sajo-E.  
Lae, Morobe  
provins.**



**Toksave i go long ol manmeri  
husat i save salim pas kam long  
Wantok Niuspepa.  
Sapos yu no putim nem tru bilong  
yu long pas bai mipela i no inap  
prininim pas bilong yu.**

# Makam hetwara bai resis

**Dia Edita,**  
Mipela ol bratasusa, papamama na famili bilong yupela long Makam het wara bai i gat kendidet i sanap long 2002 nesenel ileksen, na dispela em namba wan taim tru bilong dispela graun.

Olsem na yu husat long Makam Veli, Leron, Wantoat na Onga Wafa i bel kirap na tu i gat pasin bilong sori i kamap plis tingting finga bilong yupela long 2002 ileksen.

Mipela i bin tingting long yupela long bipo yet i kam inap nau na nau na mi yet i laik sanapim kendidet bilong mipela na tu em pes taim tru.

Long dispela tingting em mi Yangkwan paris na Yawa paris i kamapim dispela tingting. Sapos yu kendidet i laik i go isnati tingim olsem bai yu i no inap kisim singel wan vot nogat tru bikos mi helpim yu inap na tu mi i no lukim wanpela han mak bilong gavman long wokim dispela graun i kamap inap nau. So bai mi tok klia olsem mi pikinini man tu ya, mi i gat trausis

mi i no pulim sket bai mi traim 2002 gem. So mipela i laik tokaut klia olsem i go long publik long Morobe na Papua Niugini olsem.

Sapos yu husat pati i laik sapotim wanem kendidet bilong Makam open orait tingim mi antap long Makam Het Wara dispela tupela paris ya, Dispela em i no selp appointed kendidet o mani man, na tu hangre pawa kendidet no gat, em paris o pipel yet i makim na em bai mipela yet i sanapim em olsem 2002 nesenel ileksen kendidet.

Mipela tok klia long publik olsem mi pikinini man ya bai mi traim so plis kendidet bilong open illektorot tingting gut na kam insait bikos no gat singel wan vot bai yu kisim em tasol.

Las tru olsem i go long olgeta Pati Lidas Kodinet Siaman long Morobe kendidet bilong mipela nau em i stap na pes pati em i bilong em.

**Gipsen Kendy  
Kaipit, MP.**

# Wantok sistem kamap bikpela long Sandaun

**Dia Edita,**  
Mi wanpela manki Grin Riva na nau mi stap long Vanimo taun.

Hammas yia mi stap long hia na mi save lukim pasin bilong wantok sistem i kamap bikpela tru long Sandaun.

Wantok sistem em i bikpela woc j gat planti mining. Yu kisim man long wok o yu no kotim wantok bilong yu taim em i mekim wanpela rong na planti moa.

Wantok sistem em i gutpela long yu man husat save mekim dispela pasin tasol long mi na ol arapela em wanpela las pasin.

Dispela pasin yu ken mekim sapos yu wanpela manesa bilong kampani o kontrak tasol yu mekim em bai orait tasol long

Gavman Dipatmen. Em i no gutpela pasin bikos man husat askim long wok long dipatmen bilong yu em i gat save na mekim dispela wok olsem na em i kam askim na i no wantok tasol i gat dispela save.

Narapela bai yu ripo-tim narapela man husat yu no save taim em i mekim wanpela rong. Yu bai kotim em tasol wantok nogat sori tru. Em nau bai yu bagarapim yu yet na wantok bilong yu na yu sapotim em long mekim moa yet.

Bikos yu mekim olsem yu ken bagarapim wanem dipatmen yu na wantok i wok long en. Yu tupela i ken pasim tok na mekim na olgeta i safu bikos

husat bai pretim yu. Sapos narapela man i wok wantaim yu em bai yu pret na em tu bai pretim yu, so olgeta samting bai orait tasol.

Mi lukim olsem wantok sistem nau i wok long bagarapim kantri bilong yu. Dispela pasin em i stat antap long ol papa bilong kantri olsem praiwet minista, ol minista, gavman opisa, komyuniti memba (LLG) members na ol grasrut tu.

So tok bilong mi olsem dispela pasin mas stap nau na bai kantri, provins, na distrik bai ran orait tasol.

**Naksie P. Nakmed  
Vanimo,  
Sandaun provins.**

# Lukautim ol pipel

**Dia Edita,**  
Mi laik autim hevi bilong mi go long ol nesenel Gavman. Taim ol i lukim dispela ol pipel bilong Papua Niugini olsem wanpela samting nating mipela i no pik na dok o kakaruk. Mipela ol man.

Yupela mas lukautim mipela gut. Wanem kain samting nogat i laik i kam insait long kantri bilong yumi orait yupela na stapim mas tok no. Na stopim dispela samting hariap.

Em pasin bilong lukautim ol pipel. Nau yumi lukim wanpela bikpela piksa stret i kamap long Mosbi siti. Dispela nius i go aut long wol long kantri? Mi ting yupela ol gavman bai kisim sem long samting i kamap long Papua Niugini.

**Timo Namaewa Moyu  
Goroka, Isten Hailans provins.**



# Lukautim Lae siti

**Dia Edita,**  
Mi wanpela manki Mumeng tasol nau mi stap long Lae siti.

Mi save lukim ol manmeri i save kaikai buai long taun na long siti. Dispela em i nugot stret, na sampela save tromoi kabis long taun.

Plis sapos yu wanpela dispela man o meri orait yu mas lusim dispela pasin bilong yu long kaikai buai na tromoi rabis nabaut.

Mipela ol asples i laik toktok strong long dispela pasin. Sapos yu dispela man o meri yu wok long mekim dispela pasin orait yu.

Yu mas go long asples o provins bilong yu yet na mekim dispela pasin.

Dispela taun em i no asples bilong yu na yu kam na bagarapim taun o siti bilong mipela ol Morobe manmeri. Morobe taun i pasim sampela bikipela lo tru. Em olsem no ken kaikai buai, no ken tromoi rabis, no ken maket long taun.

**Tela Kip**  
Lae, Morobe provins.

# Ol Nuku i les pinis

**Dia Edita,**  
Mi wanpela mangi Nuku. Mi laik autim bel hevi bilong, mi long memba bilong mi Andrew Kumbakor.

Mi yet mi wanpela wantok hauslain bilong memba Andrew Kumbakor long ples Seam insait long Nuku distrik.

Mi stap long ples na mi save harim olsem em i baim foapela ka long Vanimo na givim long ol liklik lain Nuku long Vanimo long yusim.

Memba olsem wanem ol lain Nuku long Vanimo votim yu o mipela ol lain long Nuku distrik votim yu? I luk olsem yu laik kamap memba bilong

Vanimo Grin distrik open. Memba long neks yia 2002 ileksen olsem na yu wok long givim sevis long ol lain pipel bilong Vanimo Grin open ilektoret.

Ol pipel bilong Nuku kisim bikipela hevi na wari long bel bilong ol. Yu kam long provins yu save kam lukim wara ston long Vanimo na yu no kam raun liklik long distrik bilong yu Nuku. Ol pipel bilong yu kisim bikipela wari long bel na stap isi. Tarangu ol pipel bilong yu long Nuku givim yu vot na no ol pipel long Vanimo. Memba mi laik tokim yu, mipela ol lain bilong yu long ples Seam mipela

les pinis. Yu yet save Seam viles em horn bes bilong yu long go long 2002 ileksen.

Em i orait yia 2002 kam klostu sapos yu laik resis long ileksen yu mas resis long Vanimo Grin sit. No ken kam long ples na resis long Nuku, long wanem yu givim sevis long ol pipel bilong Vanimo na i no ol Nuku pipel.

Yu kisim ol lain Nuku long Vanimo na votim, wantaim Rex Nama, Thomas Nenford na Gabriel Dekualan.

**Paul Kumbari**  
Nuku,  
Sandaun provins.

# Painim toktok

**Dia Edita,**  
Brata Philip yu tok long kam spin long Kimbe. Yu mas wanpela wokman bilong Niu Briten Palm Hetkwata we save karim havesting wantaim Niu Briten Palm sapos yu i stap long ples na kam spin long Kimbe bai yu lukim sain we Philimon Embel i kam long Nipa - Kutubu.

Brata yu mas kisim gutpela poin na kamapim haraip long niuspepa Prait Minista na llektoral Komisen.

Brata mi laik tokim yu olsem i no samting bilong save o wanem, nogat. Em i samting bilong vot tasol na yu wetim 2002 ileksen na yu bai kisim.

Brata yu tok long bisnis long Australia ya yu bin baim sia long en. Mipela no bekim na bekim bek mani bilong yu na yu tok o yu painim toktok long mekim.

**Steven Mines**  
Kimbe, Wes Niu Briten provins.

# Givim sans long ol grasrut

**Dia Edita,**  
Mi laik makim maus bilong ol pipel insait long provins na autim sampela tingting na belhevi na wari bilong ol.

Pipel nau i stap lukluk planti politikai pati long wan wan ilektoret long provins na publik sevis.

Kain kain ol dipatmen ol kampani manki na ol bisnis lain tu nau ol i redi long kam insait long politik.

Neks yia planti publik sevis na ol bisnis lain awenes kempen long giaman long ol pipel na i kamap pinis na stat long dispela yia 2001.

Mipela i no amamas long kain pasin olsem mipela pipel nau i putim hevi long ol publik sevis na bisnis lain. Wanpela askim i go long publik sevis na ol bisnis lain. Yupela wokman nau yupela wok mani o nogat? Olsem na yupela i laik kamap kandidate long politik?

Mipela pipel nau i laik askim publik sevis na ol bisnis lain, yupela i laik mekim wanem? Yupela painim mani, kago, save, bilas o namba na biknem? Plis maski long yupela kaikai long tupela plet bikos yupela plet wok

bisnis na wok mani yupela i mas kaikai long wanpela plet tasol em i inap.

Maski long kaikai long tupela plet. Yupela publik sevis i wok mani long kain kain dipatmen na yupela kisim mani kaikai gut, sindaun slingaut long opis na raun long balus na ka. Tingim tarangu long ples ol grasruts. Traim na givim spes long ol.

Ol pipel, papamama ol i stap wankain pasin yet olsem bipo tumbuna long bipo taim. Planti i stap long bus eria. Wankain pasin yet long tumbuna stail. Eksampel nau em long Sandaun provins ol i stap wankain i no senis.

Husat i bagarapim developmen. Yupela ol bikipela bikipela save manmeri. Ol publik sevis na ol bisnis lain manmeri. Sanap long kamap memba na kaikai bikipela bikipela mani bilong projek long wok kamap bilong developmen insait long distrik.

Husat kaikaim mani bilong projek na provins nau bagarap? Yupela ol politikai lain wok gut long dipatmen.

Planti kain kain save manmeri

tumas na nau yumi bagarap.

Olsem na nau mipela pipel i no amamas long ol publik sevis na bisnis lain bai lusim wok bilong ol na raun resis long politik neks yia 2002 ileksen.

Yupela publik sevis na bisnis lain maski long pasim ples bilong ruts. So mipela ol pipel long ples nau i stap na lukluk.

Yumi demokretik kantri. Pawa i stap long pipel. Pipel i kamapim gavman. Neks yia ileksen em bilong man long ples. Na publik sevis na bisnis man mipela save yu bai kaikaim mani bilong pipel. Olsem nau 25 yia developmen mas kamap long provins.

Plis olsem na publik sevis na bisnis lain traime seteldaun na givim spes long ol man long ples grasrut na ol eks kalabus lain.

Eks prisona tu ol man ya. Bikos i no gat wok olsem na ol i save biket na bagarapim taun, provins na kantri. Traim givim spes long grasruts.

**Julius Kwison**  
Vanimo, Sandaun provins.

Sapos yu laik salim ol pas bilong yu i kam long dispela niuspepa, Salim i kam long dispela adres:

THE EDITOR  
WANTOK  
NEWSPAPER  
PO BOX 1982, BOROKO, NCD.

## Kapena i bilong wanem provins

**Dia Edita,**  
Mi laik kisim maus bilong Polopa manmeri long Saten Hailans, Erave distrik.

Wai na nau i tok olsem Kapena bilong Sauten Hailans na memba bilong Kagua Erave i no save tingim mipela long 1975 i kam nau long 2001, mipela nogat wanpela benifit o sevis long Polopa eria.

Galp provins inap kisim mipela tasol Saten Hailans kisim mipela na nogat wanpela sevis. Olsem na mi gat wanpela bikipela askim Prait Minista Sir Mekere Morauta insait long 27 yia yupela givim sampela mani long Kapena bilong Saten Hailans na memba bilong Kagua Erave o nogat?

Wai bikos planti bilong mipela save dai long Kikori bikos long mani na wantok sistem pasin tasol. Olsem na mi pretim dispela wanpela strongpela askim i kam long Prait Minista Sir Mekere Morauta. Kapena bilong Saten Hailans na memba bilong Kagua Erave. Mi stap long Kikori na salim dispela pas i Wantok niuspepa.

**Jose Agen**  
Dolopa, Sauten Hailans provins.

## Tingim vot bilong ol yut

**Dia Edita,**  
Long Lae yia 2000 long 11 mun mipela raitim pas i go long em long baim ol jesi bilong mipela long basketbal na soka. Na em i bekim pas long namba wan mun na em i tok mipela i go kisim quotesen long na salim i go long em. Mipela mekim olsem em i tok na mipela weit i go nau em i namba sikis mun. Na em i no baim yet.

Mipela na mipela i go i kam long Lae na Bulolo i stap. Na tu mipela i no wanbel long em i no givim long mipela ol yut. Em i no tingim mipela votas bilong em.

**Mista Ketus**  
Yasakiag  
Bulolo, Morobe provins.

## Nogat han mak bilong Agiwa

**Dia Edita,**  
Plis larim mi autim bel hevi bilong mi liklik. Mi wanpela manki bilong Saten Hailans provins long hap bilong Mista Agiwa.

Taim mi stap long ples planti taim mi save harim ol lapun tok. "Memba bilong mipela stap wanem hap tru na skul i go bagarapim haus sik nogat marasin, planti trabel wok long kamap na ol liklik han rot i go bagarap olgeta.

Mista Agiwa liklik taun bilong yu yet Koroba em elepent gras karamapim pinis na wanem taim bai yu stretim ol dispela samting olsem narapela memba stretim hap bilong ol yet?

Mi save lukim yu raun raun long arapela provins long TV. Yu save pilim olsem wanem? Ating dispela hap ol i gat ol gavman sevis na sindaun bilong ol pipel i moa gutpela.

Sapos mi wanpela memba olsem yu em bai mi pilim sem taim mi lukim gutpela han mak bilong memba olsem mi. Mista Agiwa no ken givim las minit sevis long mipela long grisim vot bilong mipela, tingim gut na kam kempen, nogot ol lapun tok nogot long yu.

**Ikiri Koroba**  
Lae, Morobe provins.

## Kanage em rait man

**Dia Edita,**  
Mi laik stretim wari bilong brata W. Donga Wasu, Morobe provins i tok long "Rausim Kanage stori long Wantok." Yes, brata yu orait liklik long tok olsem tasol plis em bai gutpela long tok "tingim gut na rait" o mekim ol kila na fani stori.

Mipela ol planti Kanage stori raitas i stap. Taim yu tok olsem mipela no wanbel. Brata Kanage stori em bilong kainkain we;

- Em ken mekim yu lap;
- Yu ken ritim Kanage stori na lus tingting long wari o hevi;
- Taim yu les ritim;
- Taim bilong san o kol ritim long haus;
- Ritim long ol narapela taim yu nogat ol stori bilong yu yet;
- Ritim long fri taim bilong yu wantaim ol narapela poro. Plis brata W. Donga no ken bel kaskas long ol Kanage stori moabeta yu no ken bisi tumas long Kanage seksen.

**Matt Dedeboh Holeyah**  
Banz, Westen Hailans provins.

## Papa bilong PNG

**Dia Edita,**  
Mi wanpela manki Madang i stap insait long bus, ol i kolim Begesin. Sab ditrik bilong mi Werim.

NMi laik sapotim tok, pipel laikim Somare i kamap minista. Yes, bikos em i papa bilong Nesen. Narapela man i bin wokim haus na em i papa bilong haus na em i save brumim na rausim pipela na stretim haus bilong em na haus i save kamap klin.

Taim papa bilong haus i go pinis, na narapela man i senis na i stap bai em i no inap long klinim haus. Bai haus i doti na bruk bruk, hol nabaut na bagarap. Michael Somare em wanpela, God yet i makim em bilong kamap minista. Yumi i no save long tingting bilong God. Papua Niugini i bilong Somare. Papua Niugini i no bilong narapela kantri.

**Soul Lai**  
Ramu, Madang provins.

## Krai long PNG

**Dia Edita,**  
Mi rait long givim sampela tingting long nius atikel i bin kamap long Nesenel niuspepa fran kava long Tunde May 31, 2001.

Em bin soim piksa bilong Buddhist Pris na tupela meri Oro.

Tupela meri i kapsaitim wara antap long stetu bilong buda. Dispela em soim olsem yumi go we nau?

Ating yumi Papua Niugini painim lotu o? Olsem wanem na yumi yusim God i

gat laip na stap long heven na givim lotu i go long o aidol?

Dispela i soim olsem yumi bai painim bikipela hevi long wanem yumi tanim baksait long God.

Plis gutpela kantri Papua Niugini, yumi mas kam bek long God na tok sori long dispela kain pasin we em i no bihainim wanem baibel i tok. Em krai bilong mi long Papua Niugini.

**James Toni**  
Kainantu, Isten  
Hailans provins.

## Luksave long ol bataflai

**Dia Edita,**  
Long Fraide Jun 15 long Pop Jon Pol ovel insait long Hagen siti, ol memba bilong Hailans, Vincent Auai, Kuk Kuli, Puri Ruing, Gavanga Robert Lak, Simbu John Kamb, Morobe Ludger Mond, Enga Pita Ipatis, Enga John Pundari, wantaim Paiaas Wingti na planti ol narapela memba tu mi no kolim ol, i mekim planti ol maus wara toktok i no gat mining na i no gat as bilong em.

Ol i maus wara planti long kisim vot long 2002 ileksen. Tasol wanpela man em John Pundari. Toktok bilong em i nais na gutpela long olgeta manmeri bilong Westen Hailans provins i kilim olgeta tok bilong em i go.

John Pundari i tok olsem. Mi bilip long God papa i wokim mi. Na mi amamas long God i makim mi lida bilong Kompiani Ambum na em i givim mi wok ministri. Sapos God i makim wanpela man na dispela man i no tingim ol pipel na bihainim laik bilong em yet, bai God i save rausim em i go daun olgeta. God i no inap makim em lida gen, nogat tru ya.

Mi no giaman yupela lukim long buk baibel. Pundari tok olsem.  
• Sapos wanpela PDM Pati ol pati kendidet i karim: mani i kam, ol katen kau i kam, o sipsip katen i kam, no ken yu tok mi Kristen manmeri. Kaikai ol dispela samting na givim vot bilong yu i go long narapela man yu laik long en.

**Joe Karu**  
Mt Hagen, Westen Hailans provins.

Ol yangpela i laikim nem bilong ol i stap insait long niuspepa long painim pen pren i mas prinim tupela nem wantaim adres, na wanem samting yupela i save laikim long mekim (hobbie).

# Wantok painim Wantok

dispela pes em bilong yupela ol  
man na meri husat i laik salim  
tok save i go long ol:-

**BUBU KANDERE BRATA SUSA  
MISIS PREN PIKININI NA HUSAT  
MOA YU GAT LAIK LONG SALIM  
TOK HAMAMAS TOK SORI O TOK PILAI.**

Toktok nating i go long lewa. Wanpela samting tasol toktok i kam long dispela Wantok painim Wantok em i mas sotpela ino inap longpela olsem tel bilong kapul dispela toktok nogat pei long en tasol sapos

igo antap long tripela lain olsem → Brata pls kam long Port  
Moresby long dispela wik  
wantaim tambu lewa bilong yu

en nau bai i gat pei olsem foapela Kina (K4.00)

long wanpela hap olsem → Brata pls kam long Port  
Moresby long dispela wik  
wantaim tambu lewa bilong  
yu na pikinini wantaim dog.

Salim dispela toktok i kam long mipela long Wantok Nius na hamamasim husat yu laik long hamamasim. Tingim dispela ino Kanage stori. Makim skin pas olsem -

**Wantok Painim Wantok,  
PO Box 1982,  
Boroko, NCD**



2001 PNGFA Wimens Klab soka sempionsip - Julai 20-22, Pot Mosbi

# PMSA redi long holim PNGFA klab sempionsip

PRESIDEN bilong Pot Mosbi Soka Asosiesen Fabian Chow i bilip olsem Osenia Kap ogenaising komiti i bin mekim.

Em i tokim Wantok Nius long dispela wik olsem PMSA bai bihainim kain stail olsem Osenia Kap ogenaising komiti i bin mekim.

Mista Chow i tok ol i makim pinis wanpela strongpela komiti long mekim wok bilong ol.

"Mipela i lainim planti ol bikpela samting tru long dispela Osenia sempionsip, na komiti bilong em bai traim long bihainim dispela na mekim tonamen i kamap moa gutpela," Mista Chow i tok.

Presiden i tok long holim intanesenel futbol kompetisen, ol i no save pilai pilai. Ol i save mekim gut wok long traim pulim moa tonamen i kam long eria bilong ol.

Wanpela samting PMSA i lainim em ID kat. Ol bai givim ID kat long ol pilaia husat i laik stap na resis.

Ol wanwan pilaia i ken yusim long raun insalt long soka fil na nogat hevi long sekyuriti.

Mista Chow i bilip olsem Nesanel Wimens Klab sempionsip bai isi long lukautim.

Olsem na ol i makim wanpela komiti olsem Komet Parkop (Trenspot), Paul Pondo na Russel Tsuga (Referi) na Kawaten Pambuai yet bai lukautim haus slip na ol arapela samting bilong PNGFA.

Nau yet olgeta wok redi i go het gut tru. Na komiti tu i redi tasol long kisim sampela helpim long traim stretim graun long holim dispela tonamen.

"Ples bilong pilai i mas gutpela na dispela i ken mekim tonamen i kamap gut. Mi amamas long wanem PNGFA i givim liklik sapot long mekim dispela wok," PMSA presiden i tok.

Dispela tonamen em PNGFA na PMSA i go pas long em. Na ol bai askim ol sekyuriti long sapotim ol ya.

Chow i mekim strongpela tok lukaut olsem wanem ol lain i tingting long mekim trabel i mas tingting gut long wanem ol plismai bai kamap long givim sapot long ol sekyuriti.

## Kas bilong...



• Ol meri Telikom i redi long bungim salens long dispela wiken. Hia yu ken lukim foto bilong sampela ol lapun bilong Telikom. Noken ting ol i lapun, ol i gat kik na yu ken lukim long Bisini long dispela 2001 PNGFA Wimens klab sempionsip.

**“As sponsors of ANZ University Soccer Club, we’d like to wish the ANZ University Women’s Soccer Team all the best in this weekend’s National Women’s Club Championship” here in Port Moresby.**



# 2001 PNGFA Wimens Klab soka sempionsip - Julai 20-22, Pot Mosbi

## Nadzab karim nem bilong Kapsongke viles

**HENRY MORABANG** i raitim

NADZAB Soka tim bai soim pes namba wan taim long nesanel soka tonamen resis, PNGFA klab soka sempionsip.

Planti ol man i ritim nem, Nadzab, ol i save em bikpela ples balus long Lae, Morobe provins.

Wanpela liklik ples arere long Nadzab Intanesenel Aepot, "Kapsongke i go pas long fomim wanpela soka tim na putim long strongpela LFA kompetisen.

Ripot i kam long Lae i tokaut olsem Nadzab em viles tim. Tasol ol i gat kik na stail long mekim ol arapela senta i kra. Bipo soka i stat long Morobe olsem na noken ting dispela "45 soka stail" bai kamap. Nogat, ol meri Nadzab i gat save tu long pulim bal olsem Pele na straikim bal olsem Maradona.

Dispela wiken, ol susa long Nadzab bai kam soim stail bilong viles futbol. Ol biknem tim long sita olsem Lae na Pot Mosbi noken daunim ol. Sapos dispela tingting i strong ol bai kisim taim.

Mausman bilong Lae Futbol Asosiesen (LFA) John Peka i mekim strongpela tok lukaut long arapela tim olsem Nadzab em kam gut ya. Noken tingting o daunim ol meri Kapsongke.

Peka i tok Nadzab na Bara bai karim nem bilong LFA. I tru olsem

Bara i gat moa bikpela sans long stap long fainel, ol viles meri bilong Kapsongke (Nadzab) bai traim tasol long skelim strong bilong ol tim olsem Difens, Telikom, Yunivesiti (POM) na Guria (Lahi) na KYG (Enga).

Peka husat i teknikel man bilong LFA i tokaut olsem OFC soka resis i mekim bikpela tenis tru long taip bilong ol soka man na meri. Olsem na Nadzab bai kam soim stail tasol na samting tru bilong yupela ol arapela senta.

Tonamen dairekta bilong PNGFA Klab sempionsip Qwenton Pombuai i tokim Wantok Nius olsem Nadzab tim i soim ol arapela viles tim olsem ol i ken stap long kain tonamen sapos ol i kisim sapot.

Nadzab em viles tim na ol man long ples tasol i sapotim dispela tim long stap insait long Lae siti kik resis bilong LFA. Ol i soim ol arapela strongpela tim olsem ol tu i ken pilai soka.

Pombuai i tok olsem Nadzab i soim gutpela piksa olsem ol viles tim long eria olsem Manus na Kavieng we i gat ol soka pilai tu i ken soim pes long nesanel tonamen olsem sapos i gat gutpela sapot.

"Manus" em wanpela strongpela soka senta we ol meri i save kik olsem man. Tasol i nogat gutpela wok bung long strongim soka insait long provins ya," Pombuai husat i bilong Manus tu i tok.



## Bara Nogut o!

OL LAIN susa long Bara soka klab bilong Lae Futbol Asosiesen bai mekim planti nois tru long dispela wiken.

Las taim ol i traim long winim taitel long Telikom long Pot Mosbi tasol ol susa long biksiti i tok wet pastaim.

Dispela wiken, ol bai kam soim pes gen wantaim susa tim Nadzab long 2001 PNGF wimen klab sempionsip.

## 8-pela senta resis long Wimens klab taitel

PAPUA Niugini Futbol Asosiesen (PNGFA) klab sempionsip i pulim 8-pela klab olgeta long tripela senta. Dispela sempionsip ya bai kamap long Bisini Soka graun long Pot Mosbi long dispela wiken.

Tonamen Dairekta bilong PNGFA klab sempionsip Qwentin Pombuai i tok olsem ol tim bai stap long sempionsip em Telikom, Defence na Yunivesiti bilong Port Mosbi, Guria na Elcom bilong Lahi, Bara na Nadzab bilong LFA na KYG bilong Enga.

Mista Pombuai i tokim Wantok Nius olsem 12-pela tim i bin glivim nem long stat bilong dispela resis.

Em i tok 4-pela i pul aut long tonamen long wanem ol i tok PNGFA i no givim ol inap taim long redi.

Ol klab i bilip olsem planti ol senta i no kamap long wanem PNGFA i no tokaut long kalenda bilong en hariap long givim taim long ol liklik senta long redi long salim tim.

Pombuai i bilip olsem planti ol liklik klab long ruel eria i laik

resis long soka tasol ol i no save long ogenaisim ol yet.

Tonamen Dairekta i tok em i gat bikpela amamas tru long Nadzab tim bilong LFA.

Em i tok em i harim olsem Nadzab em viles tim we ol papa graun bilong Nadzab Intanesenel Aepot i statim.

Olgeta helpim o sponsasip em ol asples na bikman insait long viles eria i lukautim ya.

Nadzab i wanpela gutpela piksa bilong ol tim insait long ruel eria.

Aka i strong yet long winim taitel gen bilong Telikom



• Straika bilong Telikom klab long Pot Mosbi, Margaret Aka i lukluk gen long winim narapela taitel gen long dispela wiken. Long Pot Mosbi, bikpela PNGFA Wimens soka klab sempionsip i pulim ol tim resis.

Telikom bal painim strongpela salens i kam long Bara (LFA) na Guria (Lahi).

Arapela tim we bai pilai gut em Yunivesiti (POM). Tasol n oken ting lus long KYG bilong Enga.



### LAE BISCUIT CO. LTD

## i tok Gut Lak long Defence Women's Soccer Team

# Lae Biscuits Co. Ltd i hamamas long sponsarim Defence Soccer Club long Pot Mosbi Soka Asosiesen.

# Cosmos daunim PS United

COSMOS i daunim pawa bilong PS United 2-1 insait long primia kik resis bilong Kina Finance Pot Mosbi soka resis las wiken.

Dispela win bilong Cosmos i surikim ol i kam sindaun nau long namba 4 ples long poin lata wantaim 24 poin.

Maski PS United i lus, ol i holim yet namba wan ples wantaim 29 poin. Defence i stap namba tu ples wantaim 28 na ANZ Yunivesiti i stap long namba tri ples wantaim 27 poin.

Ol arapela tim bhain long Cosmos em Rapatona 23, Babaka 22, Guria 17, Telikom 11, Kula 8 na YM2 7.

Cosmos i brukim dian insait long 55 minit taim Michael Lohai i skorim gol.

Em i buletim bal na abrusim golkipa bilong PS United Ronald Simon na go insait.

Lohai i pilai strong bhain long em i kisim bagarap long lek sampela taim i go pinis.

Em i kisim gutpela sapot pilai i kam long ol yangpela Samarai mangi olsem Enoch Abraham na tupela brata ya, Andrew Lepani na Nataniel Lepani.

Cosmos i kontrolim gut gem long olgeta dipatmen.

Presiden bilong PMSA Fabian Chow i amamas long dispela gem long wanem em i ting PS United bai win tasol Cosmos i rausim trausis bilong ol pukpuk ya.

Bipo long pinis bilong pilai, long bun straika bilong PS United Paul Kamboi i bekim dispela gol bilong ol long levelim skoa.

Insait long haptaim tupela tim i nogat gol. Tasol Lohai i pilai strong tru na i soim olsem em i wanpela strong-

pela pilaia long fran lain long mekim save stret long difens bilong PS United.

Kamboi i skorim gol bilong ol long 85 minit, samting olsem 5 minit bipo long fultaim.

Insait long narapela gem, Paul Patterson i skorim tupela gol long rausim trausis bilong ol boi Babaka.

Boi Samarai ya i kisim kain stail bilong Jasper na mekim save stret long ol Sentral provins.

Wantok Nius i no klia tumas sapos Paul em i brata bilong Jasper o pikinini, tasol ol Samarai yet o Trobriand i ken tokim ol em husat.

Rapatona husat i no kamapim gutpela gem tumas long sampela wik nau i stat long win gen.

Las wik ol i nekim ol boi Kula 5-0. Na dispela em strongpela tok lukaut i go long PS United, Defence, University na tu Cosmos.


Insait long narapela ol em, Lae Biscuit Defence i nilim stret YM2 6-1 na Guria i bagarapim sindaun bilong ol lain Telikom/SP 4-1.

Insait long narapela soka stori, Kokopo Soka Asosiesen bai i no inap salim tim i go long NGI soka tonamen long Kimbe.

Presiden bilong Kokopo Soka Asosiesen Luke Muta i tokaut olsem man na meri tim bi i no inap stap long dispela tonamen long wanem ol i sot long mani.

"Mipela i no kisim gutpela sapot long ol bisnis haus o kampani insait long Kokopo olsem na mipela i no inap salim tim," Muta i tokaut olsem.

Dispela tonamen long Kimbe i pulim sampela tim olsem Buka, Manus, Kavieng, Kerevat, Rabaul na Kimbe, Wes Nu Briten na tu Nu Briten Palm Oil Limited (NPOL).



• Kempna Sparrows i brukim bun long Pot Mosbi netbal kompetisen. Sapos yu wanem sapota i nogat samting long mekim, plis kamap na sapotim tim bilong yu.

## Tripela Lahanis i kisim bagarap long SP Cup gem

TRIPLELA pilaia bilong Goroka Lahanis i kisim bikpela bagarap long skin bilong ol bhain long bikpela pait i kamap namel long ol na ol sapota bilong Rabaul Guria las wiken.

Guria i go pas long skoa 17-16 taim dispela pait i kamap.

Tim menesa bilong Lahanis Paul Morris i tokaut olsem Steven Sike i kisim bikpela bagarap long eye bilong em,

George Aba i brukim tupela tit na wisket bilong em, na Fatty Buka i kisim bikpela bagarap long pes taim ol i brukim botol long het bilong em.

Morris i tok em yet i kisim solap taim ol sapota bilong R abaul Guria i yusim katapel long sait long sutim em.


Em i sutim tok long PNGRFL long dispela hevi i kamap namel long tupela tim.

Em i tok sapos i gat wanpela namel referi, kain hevi olsem bai i no inap kamap.

Morris i tok Lahanis i skorim tripela trai tasol referi Joel Paak i no oraitim. Na dispela i kamapim hevi we ol Lahanis pilaia i statim pait.

Em i tok PNGRFL i tingting long mekim mani na i no tingim sekyuriti bilong ol pilaia.

# WINIM K100 PAINIM BAL RESIS NAMBA 6



- RUL BILONG PILAI:**
1. Makim X long boka long poto yu ting bal i stap
  2. Makim X long pen tasol
  3. Katim poto long sisos na salim long: **PAINIM BAL RESIS NAMBA 6, Wantok Niuspepa, P.O. Box 1982, Boroko, NCD.**
  4. Nambawan entri i makim stretpela hap bal i stap, em bai win.
  5. Las de bilong kisim ol entri em Fonde 26 Julai, 2001.
  6. Long Wantok bilong Fonde Ogas 2, bai gat nupela K100 prais mani resis. Bai gat resis bilong olgeta mun i go inap mun Desemba, 2001.
  7. Disisen bilong komiti i makim wanpela wina em i lainel.
  8. Wina bai kisim sek mani, na i no long kes.
  9. Sapos nogat wina bai skruim wina mani i go antap long nupela resis.
  10. Ol meri pikinini o famili bilong ol wokman meri bilong Wantok i no inap stap insait long dispela resis.

9. Raitim nem na adres bilong yu: **Nem**..... **Address**.....  
 ..... **Krismas**.....

10. Yu ken salim moa long wanpela entri, tasol no ken yusim poto kopi.

11. Ol famili o pikinini bilong ol wokman meri bilong Wantok i no inap stap insait long dispela resis.

## Royals bai salensim Panthers

### RAGBI LIG RIPOT

DISPELA wiken bai i gat wanpela gutpela ragbi lig gem namel long MDC Royals and Panthers long Lae Ragbi Lig resis.

Panthers em i go pas long kompetisen tasol Royals i wok long smelim em long namba 5 ples na laik win long wiken. Dispela gem bai opim bikpela SP Cup gem namel long Lae Bombers na Mendi Muruks.

Kosa bilong Royals i tok olsem ol bai bilong em bai redi tasol long salensim ol lain Panthers.

Panthers husat kosa bilong ol Joe Katsir i stap wantaim Bombers tasol ol i stenbai kosa long lukautim ol. Trena/Kosa bilong Royals Agi

Tete i tok olsem ol boi bilong em i kilim skin stret na redi long salensim Panthers.

Royals i gat ol pilaia olsem Abraham Kasi, hapbek Gideon Assenda na huka Timothy Aims we bai kamapim bikpela bagarap long kompetisen lida. Ol bai kisim sapot long Jerry Bomai, Samuel Kapa na kepten.

Ol opisel bilong Royals olsem Tete, James na tim menesa Bustin Anzu i bilip olsem tim bilong bai win.

Dro bilong ol arapela A gret gem i sanap olsem: Magani i redi long autim Tarangau long Sarere. Na long Sande; Defence bai bungim Brothers na Spiders redi long nekim Tigers.

Bikpela gem bai stap namel long LBC Bombers na Mendi Muruks.

## Goroka holim Hailens volibal sempionsip

### VOLIBAL RIPOT

GOROKA bai holim Hailens Rijonel Volibal sempionsip long dispela wiken long Catholic Youth Senta.

Dispela volibal sempionsip i pulim tim i kam long Simbu, Goroka, University of Goroka, Kange Country, Mt Hagen, Yonki, Wabag, Porgera na Mendi.

Insait long dispela tonamen, ol pilaia bai resis long winim spot long stap insait long rjon tim bilong salens long nesenel sempionsip we bai kamap long Lae.

Mt Hagen tim bilong man em difending sempion. Na ol bi kamap strongpela gem long lukim dispela sil i mas go bek long Westen Hailens.

Na long meri, ol tisa meri long Yunivesit bilong Goroka i winim taitel. Ol tu i gat tingting long holim bek taitel ya.

Bai i gat spesel ret bilong kaikai na haus slip long Goroka Bisnis Koles. Dispela pe em long K20.00

Ol ogenaia i askim olgeta tim long baim K250 afiliesen fi na tu K2.00 rejistresen fi. De bilong mani i pas em Julai 19.

Ol ogenaiaing komiti i askim wan-wan tim long kam wantaim referi na bal. Bai i gat rifresa kos long Fonde na long apinun bai i gat tim menese-miting bipo long tonamen i ken stat.

Husat i laik kisim moa save i ken ringim presiden GVA long 732 2111 na feks 732 3141.

# Wollom helpim Erima basketbal resis



• **Mausman bilong Alert Security David Peka (raithan) i givim sekman i go long kodineta bilong Erima Wimens Basketbal resis, John Suve (lep-han). Ol arapela opisel Martin Yaka bilong Erima Ward na John Kumu (raithan) i lukluk i stap.**

ERIMA Mosbi Not-Is Wimens Basketbal kompetisen i kisim bikipela helpim mani long wiken.

Menesing Dairekta bilong Alert Sekyuriti Grup ov Kampani, Casper Wollom i givim K20,000 i go long ol ogenaia bilong dispela tonamen.

Dispela K20,000 em hap mak mani bilong K40,00 we Wollom na Alert Sekyuriti i givim long sapotim dispela ol tonamen.

Kodineta bilong Erima Wimens Basketbal kompetisen John Sule i amamas long Caspar Wollom na kampani bilong em. Dispela helpim i kamap long taim s tret we bai helpim ol mania insait long dispela eria long sindaun gut na pilai amamas wantaim. Dispela tonamen ya i pulim ol pilai i kam long olgeta hap bilong Nesenel Kapital Distrik (NCD).

Mak bilong 50 tim olgeta i save resis. Ol i

tim i kam long 2-Mile, Konedobu, Morata na tu ol arapela setelmen insait long NCD.

Dispela i no namba wan taim long wanem Wollom i sponsarim 9-Mile basketbal.

Bomana Ragbi Lig na tu PRL na Pot Mosbi Vipers.

# Jamuga holim kos bilong sekyuriti

## SPOT RIPOT

STONE's Martial Arts na Fitness Senta bai holim Combat Taekwando Self Defence, Arnis (stick fighting) na general fitness kos bilong ol sekyuriti.

Dispela kos bai karamapim; jenerel fitnes, combat taekwando, self defence, unarmaged combat, grabbling, arnis & baton techniques, graun techniques, vital & pressure point na tu pablik relisen.

Sif Instrukta bilong dispela senta yet, Jamuga Stone bai go pas long lukautim dispela kos. Jamuga i gat 27 kamas long martial arts na i bin pait long planti nesenel na intanesel tonamen.

Stone i tok olsem i gat planti ol sekyuriti kampani i nogat gutpela trening bilong ol sekyuriti bilong ol. Ol sekyuriti i mas stap long fran lain long lukautim laip. Tasol planti ol sekyuriti i no olsem tumas ya.

Jamuga Stone i askim olgeta sekyuriti kampani long salim ol wokman bilong ol i kam long dispela skul.

Em i bilip tu olsem Polis Fos na Kolektsenel Sevis (CIS) i mas kam sindaun long dispela kain kos long kisim trening. Em bai amamas tru long lukautim self defence trening bilong ol Plis Fos na CIS.

Stone i bin holim sampela kain kos bipo wantaim PTC, Air Niugini, Holiday Inn, Tisa Seavings na Loans na tu tis fultaim wantaim Port Moresby Grammar School.

Dispela kos bai kamap long Ogas 6 na pinis long Septemba 14. Fi bilong sindaun long kos ya em K180 we ol bai kisim T'slot bilong trening, batoh stiek na sertifikat.

Rejistrasen bilong dispela kos i stat long Julai 26. Nau yet i gat 60 ol spes i stap pinis na harlap long kamap na givim nem.

# miti bilong projek

POT Mosbi Soka Asosiesen (PMSA) i makim pinis wanpela komiti long lukluk long developim fasiliti na soka fil.

Presiden bilong PMSA Fabian Chow i tokaut olsem em i bilip ol man ol i makim bai mekim gutpela wok.

"Mipela i amamas long pulim bek sampela ol man i gat save long wok i kambek long soka long traime stretim ples pilai na ol fasiliti. Mipela i amamas tru long kisim Benny Popoital olsem Patron bilong PMSA," em i tok.

Mista Chow i tok Popoital i kisim wok bilain long em i helpim long ogenaia nesenel Osenia Futbol Konfederesen long bigin bilong dispela ya.

"Helpim bilong em i gutpela long ol soka pipel na dispela i ken helpim PMSA long kisim planti sapot long PMSA."

Presiden i tok Popoital i bekim wanpela askim we bai pulim tru soka i go kamap bikipela stret. Na em i

namba tu siaman bilong Bisini Soka stadium projek.

PMSA i lukluk long stretim ples pilai na sindaun bilong ol sapota na dispela i ken kamapim gutpela rot bilong edministrasen. Longpela taim tru, PMSA i no kisim gutpela mani long mekim wok.

"Dispela i save kamap sapos i gat ol gutpela man i sta long soka. Mipela i nogat kain sapot olsem bipo. Tasol mi tink taim mi kisim wok presiden, mi stat long palnim na kisim planti ol sponso i kambek long soka.

Mista Chow i tok Kira Finance i sponsarim 2001 sisen propa. Na mipela i ting, stat long hia na go, mipela i ken pulim moa sponso i kam insait long soka. Bikipela amamas i go long Syd Yates.

Ol arapela sponso em Posman Kua Aitsi husat i bin mekim bikipela wok long promotim soka insait long Pot Mosbi na tu kantri.

# Osenia Boksing trials gutpela

PAPUA Niugini Boksing Union i makim pinis wanpela skwat long pait insait long Osenia Boksing semplosip long Suva, Fiji.

Presiden bilong PNG Boksing Union Lohial Nuau i tokaut olsem dispela tim em nupela i gat ekspere-riens long pait. Ol bai holim sampela trening kem bipo ol i go pait long arapela kantri.

Nem bilong ol boksa em Mahite Buka (48kg), Raphael Lare (51kg), Ben Tami Jnr (54kg), Kevin Sam (57kg), Rodney Jackson (60kg), Toksie Seteme (63kg), Ben Mathew (67kg), Chavis Kora (71kg), Roy Kanawi (75kg) na Joe Aufa (91kg).

Mista Nuau i tok planti nupela boksa i

kisim ples nau. Ol biknem olsem Lynch Ipera i autim na ol nupela boksa long Manus, Bulolo na Rabaul i kisim ples na bai pait long intanesel level.

Presiden i tok dispela em wanpela top tonamen long taim bilong em olsem wanpela boksa na nau olsem edministrata. Ol lain sapota i kisim bikipela amamas long lukim tonamen.

Em i mekim bikipela tok amams i go long lokel ogenaiaing komiti (LOC) long mekim gutpela wok bilong ol. Na em i amamas tru long lukim ol nupela kain stail i wok long kamap insait long boksing.

Mista Nuau i mekim bikipela tok amamas i go long mesa sponso,

Mineral Risoses Developmen Koperesen (MRDC) long givim sapot long dispela tonamen. Sapos nogat sponso, tonamen bai go inap kamap gutpela.

Mausman bilong MRDC Ruben Pokanau i tokaut olsem kampani bilong em i amamas tru long dispela tonamen. Pokanau i tok kampani i amamas long boksing long wanem ol i save winim planti ol medal long intanesel tonamen.

Ol arapela boksa i kisim tropi em Ben Tami jnr (Boksa bilong Tonamen), Ben Mathews (Most Improv boksa), Toksie Seteme na Andrew Gawi (Gutpela pait long tonamen) na Most Saitenfik Boksa em Chavis Kora.

# Unitech i soim pawa

## SOFBAL RIPOT

SEMPION klab bilong Papua Niugini, NauFM Unitech i wilwim stret Bismarck 4-0 insait long Lahi Soka Asosiesen kompetisen las wiken.

Ol boi Yunivesiti i no westim taim. Insait long 15 minit, kepten/kosa Nicolas Puy i kisim wanpela gutpela bal na ran go insait long senta na buletim i go insait long umben bilong Bismarck.

Skoa nau i sanap Unitech 1 na Bismarck i gat kiau.

Ples pilai i bagarap liklik long wanem bikipela ren tru i pundaun long moning. Tasol tupela tim ya i no wari. Ol i kilim skin tru long salensim narapela narapela.

Samting olsem long 22 minit bilong pilai, wanpela wantok bilong Puy yet long Wes Irian Bennett Tito i parapim umben gen. Na dispela i bringim skoa bilong ol lain Unitech i go long 2-0.

Klostu long haptaim, David Kolkoma i skorim namba tri gol bilong Unitech. Na dispela i helpim tru tim na ol boi i redi tasol.

Insait long namba tu hap, Bismarck i kamapim olgeta kain stail na trik bilong ol, tasol Unitech i blokim olgeta sans.

Tupela sait wantaim i pinisim olgeta stail long soka buk. Skoa i sanap yet 3-0. Tasol long 40 minit, Kevin Vusi i skorim namba foa gol bilong ol Unitech. Ol i blokim dispela gol i go inap fultaim.

Ol boi i pilai long sait bilong Unitech em Nicholas Puy, Bennett Tito, David Kolkoma, Brian Kenny, Fred Siba, Emmanuel Ban na Keith Vusi. Na long sait bilong Bismarck em Philip Kanga, John Kaupin, Martin Sebu na golkipa Clement Siky.

## Gutpela gem bai kamap long Rabaul

JACK Emmanuel Park long Kokopo bai pulap stret long ol sapota long kamapim lukim gem bilong Is Nu Briten Ragbi Lig kompetisen.

Ol sapota i save kapsait i kam long hap bilong Rabaul yet na tu insait long Baining erla long lukim dispela gem.

Sampela ol biknem tim olsem Sea Eagles, Brothers, Raiders, Tigers, PTC na Panthers i pinis long wanem mauten i pala na bagarapim ol.

Sampela ol pilai i joinim narapela klab long pilai yet na sampela i tok ol i medalis nau.

Bitapaka Souths bai bungim Baianataman long palnim aut husat bai holim yet namba tri poseen long lata.

Kosa Arnold Tivilet i go pas olsem kosa bilong klab. Klab ya i strong long wanem em i kisim gutpela sapot i kam long ol viles lida long Bitapaka erla.

Tim bilong ol i stap olsem Francis Kulni, Albert Nake, Ben Roman, Steven Taru na Teven Tolom i go pas long tim.

Bala i save strong long ol yangpela i stap insait long Rabaul sait na tu NGI tim.

Kosa Allan Kagene i tok ol bai strong long ol yangpela long winim dispela em.

**TELKOM FOOTBALL CLUB**  
PO Box 3333, Suva - 111

**Telikom Soccer Club - Pom**  
i salim bikipela tok sori long  
**Sawi, Tabitha na Laan Sitapai** long dai bilong brata, tambu na kandre bilong ol

**Alois Sitapai**  
husat i dai long Japan long Monde 16th  
Julai 2001.

Mipela i tingim yupela long prea long dispela taim bilong wari.

*'God i ken givim em gutpela malolo'*

# WANTOK SPOTS

## Telikom na Yuni bai win

TUPELA tim bilong Pot Mosbi, Telikom na Yunivesiti em feveret long winim 2001 PNGFA Wimens klab soka sempionsip.

Dispela kik resis ya bai stat long Fraide na pinis long Sande long Bisini soka graun.

Bihainim soka dro, Telikom i go pas long pul A wantaim ol arapela senta olsem Nadzab (LFA), Guria (Lahl) na KYG (Enga).

Insait long narapela pul em; Elcom (Lahi), Bara (LFA), Defence (POM) na ANZ Yunvesiti (POM).

Bihainim fom bilong ol wanwan tim, Telikom long Pot Mosbi bai winim yet dispela taitel na sapos em i no was gut, ol susa na namba wan birua tim, Yunivesit bilong Pot Mosbi.

I tru Bara i winim LFA taitel las yia, tasol ol i noken daunim susa Nadzab (meri long ples) i skelim save long soka fil.

Long glasim wanwan pul, Telikom bai winim isi gem long Pul A long wanem ol arapela birua tim olsem KYG na Guria i no strong tumas. Guria bai kisim sampela skul long kosa Richard Nagai.

Telikom i gat ol biknem

pilaia olsem Frederica Siwin, Priscilla "Ghost" Konalali, Margaret Aka, Judith Sauto na tupela susa, Julie Alau na Kathy Alau long winim gem long wiken.

Na i gutpela long lukim Robertha Kaul i kam sapotim soka na noken tingting tumas long sof-bal.

Long rekot, Telikom i winim PNGFA wimen taitel planti taim pinis, na ol bai difendim long dispela wiken.

Telikom i mas was gut long ANZ Yunivesiti. Ol meri long Waigani i gat ol sampela yangpela husat i ken bagarapim sindaun bilong ol biknem tim.

Yunivesiti i gat ol pialai olsem Nellie Popeu, Lyna Waho na pikinini bilong Aplena Waho long karim tim.

Sapos Lyna na Alpena i winim dispela taitel, ating em bai dedikesen i go long papa bilong ol, Andrew Waho. Late Mista Waho i bin pilai long Yunivesiti riserv gret na painim dai bilong em.

Na long sait bilong Pul B, Defence em wanpela strongpela tim long Pot Mosbi. Tasol olgeta katres i pinis na Yunivesiti bai win yet.

Nadzab em viles tim.

Noken ting ol i no save long soka. Save i kilim ol na ol bai traim tasol long dispela wiken. Ol meri Markham i save long wanem kain stail bilong ol long winim gem.

KYG tim em bilong ol lain Enga. Peter Mommers husat bai kamap komisina bilong PNGFA Wimen klab sempionsip i save olsem ol meri Wabag bai soim olgeta strong bilong ol long winim gem.

Ol Hailens i save amamas long ol yet. Olsem na Bisini Soka Graun bai pulap long dispela wiken long lukim ol wantok Wabag na Enga i kapsait long lukim tim. Win em bilong yupela ol nambis tim, tasol long brukim kaukau wantaim lek, em ol meri KYG i save.

Wanpela saveman long soka, John Davani i ting Telikom na Yunivesiti bilong Pot Mosbi bai winim dispela gem.

Tasol John Peka bilong Lae i bilip olsem Bara bai bagarapim sindaun bilong ol arapela tim sapos ol i no was gut.

Peka em wanpela biknem soka pilaia na i save long wanem strong bilong ol tim insait long LFA kompetisen.



• Nellie Popeu (tromoi han) bai go pas long win bilong Yunivesiti long dispela wiken. Foto: JOE IVAHARIA.

## Muruks bai skelim Bombers long SP Inta Siti Kap resis

BIKPELA ragbi lig gem bilong SP Cup kompetisen bai kamap namel long Mendi Muruks na Lae Bombers long dispela wiken. Gem ya bai kamap long Lae Ragbi Lig oval long Sande 3 kilok.

Samting olsem 2000 manmeri bai kamap long sapotim dispela tupela tim taim ol i brukim bun bilong ol.

Kosa bilong Lae Bombers Joe Katsir i tok olsem em bai putim sem tim egen-sim Pot Mosbi Vipers long salensim Muruks. Bombers i bin dro wantaim Vipers 16-16 long Pot Mosbi las wiken.

Nau yet, ol mungi Lae Bombers i hatim trening long Igam Bareks. Na wantaim ol asples i stap bihain long ol, ating

Bombers bai winim dispela gem isi tru.

Bombers i winim ol Simbu Warriors 14-11 long LRF fil, na wankain pasin bai kamap long dispela wiken.

Na long sait bilong Mendi Muruks, ol i gat ol biknem pilaia olsem Charlie Joe, Cedric-Kengi, Mark Ipu, Alex Haja na Mark Alua long go pas long fowat bilong ol boi Sauten Hailens.

Charlie Joe em i wanpela Kumul pilaia na bai kamap strongpela gem long dispela wiken. Sapos Lae Bombers i laik win, ol i mas banisim gut han bilong Charlie Joe bikos taim em i go long takol, bal i go pinis.

Bombers i gat Cedric Belo, Ivan

Mosoka, Kevin Yak, David Ako na stail mungi Bafinu Ilaai long bagarapim sindaun bilong Muruks.

Kosa Katsir i tokaut pinis olsem ol i mas winim dispela gem long stap insait long fainel foa ples long poin lata. Na ol pilaia i save long wok bilong ol long dispela wik Sande.

Yanpela hapbek Bafinu Ilaai i tok olsem em bai traim strong long wok wantaim Leon Kondai long brukim difens bilong Muruks. Kondai i bin pilai long Enga Mioks las yia na join-im Wol Kap tim long 2000.

Tasol em i no kisim sans liklik long pilai long dispela tour long Ingran na Frens.

Arapela hevi Bombers i gat nau em golnika Eddie Mark i mas pasim tingting gut long kikim konvesen.

Insait long arapela gem, Pot Mosbi Vipers bai bungim Wagh! Tumble long Pot Mosbi we bai pulim planti sapota tru.

Vipers inap long win las wik tasol sampela ol pilaia i no bihainim gut ples. Sampela ol biknem pilaia olsem Chris Lome, Raphael Mua na Andy Nick bai i no inap pilai long wanem kosa i rausim ol.

Kosa Richard Wagambie i tokaut olsem em i larim ol pilaia i malolo na nogat wanpela ripot long hevi long Vipers kem.

## Enjoy Coca-Cola at the right price

The Coca-Cola company want you to purchase your Coca-Cola at the RIGHT PRICE.

You can pick up an icy cold Coca-Cola 355ml can for just K1.10 or 500ml bottle for K1.30.

And you can also grab a 1litre Coca-Cola for K2.00.

Enjoy Coca-Cola and pay no more than the recommended retail price.

Prices apply to other refreshing flavours including Schweppes, Sprite, Fanta, & Diet Coke.



Coca-Cola Amatil (PNG) Ltd.

COCA-COLA, DIET COKE, FANTA, SPRITE, SCHWEPES AND enjoy AND THE CONTOUR BOTTLE DESIGN ARE REGISTERED TRADE MARKS OF THE COCA-COLA COMPANY.





# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.